



Basikulembulula: Sarah Small,
Jon Paul Witt,
Alan Scantlebury
alimwi a Jo Kimball

Matalikilo 3:

Buumi Bulalenga



www.dignityonline.org.uk

Matalikilo 3

Buumi Bulalenga

*'Bayakwiitwa kuti masamu abululami,
Kusyangwa kwa MWAMI
Mukutondezwa mumuni wakwe.'*

Isaya 61:3b

Matalikilo 3: Bummi Bulalenga, Bulembo Butaanzi, Mukazibaziba 2020
Nguzu zybulembi © Dignity 2020. Nguzu zyoonse zyajatililwa.

Mubakwabe ba Dignity

Mulembele: 6 Barlow Moor Road, Didsbury, Manchester, M20 6TR, UK
Emelo: hello@dignityonline.org.uk
Luwaile: +44(0)7340753937

Kulumba

Dignity balumba Jesu ku buumi mbwaatupa kuti twiinde mubbuku eeli.
Dignity balumba akusyoma muntu oonse wakatola lubazu ku mulimo ooyu.

Mulimo wa Dignity

Dignity babelekela aamwi abaabo mumbazu zyili kule alimwi bakulwaizya maumi acincide aliwmi azyooko kuti zyilete lwanguluko kuzwa ku bucete kwiinda mubulongwe a Jesu. Eeci tucikonzya kucijana kapati kwiinda Mutubunga twa Buumi, ooto tusolwedelwa azyooko zybana Kristu tubamba bantu kukonzya kweenda muni muni lya Jesu akutondezya luyando kuli baabo babazungulukide. Kwiinda mumaumi eesu tubona bantu bapona maumumi akondelezya alimwi akubaa lubazu mumaleele abuzuba abuzuba. Amumvwe kunji kuli www.dignityonline.org.uk

Kabunga kabamba Matalikilo

Basikulembulula: Sarah Small, Jon Paul Witt, Alan Scantlebury alimwi a Jo Kimball
Babali Bakubona Bulubizi: Rachel Warner, Mark Vermes, alimwi a Abigail Cummings
Bapandulula: Habeenzu Nchimunya Joseph

Twaambo tuzwa mu Bbaibbele

Ibbaibele 1963 The Bible in Tonga (Zambia) © United Bible Societies, 1963

Zyitondezyo Zyabweende

Zyitondezyo zyabweende zyakabambwa aba Metro Icon Studio 5 akulembwa aba SyncFusion.
Zyitondezyo zyakazumizyigwa kubeleseghwa.

Matalikilo

Matalikilo nciyo cigwasya bantu kuzyiba akukomena mu bulongwe bwabo a Leza alimwi cilabakulwaizya kubamba cooko cabo. Cakalembelwa kupa zyibesyo zisumpukide zyikonzya kubelesyegwa mumasena aindene indene amutubunga twazyianza munyika. **Matalikilo** ajisi mabbuku one, alimwi kalijisi zyiyo zyambunga zyakukwabana zyili kkumi azyotatwe.

Matalikilo akalembwa abalembi beenzu basikulyaaba kuzwa munyika alimwi akubikkwa antoomwe akulembululwa aba Dignity.

Matalikilo 1: Buumi Bwatalika libambilidwe baabo bapya na batakwe lusyomo. Kuzwa kumatalikilo maubauba lilasolwedela bantu munzila zyitaanzi zya lusyomo akuzyiba Leza.

Matalikilo 2: Buumi Bulakula ciyaka matalikilo aawo lusyomo mpolunga lwakomena akupa luzyibo lwa njiisyo zygwasylizya bubelesi bwa Bbaibbele amupailo.

Matalikilo 3: Buumi Bulalenga cibikkila maano kubona basiciiya mbobakonzya kucinca zyintu zyibazungulukide. Muna Kristu uuzwide ulalengulula buumi mbwapedwe mucooko alimwi abwabamwi.

Matalikilo 4: Buumi Bulakomena cilanganya mbuli muna Kristu uusimide mbwabede. Eeli bbuku lilazumanana amakani oonse azyibeela, kwasindinganya akwakwazamuna.

Bulembi

Matalikilo 3: Buumi Bulalenga cakalembwa abalembi basikulyaaba ba mumabazu anyika. Balembia bakayungizya ku bbuku eeli balilembedwe mayina aabo mbuli mbwaccililene.



Ba Kate Dean bakabeleka muzya lwiiyo kwa myaka iinda ku 30 eelyo balayandisya kubona bana kabazwidilila akuba baabo Leza mbakababamba. Balazumanana kubelekela aamwi azyikolo abamayi bapati eelyo zyintu zyibotu kubana abantu basyoonto. Ba Kate bakaba basyomwa ku Dignity eelyo balangila mulimo wabo mukabunga.

Cibeela 12



Ba Anthony Delaney bakwete ba Zoe alimwi basololela cikombelo ca Ivy Church Manchester ku United Kingdom. Ba Anthony mbobakatalisya cikombelo ca LAUNCH Church Multiplication Catalyst alimwi balasololela 'NewThing' kumbo a Europe. Bakalemba mabbuku manji alimwi babonekela kanji kanji a wailesi lya BBC. Balajanika akasabwi aaka anthonydelaney.com.

Cibeela 2



Ba Dennis Hardy bakapanga Jesu kuba Mwami wa buumi bwabo aciimo ca myaka 16. Basyoma kuti nciyandisi kuunka mukwaambila bantu kwiinda kwaambila bantu kuti baboole bazyikulibonene. Antoomwe abakaintu babo ba Jane amukwasyi musyoonto ba Dennis bakatola myaka iili 10 ku Bangkok. Lino bakkala ku Manchester, UK eelyo bajisi bubi mumilimo yakuya bwaambila bamwi.

Cibeela 9

Ba Michael Heng bakwete ba Minaeelyo antoomwe bajisi bana basankwa 2. Bakkala kunyika a England ooko ba Michael nkobajisi makwebo akucapa akuccisa zyxisani. Bakaleka mulimo wa budokotela kutegwa bape ciindi cinji ku bulongwe bwabo a Jesu Kristu amukwasyi wabo.

Cibeela 3

Ba Mina Heng bakazyalilwa ku Mauritius mpoona bakaboola ku Liverpool ku zya lwiiyo. Kabacili okuya bakaswaana ba Michael eelyo balikwetene kwa myaka iili 18 ono eelyo bajisi bana basankwa 2. Ba Mina bakaba ba Kristu eelyo nobakanjila muswaangano kabacili basyoonto. Leza wakabapa mulimo, mulimo wakuba eelyo balati muciiindi ncoona buumi bwakalibonya kuba amuzeezo.

Cibeela 6



Ba Jo Kimball bakazulilwa mumbunga ya Dignity kuzwa mu 2008, kweenda kapati mu Zambia kuti babeleke atubunga twa buumi amaunga aleta kucinca. Mbeendelezi alimwi mbakulwaizi bakondwa kubona bamwi kabazwidilila akwiiya ncocaamba kuyandwa kuli Jesu.

Cibeela 11



Ba Reverend Peter Matthews mbasololi ba cikombelom ca Anglican okuya ku Old Trafford, Manchester. Bakayiiisa ciyo ca physics mu zyikolo zytatwe, ciindi cabo cinji ca kuyiisa cakali mu Africa.

Cibeela 7



Ba Sarah Small bakakomenena mu Yorkshire mpoona bakabala zya Busyomi a Bbaibbele mu Manchester. Kutobelanya amyaka iili kkumi njobakabeleka ncito ya kulyaaba mu UK amu Africa, lino balisangene mumakanze amudolopo mu UK. Balanganya busololi bwa cikombelo, milimo ya kulyaaba alimwi abuumi bwa mukwasyi abana 2 eelyo bakazwa akumanizya kuyungizya lwiiyo lwa Bbaibbele.

Zyibeela 4, 8 a 13



Ba Richard Thompson mbasololi ba Ndubaluba Outdoor Centre, cili mulubazu lwa cikolo ca Chengelo ku Mkushi, Zambia. Ba Richard balijisi kuyandisisya kupati kwa kusumpula Lwiiyo Ikwa buna Kristu Mukweendeenda eelyo balasebenzya nzila zyinji zyakweendeenda mukusoleka kukulwaizya bana bana kweendelanya alusyomo lwabo. Kwabo kwini nku UK, bakabeleka ku Ndubaluba kwa myaka iili 23 eelyo balikwete abana 2.

Cibeela 5



Ba Jon Paul Witt mbobakapanga Dignity alimwi bakabeleka acikombelo mu zyisi zyinji. Mbantu bayeeya, bataanzi, bavwangeli alimwi mbasikutola mulumbe. Ba Jon bakwete ba Judith eelyo bajisi bana 3. Bakkala akati ka Zambia a UK. Kuyandisisya kwa ba Jon nkwakubona bantu kabazyiba Jesu eelyo kutegwa cilete kucinca muzyooko zyabo.

Zyibeela 1 a 10

Zyili Moomu

Bwakubelesya bbuku eeli.....	1
Kulela kabotu bana notuli ku Tubunga twa Buumi	7
1: Leza mbuli Cooko	8
2: Cooko ca Leza - Cikombelo	18
3: Zyipecto nzi Zyangu?	28
4: Inga ndabelesya buti Zyipecto zyangu?	38
5: Kusyoma a Lusyomo	48
6: Nkondo ya ku Muuya	62
7: Kupailila Cooko cesu	78
8: Kamboni – nkaambo Nzi alimwi mu Buti?	88
9: Kamuya Mukaambile Bamwi	98
10: Bululami	110
11: Kuleta Bululami	122
12: Kugwasyilizya Bamwi Kukomena	134
13: Cibeela ca Bufwaafwi	146

Bwakubelesya bbuku eeli

Eeli bbuku libambilidwe kubelesyegwa mu njiisyo zya mutubunga. Pele alikke mweendelezi wa ciyo ngoweede kuba abbuku eeli. Mweelede kumanizya cibeela acimwi mu muwoola lyomwe kusika kuli obile. Kuti na mwayanda kwiindilizya, nkokuti inga lyoonse kamumanizya cibeela comwe mumvwiki zyobile.

Casyomwa kuti bantu babala bbuku eeli bakabala kale ***Matalikilo1: Buumi Bwatalika*** alimwi a ***Matalikilo 2: Buumi Bulakula***. Eeci caambilizya kuti iimwi mizeezo taipandulwidwe alimwi mubbuku eeli. Kuti kakuli bantu basangana kabunga kenu mba Kristu bapya muya kuyandika kulanganya mizeezo iimwi kuzwa ku mabbuku aali kunze antoomwe. Iimwi nzila ya kucita ceeci nkutalika kabunga kambi kakubala. Bbuku Iya Dignity Iya ***Syanga*** inga lyagwasya muli ceeci.

Bwakusolwedela ciyo

Nciyandisi kubona masimpe kuti bantu boonse batola lubazu mu njiisyo. Takuli biyo kuya bubala akupa malailile pe. Tusyoma kuti umwi aumwi muntu ulijisi bwiindene mbwakonzya kutola lubazu alimwi Leza ulatuuyisya kwiinda muli baabo bali munsu lyesu. Muli kaako, zyiyo ziyilembedwe munzila yakuti bantu boonse bayakuyandika kutola lubazu. kuli zyamumutwe, mibuzyo, tusobano, twaano amibandi iya kuyanda muntu oonse kutola lubazu.

Mbuli musololi wa kabunga mweelede kutalisya mubandi akubona kuti mubandi weendelezya mucimo ceelede, pesi tamweelede kucita zyoonse lwenu.

Mweelede kukulwaizya bantu bafwa nsoni abaumwine kuti basole kunana ciindi nobakonzya. Mweelede kukulwaizya bantu basicoongo abankanwe kuti bape ciindi kuli bamwi kutegwa abalo bape mizeezo yabo.

Ncomuyandika mucibeela coonse

Zyibeela zyibambidwe kuba zyuubauba akutayanda zyibelesyo zyinji.

Muyakuyanda:

- Bbuku eeli ku mweendelezi wa ciiyo
- Ibbaibbele (cilagwasya kuti bantu basyoonto buyo bakonzya kuleta ma Bbaibbele abalo, pesi tacili ciyandisi)
- Zyilembyo amapepa, ziyvwula kubelesyegwa muzyakucita. Mukulwaizye bantu kuzyileta kuzwa ku maanda aabo.

Nakuli cimbi ciyandika, ciya kulibonya ku matalikilo aciiyo nacyandikila nzi. mweelede kulibambila zyintu eenzyi mucindi.

Zyitondezyo zya kumugwasya

Kumugwasilizya kweendelezya zyiyo twabikkilizya zyitondezyo zyakumwaambila cakucita ku cibeela acimwi. Zyitondezyo zyilitondezyedwe anselelo abupanduluzi bwazyo. Ono amujane ciindi cakuzyiba citondezyo acimwi ncocaamba eelyo mwiinde muziyo zyisyoonto mpoona mubone mbozyibelesyegwa. Eeci ciya kuubyaubya mulimo nomweendelezya ciiyo.



Kulibambila

Mukubonenesya kuti acimwi ciiyo ceenda kabotu kabotu kuli tuntu tutasyupi tomweelede kucita mukulibambila. Eezi ziyatikizya kubonenesya kuti mwajanina limwi zyintu ziyandika ku ciiyo akubikka beendelezi basikulyaaba antoomwe kamutaninga swaana. Mweelede kuzyilanga kwacaala mazuba masyoonto akuswaana kutegwa mube aciindi cakucita ceelede kucitwa.



Muzeezo

Acimwi cibeela citalika amuzeezo. Eeci nceci mutondezya ncomweelede kuyiisya kabunga alimwi aceeco boonse

ncobeelede kuzyiba bamanizya ciiyo. Mweelede kubikka mizeezo eeyi lyoonse mumutwe akulibuzya namulakkwanisya kugwasya bantu kwiizyiba. Ncibotu kotalisya kwaabila kabunga eeci.



Cipeto Camumutwe

Muntu oonse aiye cipeto camumutwe alimwi akonzye kucaamba kusikila ku masimpilo aciiyo. Mweelede kubayiisya kwiinda mukubalisya cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale tubeela tusoonto, mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi kusola kwiindulula muli lwabo.



Caano

Twaano ninzila mbotu ya kotalisya ziiyo akwiiya cimwi cinyenzi. Boonse balakondwa kuteelela twaano alimwi ncubauba kuyeeya! Mwaambila kabunga twaano, mweelede kubona kuti mwatuswaanganya ku buumi kwiinda mukubaa mambonwa. Kuti kakuli omwe mukabunga kenu ucizyi kwaana inga cabota kumulomba kuti aane twaano. Mweelede kumwambilila limwi ciiyo kacitana sika kutegwa alibambile.



Luzyibo lwa mu Bbaibbele

Acimwi ciiyo cilijisi cibalo cakubala comwe kuzwa mu Bbaibbele, zymwi ziyijisi zyinji. Kuti mukabunga kenu kakuli bantu bacizyi kapati kubala inga mwabalomba bamubalila. Mweelede kubaambilila limwi kutegwa balibambila na baamba kuti tabayandi. Muyeeye kuti bamwi bantu tabacizyi kubala aboobo kubalombela kumpela lya bantu kuti babale mpoona bakaka inga kwaba kbasampula.



Kukanana

Kuli zyimwi zyibeela zyelela kubalisya kuzwa mubbuku. Nomwiinda muli zyeenzyi mweelede kwiima-ima ciindi aciindi, kapati kwamana twaambo tupati-pati, mubabuzye bantu nabamvwa ncomwaamba. Natibamvwa, mweelede kwinduluka cibeela na kubandika cimwi cintu kutegwa mubagwasye kumvwa.



Kubandika na Mibuzyo

Kwiingula mibuzyo akubandika zyintu cigwasya bantu kwiiya akuzyiba cintu muli lwabo beni. Eeci cilabagwasya kuciyeeya eeco cintu. Mwabona citondezyo ca mubuzyo nciyandisi kubuzya kabunga mubuzyo akukulwaizya bamwi baine indene basyoonto kuti bape bwiinguzi. Aabona mibuzyo nja mibandi mutubunga tuniini. Kuti na ciiyo cimwaambila kucita boobo, mweelede kwabanya bantu mutubunga twa bantu 3 na 4 eelyo mubape ciindi cakubandika mubuzyo. Mbunga yaboola antoonwe mupe ciindi kukabunga akamwi kuti kape kaambo na twaambo tobilo tupati-pati tobabandika.

Na kuli mibuzyo minji naaba mikonzyanyo ya mu Bbaibbele njomuyanda mukulwaizye muntu mukabunga akamwi kuti aifotole mibuzyo kubelesya luwaile lwakwe na kamulibambilila limwi kwiinda mukwiilemba mutupepa tunji.



Cakucita

Bantu balaiya kwiinda mukaba amambonwa alimwi akucita cimwi. Zyakucita zyilagwasya kuti eeci cicitike. Mweelede kusanganya muntu oonse muli zyakucita akukulwaizya kucita mambonwa nobacita cakucita!



Mupailo

Eeco Leza ncaamba ku bantu cacigaminina nciyandisi kapati. Tuyanda kukulwaizya kabunga kenu kuti kakapaila akupaililana nocakonzyeke. Kufwumbwa mwabona citondezwo eeci mweelede kwaambila bantu kuti bapaile. Kuli nzila zynji zyakupaila zyibesyesyede mubbuku eeli lyoonse. Aabona kabunga kalalombwa kupailila aamwi, aabona mutubunga tuniini alimwi aabona bobile-bobile. Aabona bantu baambilwa koompolola kuli Leza alimwi muzyiindi zymwi bantu balombwa kupaila mukawiiwi. Nciyandisi kubona kuti mwasiya ciindi cinji cakupaila akukulwaizya bantu kuteelele caamba Leza.



Cakucita iino mvwiki

Aimwi mvwiki ilijisi mulimo wa kucitila ku ng'anda. Mweelede kupandulula kabotu kabotu kutegwa bantu bakonzye kumvwa alimwi mpoona mukulwaizye bantu kucita eeci iino mvwiki. Kumatalikilo aciyo coonse, mweelede kupa bantu ciindi cakupa bwiinguzi nabakaubeleka mulimo ngobakapedwe.



Kamboni

Nciyandisi kutondezwa luyando lwa Jesu kuli baabo batuzungulukide. Inga twacita ooku munzila zynji zyiindene. Acimwi ciiyo citupa muzeezo wa mbotunga twacita eeci. Mweelede kupandulula kabotu kukabunga akukulwaizya boonse kucita milimo eeyi mu mvwiki. Mbuli mbotutondezwa luyando lwa Jesu kuli baabo batuzungulukide tusyoma kuti Jesu uyakucinca maumi akuleta lwaanguluko. Inga cabota kukulwaizya bamukabunga kuba abulembo bwa bantu mbobakanana limwi mbuli lubazu lwa milimo eeyi akubakulwaizya kubapailila.

5
tuvwalu-
vwalu

Bweende bwa ciindi

Mumasena aamwi twabikkilizya amuzeezo wabulamfwu bwa ciindi ca cakucita na ca mubandi mbuyelede kulampa. Eeci ciya kumugwasya kweendelezya ciyo muciiindi ceelede.

Zyibalo zyamu Bbaibbele amikonzyanyo

Mwabona zyina anambala kazyengeledwe mbuli boobu

Intembauzyo 1:4-6 cimumondezya cibalo kuti cizwa mu Bbaibbele.

Eeci lwaco caamba kuti mweelede kubala bbuku lya Ntembauzyo, cipati ca 1 cisyoonoto zya 4 kusikila ku 6.

Kulela kabotu bana notuli ku Tubunga twa Buumi

Antoomwe twakabamba milawo myubauba kutegwa bana besu batabi muntenda nokuba kuti bali ang'anda na ku Kabunga ka Buumi. Eeyi milawo mibotu kwiibelesya aku zyibeela zymwi zya buumi. Nokuba kuti tulabeleka mumyuunda yesu, ku cikombelo naaba notuli abeenzuma, Leza uyandisya kubona kuti bana besu bali kabotu.



Muntu oonse uuba ku kabunga abone kuti bana bakwe bali kabotu ku ng'anda alimwi balangwa aa muntu usyomeka naaba kubaletelezya bana babo.



Basololi batubunga bayeezye bantu ba mutubunga kubonenesya kuti bana babo bali kabotu ku ng'anda alimwi balangwa aa muntu usyomeka eelyo balitambwidwe kukabunga.



Kufwumbwa ooyo mukabunga ubeleka aa bana atabeleki alike pele aumwi na bobile bantu. Na mbobile bantu, tabeelede kuzwa ku mukwasyi omwe. (Beelede kuzwa ku mikwasyi iindene.)



Aabo babeleka aa bana mukabunga beelede kuti bakali kuvwula kusika ku kabunga antela kwa myezi yotatwe.



Basololi batubunga abantu bamu tubunga tabeelede kufotola bana ciindi nobali mumilimo ya Tubunga twa Buumi.



Kuti na bana kabaabana cakulya ku miswaangano ya tubunga, mubone kuti cili kabotu kulya.



Batubunga baswaya mikwasyi muzyooko abaunke bobile-bobile, mukonzyanyo baalumi 2 baswaye mwaalumi na bamakaintu 2 baswaye mukaintu.

1

Leza mbuli Cooko



'Swiilila, O Israyeli, Jehova ngu-
Leza wesu, Jehova ngumwi.'

Deuteronomo 6:4



Kulibambila

Ncomuyandika mucibeela eeci:

- Kagubbu katakwe cili coonse, kabalangana, musinza wakuvwela, meenda akunywa ankomeki ya muntu omwe – omwe mukabunga.
- Cilembyo a pepa

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula

Mutambule bantu boonse mukabunga akubalumba kuti baboola. Kuti kakuli beenzu basangana mutalike kwaambila muntu oonse zyina lyenu akubabuzya boonse baambe mazyina aabo ku kabunga. Mupandulule citi tobele ku kabunga.

Mupe mupailo mufwaafwi, wakulumba.



Muzeezo

Muzeezo wa cibeela eeci iino mvwiki ngwa kuzyiba kuti Leza lwakwe ulapona mucooko ca luyando. Nokuba kuti ngu Leza omwe, ulalitondezya mubantu botatwe: Usyi, Mwana alimwi a Muuya Usalala. Balaabana bube, kupona akubelekela antoomwe muluyando, mbotweelede kucita andiswe.



5

tuvwalu-
vwalu

Cipeto

Mubalisye cipeto camumutwe alimwi amukonzanyo wamu Bbaibbele ku kabunga. Mwamana alimwi mucibale mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zyilamfu kabunga zyokati tobelezye kusikila

limwi boonse bacizyibe lwabo. Mukulwaizye bamwi bantu kusola kwiindulula muli lwabo.

Swiilila, O Israyeli, Jehova ngu-Leza wesu, Jehova ngumwi.

Deuteronomo 6:4



Caano

Mubale caano citobela ku kabunga:

Faith (Lusyomo) ukkala ku Kkomba lya Okavango kunyika lya Botswana. Ukkala mumunzi mumuseenga, mukkombamba lya lusuko. Munzi wakwe ngumwi wa minzi izyizyilwe mucooko, oomo mwalo bantu bazwa kule mobakeenda kuya kukkala. Busena oobu bulujisi mebeebe manji eelyo bantu balazundana kujana ncito mumaanda abeenzu manji aliko.

Eeci caamba kuti munzi wa Faith taucili mbowakabede. Wakali mbuli wakuti inga wazyiba muntu kuzwa ku mazyalane. Bantu bakali kukkala mubusena bomwe mubuumi bwabo boonse. Aano mazuba aaka takacili nkokaambo. Bantu balanjala akuzwa kweendelanya ancito zyabo, bamwi bali jisi amaanda kumbi. Bantu tabazyibene alimwi tabakkali antoomwe mbuli mbobakali kucita. Eeci caamba kuti na uumwi ulaa penzi, kanji-kanji bantu inga tabazyi. Kwiina ugwasya. Kwiina kujatizyanya naaba muzeezo wa cooko mbuli mbocakabede.

Buzuba buusizya bwakacitika mumunzi. Brenda a Lewis bakali kwetene kwa myaka minji. Mukubula coolwe, Lewis cakamulyata cimbayambaya kali munzila kuya ku musyika. Wakafwa mpoona – mpoona, wakasiya muka mufwu abana bosanwe kabalipengela. Buumba bwakamuzunda Brenda. Takacikonzya kucitambula kusweekelwa Lewis amakatazyo akamuboolela. Bweende

bweende bana bakaleka kuya ku cikolo, aabona tibakali kulya eelyo Brenda takali kunonwa – bonwa.

Faith eeci cakamukopa. Kali mu Kristu lyoonse alimwi uuzi kuti cooko nciyandisi. Wakayeeya mbuli bantu mbobakamugwassiyide kaindi. Nokuba kuti takali kuzyiba kabotu, wakalizyi kuti cooko nciyandisi kapati kuli Leza. Cakali cibotu kwiima antoomwe akugwasyanya. Aceeco mumutwe Faith wakayeeya kuti agwasye. Wakatalika kuswaya muntu oonse ngwakazyi mumunzi akwaamba mbuli zyintu mbozyakali kucinca alimwi ambuli Brenda mbwakali kuyandika lugwasyo. Boonse mbakabandika limwi bakazumina kubelekela antoomwe akuti cakali ciyandisi kugwasya moceelede. Nokuba kuti Faith takali kukonzya kulicitila zynji, oonse bakatalika kubelekela aamwi kutegwa Brenda abana bakwe bagwasyigwe. Bakamuswaya, bakapa mali acikolo alimwi akumusanganya mumaumi aabo. Bana bakwe bakatalika kumweta-mweta alimwi, bakakkomana alimwi bakaba akulanga kumbele. Brenda wakalibonya mumunzi akulimvwa kuba alubazu mucooko. Coonse eeci cakacitwa kuli Faith akaambo ka moyo wakwe wa cooko.



2

tuvwalu-
vwalu



Mubuzye kabunga cakali kukonzya kucitika kuti Faith natakacita cili coonse?

Luzyibo lwa mu Bbaibbele

Cipeto ca mumutwe nciyandisi kapati kuli ndiswe kuti tuyeeye Leza mucooko eelyo ancocaamba kuli ndiswe tobana Kristu. Inga mwabuzya, “Ino cipeto cakuti Leza muntu buyo omwe inga caamba nzi ku cooko?”

Eecici cipeto cizwa ku Cibalusyoncipeto cizyibidwe ku lusyomo lwa ba Juda, lusyomo oolo lwalo bana Kristu ndobajisi. Ndiuji lya koongolola, mulumbe ku cisi ca Izilayeli kulanganya kuti ino Leza nguni. Nkaambo kaako majwi mataanzi mucipeto alati, “Mvwa, O Izilayeli”. Mu zyibeela zyicilila zya cipeto mocindilizya kukondelezya.

‘Mwami wesu Leza’ caamba mbweena mbocibede. Zyina lya Leza mucu Juda lyakali Yahweh eelyo lyasimpidwe muzyina lya Leza lwakwe mwini ‘Ndime’ (Kulonga 3:14). Cipeto ca sunu ca mumutwe caamba kuti Yahweh ngu Leza, Leza omwe, Leza wesu alikke.

Ino eeci cijisi lubazu nzi ku cooko? Cibeela ca cipeto citobela citwaambila boobu.

‘Leza ngumwi.’ Bbala lya ‘omwe’ mucipeto eeci talikonzyi alimwi talilangilwi kwaamba muntu omwe. Bbala lya ‘omwe’ lipandulwidwe kuzwa ku bbala lya ci Hebrayo lya kuti ‘echad’, lyaamba kuti kuswaangana mumuzeezo, mumaano na mumuzumino. Mukonzyanyo, inga caba mbuli kuti bantu boonse mumunzi wenu na mucooko bazumina kaambo komwe akuti, ‘Tuli bomwe’.

Cipeto cesu ca mumutwe ncocaamba, ‘Mvwa, O Izilayeli, Mwami Leza wenu ngu Leza omwe, Mwami Leza wenu ukkala mucooko ca bantu baina kuli omwe.’

Eeco inga kacisyupa kumvwa. Inga kakuli mwakamvwa kale kuti Botatwe – Leza Taata, Mwana a Muuya Usalala –ambweni kale mu **Matalikilo**, naaba kumbi buyo. Mboobu mbocibeleka. Leza ukkala mucooko ca Taata, Mwana a Muuya Usalala.

Cikondelezya kapati nca kuti ulatwiita kuti tube alubazu mucooko eeci. Mbuli bantu bakwe tuli jisi lubazu mucooko ca Leza alimwi twatambwa kuba aawe. Mbuli mbotutambula buumi oobu bupya akusangana cooko eeci, oobu buumi muli ndiswe mpoona bubeleka kubamba zyoolwe kuli bamwi abalo kutegwa basangane.



5

tuvwalu-
vwalu

Cakucita

Ku cakucita eecimuyakuyandika kabbodela katakwe cili coonse, kabalangana, musinza wakuvwela, meenda akunywa ankomeki ya muntu omwe – omwe mukabunga.

Eeci cakucita cigwasyilizya bantu kumvwa mbuli cooko ca Leza mbocili munsu-munsu lyesu.

- Mubweze bbodela katakwe cili coonse amusinza wa kunywa. Kumbele lya muntu oonse mutile uumwi musinza mu kabbodela. (Mutile musinza munji kutegwa eelyo wavwelwa ameenda ukonzyeke kunyugwa.)
- Mubuzye bantu boonse nabacikonzya kuubona musinza.
- Lino muzuzye kabbodela koonse meenda. Mucuke kabbodela aaka kumbele lya bantu boonse kutegwa bazyibe kuti musinza wasangana ameenda.
- Mupe bbodela lizinguluke ku kabunga koonse, mubabuzye na inga baabona meenda mpatalikila akusimpila, alimwi amusinza mpoubede. (Bwiinguzi mbwa kuti tabakonzyi kucibona eeci.)
- Mutilile aumwi musinza uvweledwe mpoona mubuzye na umvwika buti. Baya kwaamba zyintu mbuli, ‘kulweela’, ‘kubota’ na ‘ncibotu’.

- Mupandulule kuti eelyo bantu bali mucooko nobaswenana cakuti tabakonzyi kwaabona matalikilo amasimpilo, eeco cimvwika kabotu ku muntu oonse.

Oobo mbocibede cooko ca Leza. Cooko cesu ceelede kuba mbubwena. Tuya kubala zyibalo zya mu Bbaibbele zyipandulula ceeci kuli ndiswe.



Mubale Ba-Roma 12:4-5 a Incito 2:42-47 ku kabunga:

⁴Nkaambo mbuli mbutujisi zizo zinji mumubili omwe, alimwi zizo zyoonse tazijisi mulimo omwe, ⁵mbubonya obo swebo, notuli banji, tuli mubili omwe muli-Kristo, toonse tuli zizonyina umwi aumwi mukwesu.

Ba-Roma 12:4-5

⁴²Balo bakacilisungweede mukwiisya kwabaapostolo, amukuswaana muuya, amukukomona mukamu, amukukomba.

⁴³Bantu boonse bakasikilwa kuyoowa. Malele azitondezyo zinjizinja ziyakacitwa baapostolo. ⁴⁴Boonse basyomi bakali antoomwe, basanganya zyoonse nzobali kujisi, ⁴⁵bauzya lubono lwabo ezintu zyabo, baabana boonse mbuli kubula kwaumwi umwi. ⁴⁶Mazuba oonse bakali kusungweede amoyo omwe muntempele, akukomona mukamu mumaanda aabo, balya zilyo zyabo akubotelwa amyoyo iituba, ⁴⁷balalumba Leza akukonda bantu boonse, Mazuba amazuba Mwami wakabayungilila abo abali kufutulwa.

Incito 2:42-47



15
tuvwalu-
vwalu

Kubandika

Eeyi mibuzyo ibambilidwe kumugwasya kuti mumvwe ziyibalo akuzyiba ncozyaamba ku cooko cesu. Muzandule bantu boonse babe mutubunga twa bantu 3 na 4 kutegwa babandike akupa bwiinguzi kuli boonse. Inga kamuya kupa kabunga akamwi mubuzyo wiindene

- Mwelede kuswenana buti amuntu kutegwa bantu bali kunze bamwiite kuti muli ‘bamwi’? Ino eeco caamba nzi ku cooko cesu?
- Inga twakkala buti antoomwe mbuli bomwe?
- Ncinzi cilesya bantu kukkala mucooko? Inga twacizunda buti eeci?
- Nguni muyandisi kapati mucooko?
- Nkaambo nzi ncotutasanganyi muntu oonse mucooko cesu ca bantu ba Leza?

Mupe ciindi ku kabunga akamwi kape mizeezo yako. Ooyu mubandi mubotu kapati. Mwiite boonse baboole antoomwe. Mubale Incito 2:46-47alimwi akubandika mibuzyo eeyi mbuli kabunga koonse:

- Sena mulayeeya kuti inga twasanganya ababaya batasyomi na aabo balo bakazya Leza mucooko cesu?
- Nkaambo nzi ncomuyeeya boobu?

Tuya kulanganya mubuzyo ooyu munzila zyiimpene mubbuku lyoonse eeli.



15

tuvwalu-
vwalu

Mupailo

Twalanga kale kaambo kakuti Leza ngumwi, kutali mbuli muntu omwe, pele mbuli cooko ca Taata, Mwana a Muuya Usalala.

Twaiya kuti cooko cesu ca cikombelo ceelede kuba mbubwena.

Antoomwe mbuli kabunga, mutalike kulumbaizya Leza kuti watusanganya mucooko cakwe. Mumukombe kuti wakatufwutula eelyo ono twiima anguwe abamwi mubwami bwakwe. Mutonkomanye kuti eeci tacijatikizyi nguzu zya uumwi. Inga mwaimba lwiimbo antoomwe na kupa kulumba kuli Leza.

Lino kwiinda mumupailo tuya kuzumina kuti tatuponi munzila eeyo njatubambilide Leza na kucita mbuli mbwa twaambila. Notwalanga cikombelo cesu azyimwi zykombelo zytuzingulukide, tulakonzya kubona lwandaano akukazyanya. Lwandaano inga kaluli akati ka bantu, mikwasyi na zykombelo mbozyizulwa. Mbuli mukwasyi wa Leza, tatuponeni mucooko.

Mwaambile kabunga kaimikile eelyo akujatana maanza kumbele lyabo. Mupaile mupailo mubauba kuli Leza kuti aswaanganye maano aabo akuleta lwandaano luli loonse mucooko cakwe luponezyegwe. Muzumizye ciindi ca kawiiwi kuti bantu balindile kumvwa kuli Leza.

Mwaambile bantubajokele kutubunga twabo tusyooonto mpoona baambe eeco Leza ncabandika kuli mbabo na kabangulukide kucita boobo. Mube aciindi cakupailila zyiindi Leza zyaleta ku mizeezo. Inga kamuya kwelela kulilekelela kuli Leza. Inga kamuya kuyandika kupailila kuponezyegwa, lulekelelo a lukamantano.

Muleta kabunga antoomwe mpoona mumanizye kwiinduluka
cipeto ca mumutwe antoomwe kwiinda mukulumba Leza kuti
ngu Leza wa cooko.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki,
mubone kuti bantu baba aciindi antoomwe aba mutubunga
tumwi kuzumanana kupaila akutola lubazu mukuyaka
lukamantano acooko mumukwasyi wa Leza.

Eelyo mwaswangana, mwibalusyanye zyiindi zynomwapailila.
Mupaile alimwi antoomwe. Mpoona mubandike antaamu
njomweelede kutola lubazu amipailo eeyo. Sena kuli uumwi
ngomweelede kulilekelela? Sena kuli uumwi ngomweelede
kulekelela? Sena kuli mcikombelo ncomweelede kuleka kulwana
eelyo akutalika kubelekela aamwi?

Mupaile antoomwe akulipa kuya kutola lubazu ambweni muli
lwenu na antoomwe, kufwumbwa eeco cikonyeka.



Kamboni

Bumboni bwesu iino mvwiki buya kuba bwa kutola lubazu
mukuponya lwandaano luli mumukwasyi wa Leza. Kufwumbwa
eeco ncomwali kupailila akukanza kucita mutubunga twenu,
muzwide ambele akuya kuciccita. Muyeeye kupaila eelyo nomuya
kuunka, kukanana ca luyando aluziyalo akulangisisya mbuli Leza
mbwali cooko akututamba kuba cooko cakwe abamwi
batuzungulukide.

Cooko ca Leza - Cikombelo



'Nobakazubusya maato kunkomwe,
bakasiya zyoonse, bamuccilila.'

Luka 5:11



Kulibambila

Ncomuyandika mucibeela eeci:

- Kanyandi, cisuwo na mutiba, pepa azyilembyo.

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitikilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kwiiya cooko ca Leza ca bantu, ciitwa kuti cikombelo. Cikombelo, (aabona ciitwa kuti Mubili wa Kristu) ncoko ca luynado cibambilidwe kutondezya kasimpe ka Leza, luyando aluse ku nyika izungulukide.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Nobakazubusya maato kunkomwe, bakasiya zyoonse,
bamuccilila.*

Luka 5:11



Caano

Mubale caano citobela ku kabunga:

Jane wakali mooye uuli bonya kuusa alimwi kajisi makatazyo aanseba, mukwasyi wakwe antoomwe abulongwe. Wakali jisi ncito pesi basimalelo aakwe bakali bakali alimwi tibakali kuzyiba ncatakali kukonzya kubela cakubinda akaambo kanseba yatakali kabotu. Buce buce Jane wakasweekelwa ncito eelyo wakatali kulombelela mali kutegwa apone.

Buumi bwakatalika kuya bumuyumina Jane. Muciindi eeco nokuba boobo, wakabona kabunga ka bantu bakali kuswaangana mucaanda ca mucooko muni muni ang'anda yakwe mu Nsondo. Bakali kumwaanzya akumumwetwila ca bulongwe eeco calo cakali kumukonda.

Bumwi buzuba, muntu wakali kunjila mumuswangano wakamubona Jane akumulomba kuti anjile mukati balide aamwi. Jane yakali mujisi nzala eelyo wakayeeya kuti ooyu muzeezo mubotu. Wakalya antoomwe akabunga mpoona bakatalika kumwaambila kuti bakali lubazu lwa cikombelo cimwi ca mucooko. Bakali kuboola antoomwe kwabana cakulya, twaano twa zyintu Leza zyakali kubacitila mumaumi aabo eelyo akupaililana antoomwe abasimukobonyina.

Jane wakatalika kunjila miswangano cakutobelanya. Wakajana kuti kabunga kakaliziye bantu bakali kukonzya kumugwasya munkongole zyakali kuvwuzanyanya, bakali kumugwasylizya kujana ncito alimwi cipati ncakuti bakali kulibonya kumubikkila maano,

akuyandisya kumuzyiba. Bakali kuba aciindi cakwiinzya anguwe akuba balongwe, eeco cintu calo catakali kuvwula kumucitikila. Kamwi kabunga kakapandulula kuti bakali kuswaangana akwabana maumi aabo antoomwenkaambo bakabona buumi bupya muli Leza eelyo bakali kuyanda kwabila lulangilo oolu ku balongwe abasimukobonyina. Buca buca Jane awalo wakapa buumi bwakwe kuli Leza akusangana cikombelo; wakatalika kumvwa bube bwa Leza kabusandula buumi bwakwe. Ticakali cubauba – micito ya kaindi abantu mbakazyi bakazumanana kumuletela mapenzi – pesi buumi bwakwe bwakali kuya bucincwa asyoonto asyoonto a Leza, kubeleka mucooko cakwe, cikombelo.



Luzyibo lwa mu Bbaibbele

Mubale Mateo 4:18-22 ku kabunga:

¹⁸ Nkabela naakali kweenda kumbali lyalwizi lwaku-Galilaya wakabona babunyina bobile, Simoni uutegwa Petro, amwanike wakwe Andreyo, bakali mukuwaala lusabwe mumaanzi, nkaambo kabali bazubi. ¹⁹Nkabela wakabaambila kuti, Amunditobele, nkamucite basikuzuba bantu. ²⁰Mpawo bakasia insabwe zyabo, bakamutobela. ²¹Lino kuzwa oko wakaya kunembo, wakabona bamwi babunyina bobile, Jakobo mwanaakwe Zebedayo, a-Johane mwanike wakwe, kabali mubwaato awisaabo Zebedayo, bakali mukusuma insabwe zyabo, elyo wakabaita. ²²Mpawo bakasia bwaato awisaabo, bakamutobela.



Ndipati buti penzi ndyobakabona basiciiya ba Jesu bataanzi! Wabaambila kuti basiye zyoonse akumuccilila. Waunka ku tubunga ootu tusyoonto twa mikwasyi abalongwe akuti, ‘Lino

muya kubelekela ndime. Pesi tamukonzyi kundibelekela alimwi akulibelekela. Mweelede kundibikka kumbele alwiito lwangu.’ Ooku kwakali kulyaaba kupati, kusiya maumi aabo. Aabona Jesu ulaita bantu kuti bacite oobu mbweena, kuti basiye zyoonse zyoobacita kutegwa bamutobele. Muzyimwi zyiindi utwaambila buyo kuti tumubikke kumbele lya zyoonse zyoobacita, kutubelesya kuti tumubelekele akumulemeka mpotubede.

Jesu wabweza mulimo wabo ngobakali kucita buzuba abuzuba (kuzela nswi) akuubelesya kucita ceeco ncakali kuyanda kuti bacite. Wakati, ‘ndiya kubelesya luziyibo azyipego zyomujisi kale, pele kutali kuzela nswi, ndiyanda kuti mubelekele aamwi kundizelela bantu.’ Ubelesya baabo bajisi kale luziyibo mubuumi bwako bupya kuti basike kuli bamwi akumwaya buumi bupya kuli bamwi.

Jesu kwiina nakatalisya kuyaka zykombelo. Takatalisya kuyaka maanda. Wakatalisya kwiita akubamba basiciya (baccilili), akubayaka mucooko comwe antoomwe, kubayiisya kubamba bamwi basiciya azyooko zyinji walo kali akati. Eeci cakali mbuli cikombelo eciya Jane, mucaano cesu cili ajulu, mwakalijana. Bakamwiita mucooko cabo akwaabana anguwe buumi bupya bwalo mbwakatambwide kuli Leza.

Eelyo bbala lya ‘cikombelo’ lyabelesyegwa mu Bbaibbele taakwe nolyaamba ciyako pele lyaamba kabunga ka bantu baboola antoomwe mumakanze, a Jesu kali akati. Eeco ncikombelo. **Kuti mwabamba basiciya (baccilili) buce buce inga mwajana cikombelo. Pele kuti namwayaka zyiyo, mulalangilwa kubula basiciya ba Jesu.**

Ootu tubunga twa bantu batobela Jesu inga katuli tusyoonto, twa kati – kati na tupati; Kabunga ka Buumi kalakonzya kuba citondezyo ca cikombelo. Ciimo tacili ciyandisi kapati. Ciyandisi kapati ngu Leza, ‘Sena ootu tunyandi ntubotu tulakonzya kujata bantu banji, kubaleta mubulelo bwangu?’ Alimwi buya akuba tunyandi tukonzya kusika akuli bamwi, ootu tubunga twa bantu twakaiya kuti ino Leza nguni: bakali kumukombela aamwi, bakaabana buyumu yumu akukondwa antoomwe akugwasyilizyanya. Bakali cooko cilitilila, lyoonse bakali kubamba zyoolwe zya kutambula bamwi bapya akupa ciindi cabo anguzu zyabo ku bubotu bwaumwi aumwi.

Bazeli bakali katede akulimvwa kuti inga tibaukonzya ooyu mulimo ngo bakeelede kucita. Pesi bakati kuli Jesu, ‘Nkaambo waamba boobo, tuya kucita oobo,’ bakabona maleele! Ambweni ncencico cakapa kuti bamutobele. Tacili cubauba kubikka Leza kumbele akumuccilila, pesi ncencico basiciya bataanzi ncobakasolwa kucita kutegwa babe alubazu mucooko ca Jesu. Bakakkala antoomwe ca bunyina mucooko kwa myaka yotatwe, buzuba amasiku. Bakabona Jesu mbwakali kucita zyintu zyoonse akumwiiya, bakayiiya mbwakali kupona akuyanda.

Sena nomwakasiya zyoonse muni – na kutola buyo nswi ku musyika akukkalilila mpomubede?

Nokwakainda ciindi bakamubona kafwa, wabusyigwa ku buumi akutolwa ku julu, bakayeeya zyiiyo zya buzezi bwa nswi zyakabatondezyede, eelyo bakaunka kuya kuzela bantu.

Mubale Incito 2 (twakabala kabeela ka ceeci mvwiki yakainda) kubona Petro walo wakaalilwa kulijatila nswi, ‘wajata’ bantu

bainda ku 3000 bakaboola kuccilila Jesu eelyo nakakambauka mulumbe mutaanzi!

Kugwasya bantu kujana nzila yakujokela ku luyando lwa Leza kukabe kutamani inga cakamukondelezya kapati kwiinda buzuba tunyandi notwakazula cakuyanda kwanduka.



15

tuvwalu-
vwalu

Kubandika

Mutubunga twa bantu 3 na 4 mubandike mibuzyo itobela:

- Sena kuli cimwi ncomujisi na ncomucita calo cimusinkila kutobela lwiito lwenu kuli Jesu?
- Sena muli lubazu lwa cikombelo? Ino cili buti?
- Sena muyeeya kuti muyandika ciyako kutegwa mwiitwe kuti cikombelo 'cisikene'?
- Muyeeya kuti caamba nzi kwaamba kuti Jesu musololi wa cikombelo? Sena muyeeya basololi ba cikombelo bali mbuli Jesu?

Mujosye kabunga antoomwe eelyo mubonenesye kuti muntu oonse waba aciindi cakupa bwiinguzi bwakwe.



10

tuvwalu-
vwalu

Cakucita

Boonse bayakuyandika cilembyo amapepa.

Mupandulule kuti tuya kuyeeya abantu aabo mbotuzyi kuti tabanasyoma muli Jesu na bali kunze acooko ca cikombelo.

Mubaambile boonse beenge, batendulule acipepa mukonzyanyo wa nswi. Amukonzyanyo wa nswi oonse ngo babamba, mubaambile balembe mazyina abalongwe, bamukwasyi na bantu bamucooko batazyi Jesu eelyo tabana sangana mucooko ca Leza.

Muyeeye bantu mbomubona balendeleledwe na bali mumoombe wa cooko, naaba kutabalwa mucooko.



10

tuvwalu-
vwalu

Mupailo

Mubikke kanyandi, mutiba na bbavwu akati kazyuli.

Mwaambile boonse baimikile kuzinguluka kanyandi, mutiba na bbavwu.

Mwiite muntu omwe omwe aboole akubikka nswi njabamba mukanyandi, mumutiba na mubbavwu. Mbuli mbobabikka nswi mukanyandi, mumutiba na mubbavwu mubabuzye baambe zyina lya bantu ngoiminina. Eelyo eeci nocicitika, mukulwaizye kabunga kakapaila kumwi cakoompolola kutegwa muntu oonse waulikwa aboole azyibe Jesu akuba lubazu mucooko ca Leza.



Cakucita iino mvwiki

Mvwiki amvwiki kuli ncito ya kubelekela ku ng'anda. Lino mvwiki mulombe Leza kuba acoolwe cakwaambila uumwi utaninga muzyiba Jesu caano ca maleele akujata nswi. Mulombe Leza amupe nguzu zya kukonzya kucicita eeci. Mbuli mbomwaamba caano eeci mulombe Leza abambe buumi bupya oobo mbomwakabona kale muli bamwi mbomwakaambila.



Kamboni

Cooko ca Leza cakomenzyegwa kuti toonse tusangane mucikombelo cakwe, cooko cabaabo bamuyanda. Tweelede kucita mbbwena akukomezya cooko kutegwa abaabo batajisi cili coonse anguwe basangane. Beelede kusangana. Mbalongwe besu antoomwe abaabo mbotuba aciindi antoomwe. Kuli baabo balendeleledwe na kutasanganizyigwa mucooko. Kuti titwabaita

mucooko ca Leza, mbubuti bumwi mbobakonzya kuzyiba luyando
acooko ca Leza?

Iino mvwiki, mujane nzila yakuleta aabo bali kunze acooko ca
Leza. Mubaswaye, mubaleleke, mulye ambabo, museke na kulila
antoomwe! Micito yenu matalikilo akutamba bantu mucooko ca
Leza.

Mucite eeci antoomwe.

Bulembo

Zyipego nzi Zyangu?

'Umwi aumwi ulapegwa bulaizi bwa-
Muuya kukugwasya banamaleya.'

1 Ba-Korinto 12:7



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



Kutambula & Bwiinguzi

5
tuvwalu
-vwalu

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitikilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kuzyiba kuti mbuli citondezyo ca buumi bwesu bupya muli Leza Muuya Usalala ulapa umwi aumwi zyipego. Ziyiyandisi kubube bubotu bwa cikombelo coonse antoomwe anyika yoonse ituzingulukide. Ibbaibbele lilatondezya mulongo longo wa zyipego eenzyi, eelyo tuya kulanga nzila mbotunga twazyiba zyipego zytujisi.



Cipeto

5
tuvwalu
-vwalu

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zyilamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Umwi aumwi ulapegwa bulaizi bwa-Muuya kukugwasya
banamaleya.*

1 Ba-Korinto



Caano

Mubale caano citobela ku kabunga. Cakalembwa a Michael walo, antoomwe amukwasyi wakwe, ulanjila cikombelo cijisi bantu basika ku 100 bazyiimo zyoonse mudolopo lisoonto okuya ku Nyika kwa England.

Kwa mwaka omwe wakainda twakalimvwa kuti Leza wakatulomba kuti tulanganye bulaizi bwa Muuya. Eelyo twakazyisoma zyipego eenzyi mumilumbe ya mu Nsondo, alimwi amukusoma Bbaibbele mutubunga twakaswaangana mukati ka mvwiki mumaanda eesu.

Twakajana kuti nciyandisi kuli yeezya, na kwiiya citaanzi, zyipego eenzyi kuti zynzi (busongo, luziyibo, lusyomo, kuponezyegwa, kukanana mumilaka, cisyinsyimi, kwandaanya antoomwe anguzu zya maleele), ncinzi ncozyitambwidwa (kweendelezya cikombelo acooko coonse), mulimo wa cipego acimwi, ambotuzyibesya kabotu.

Twakaba aciindi cakulanganya cipego aumwi ncajisi kale. Twakacita oobu kwiinda mukulilingula alimwi akubuzya baabo bali muni muni lyesu kuti baambe ncobabwene muli ndiswe. Twakaambaula alimwi kujatikizya zyipego zyili muli ndiswe pesi tatuzyibesya, zyitaninga zyibwa na kwiindwamo. Toonse twakapaila kuli Leza kuti atutondezye zyipego zytujisi kale eelyo akutupa azyimwi zyatujisili. Nokwakainda myezi twakatalika kuzyibelekelala zyipego eenzyi mucikombelo.

Akaambo kaako, uumwi mooye wakali kubeleka acikolo akusolwedela kabunga kakukomba kwesu wakakulwaizyigwa

kubelekela cipego cakwe ca kukambauka akuyiisya. Kwa lino ulavwula kutuyiisya akutukambaukila ca nguzu jwi Iya Leza. Uumwi mwaalumi walo wakajisi luziyibo Iwa zylimba pesi katalubelesyi wakasangana kabunga kabukombi eelyo ulakasololela munzila mpya alimwi mbotu. Boonse bacileleka cikombelo.

Aumwi mooye wakali kulimvwa kukatala akutyompo kutola lubazu mu kabunga kakukomba wakaleka kutegwa atalike kabunga kapya kakwiiya Bbaibbele. Eeci casika ku bantu banji, bana bukwetene amikwasyi yatakali kulimvwa kusangana mucikombelo eelyo bakajosyegwa lino. Aboobo inga twabona mulimo wa bulaizi bwa ku Muuya kabuleleka bamwi bali mucikombelo aanze antoomwe.

Kutegwa tuzyibe akubelesya kabotu zyipego zyesu kuli leza, tweeledede kuba basiluyando, basyomeka, balyaaba akuyandisisya kulipa kububelesi bwa Leza ku bulumbu bwa mubili wakwe, acooko coonse mbocizulwa.



Luziyibo Iwa mu Bbaibbele

Mubale 1 Ba- Korinto 12:1-11 ku kabunga:

¹Lino kumakani aazipego zya-Muuya, nubakwesu, nsiyandi kuti mutabi aluzibo. ²Mulizi kuti, ciindi ncimwakacili bahedeni kufumbwa nkumwakeenzegwa, ziyanza zyanu zyakali kumweenzya lyoonse kumituni iitaambi. ³Lino ndamuzibya kuti taakwe muntu uuamba muMuuya wa-Leza uukonzya kwaamba kuti Jesu mutuke, alimwi taakwe uukonzya kwaamba kuti Jesu Mwami cita mu-Muuya Uusalala.

⁴Zipego nzezyamisyobo misyobo, pele Muuya ngoumwi luzutu, ⁵Ayalo milimo njeyamisyobo misyobo, pele Mwami ngoumwi luzutu. ⁶Inguzu zibeleka mummyoyo nzezyamisyobo

misyobo, pele Leza ngoumwi luzutu uuzibelezisa zyoonse mubantu boonse.

⁷Umwi aumwi ulapegwa bulaizi bwa-Muuya kukugwasya banamaleya, ⁸Nkaambo umwi ulapegwa kuMuuya ijwi lyabusongo, nkabela umwi ulapegwa ijwi lyaluzibo ku-Muuya oyo nguwenya. ⁹Alimwi umwi, oyo Muuya ulamupa lusyomo, aumwi ulapegwa ku-Muuya nguwenya inguzu zyakuponya. ¹⁰Umwi ulijisi inguzu zyakucitya malele, umwi businsimi, umwi busongo bwakuzibya myuuya, umwi myaambo yamisyobo misyobo, aumwi busongo bwakupandulula myaambo. ¹¹Pele aya oonse, ulaacita oyo Muuya omwe, ulaabila umwi aumwi mbuli mbwayanda.



Toonse tuli lengedwe akuyandwa a Leza, aumwi kajisi micito yandeene, luziyibo aza kucita. Ooyu luziyibo aza kucita zyiyege zyalu zytusolwedela kuyandaula luyandisizo azyoolwe. Antoomwe azyiyege buyo, Leza ulayungizya kuli mzyotukonzya kucita, na kutupa zyiyege zytukonzya kucita, munzila iilibedeledede; eenzyi zytuziyiba kuti zyiyege zya ku muuya.

Zyiyege zya ku muuya zyiyege a Muuya Usalala. Zyimwi zylakkalilila eelyo inga twakomena muli nzyizyo; zyimwi zya ciindi buyo cilimbocibede. Muuya Usalala uyanda kutondezisa bantu kuya kuli Jesu, kutugwasya kuba mbuli Jesu, kuyaka mubili wa Kristo, alimwi akuleleka nyika oomo motukkala. Tazyili buyo zya buntu bwesu. Bubelesi bwa zyiyege zyesu zya ku muuya mbumboni bwa buumi bwa Leza muli ndiswe. Buumi bwa Leza lyoonse buyandaula kubamba buumi muzyilongwe azyooko zyesu.

Sunu tuya kulanganya zyiyege eenzyi mubulamfwu, mbotukonzya kuziyiba zytujisi kale alimwi ambotukonzya kutambula

zyotulangila. Mvwiki iboola tuya kulanganya mbotukonzya kuzyibambilila akuzyibebesya zyipego eenzyi.

Ino zyipego zya ku muuya ninzi?

Mucibalo ca sunu ca mu Bbaibbele zyipego zyiimpene zya ku muuya zyili pedwe. Zyeenzyi:

- Busongo: Kubelesya busongo bwa Leza muzyiindi zyilibedeledede.
- Luziyibo: Kukonzya kweeta kasimpe ku muntu, kabunga na busena kwiina mukubona mumbaakani ya Leza na kwiinda muluzyibo lwa Bbaibbele.
- Lusyomo: Kukonzya kusyoma Leza alimwi akucita malailile aakwe.
- Kuponezyegwa: Kukonzya kuba nzila ya Leza mukujosya bube, mizeezo amuuya wa muntu.
- Nguzu zya maleele: Kukonzya kucita maleele.
- Cisyinsyimi: Kukonzya kuzubulula kasimpe akukakanana muciiindi ceeledekutegwa kazyibwe, kube kubambululwa, kweempwa, na kukulwaizyigwa.
- Kwandaanya mizimo (kwandaanya): Kukonzya kwandaanya kasimpe andubizyo, ciluzi acitaluzi, alimwi njiili mizimo mibotu amibi.
- Kukanana mumilaka iyiindene: Kukonzya kukanana cisyobo ncotayiide mumupailo, ambweni wa nyika na wa kujulu.
- Kupandulula milaka: Kukonzya kupandulula cikananwa amuntu mumilaka.¹

¹Mazyina apedwe kwendelanya aba Bughee, Bruce & Cousins, Don (2005) *The Purpose of Gifts (Muzeezo wa zyipego)* zya Zondervan, mapeji 44-51

Ooyu mulongo buyo omwe wa zyipego zya ku muuya zytujana mu Bbaibbele. Tula langa aamwi masena abandika zyipego zya ku muuya mutubunga twesu lino.



15

tuvwalu
-vwalu

Kubandika

Muzandule bantu babe 3 na 4 mpoona balange cibalo 1 na 2 cili anselelo aawa mukabunga akamwi. Mubone kuti acimwi cibalo cilangwa akabunga komwe.

Mwaambile kabunga akamwi kalange cibalo na zyibalo nzyokapegwa eelyo kajane zyipego zya ku muuya zysisangene. Zyipego zya ku muuya zylilembedwe ansi aawa kutegwa zygwasye bantu kwiingula.

- 1 Ba – Korinto 12:28 (Basiciiya, basyinsyimi, bamayi, bagwasyi, beendelezi)
- Ba – Roma 12:6-8 (Kukulwaizyigwa, kupa, busololi, luse)
- Ba – Efeso 4:11 (Ivangeli, bukambausi)
- 1 Petro 4:9-10 (Bwaabi)
- Kulonga 31:3-5 (Bukutausi)
- 1 Timooti 2:1-2 (Bwiiminizi)
- Ntembauzyo 150:3-5 (Kukanana kwa busongo)

Mupe tuvwalu vwalu tuli 5 kuli umwi aumwi kubeleka mulimo ooyu mpoona boonse baboole antoomwe mukabunga komwe kasyoonto eelyo kuti baambile bamwi zyipego zya ku muuya nzyobajana muzyibalo.

- Mubuzye na kuli uumwi wagambwa na kubotelwa mucipego nociba comwe ncobajana muzyibalo zya mu Bbaibbele.



Ino mbubuti mbotukonzya kuzyiba zyipego zytowapegwa?

Siciya Paulu utwaambila kuti ‘tube aluyandisisyo lwa zyipego zya ku muuya.’ Mbuli bantu balo bakajana buumi bupya muli Leza, tweeledede kuba aluzyibo ku zyipego eenzyi eelyo akulomba Leza kuzyiba zyipego zyalo zyayanda kuti tubelesye mumilimo yakwe.

Kutegwa tuzyibe zyipego zytujisi kale mpoona akuzyibe zymwi zytuyanda, tweeledede kuccilila ntaamu zymwi:

- **Ntaamu 1:** Kupaila akulomba Leza kuti amutondezye zyipego zymujisi na zyalombozya kuti mube azyo. Nguupa zyipego alimwi ulimuzyi kwiinda boonse.
- **Ntaamu 2:** Mulwenu, muyeeye zyipego zya ku muuya zytwaiya sunu. Sena kuli cimwi ncomubona kuti muli cijisi kale eelyo mwakacibelesya? Sena mulayeeya kuti inga kamujisi cipego cimwi pesi kamutaninga buyo cibelesya? Sena mulayeeya kuti inga kamujisi cimwi cipego, pesi kamutazyi?
- **Ntaamu 3:** Mukanane kuli uumwi umuzyi kabotu mbuli wa mukwasyi, wa mu Kabunga ka Buumi na musololi nwa cikombelo. Mubabuzye na inga kakuli zyipego zymwi zyoabona muli ndinywe, na kumvwa jwi lya cigaminina kuzwa kuli Leza lyenu, kujatikizya zyipego zyenu?

Eelyo nomubweza ntaamu eeznyi, cileeledede kubona kuti cipego ceendelana abube amicito yenu. Muyeeye kuti nokuba kuti zyipego zya ku muuya ‘zyeeledede’, eenzyi zyipego ziinda azyipego buyo alimwi tazyiboolo kwiinda munguzu zya muntu. Zyipegwa aa Leza, kutali ku bulumbu bwesu pele ku bulumbu bwa bamwi batuzungulukide.

Ibbaibbele lizwide twaano twa baalumi abakaintu bakakonzya

kubelesya zyipecto akutondezya nguzu zya Leza. Aaba bacizumanana kuli bonya ku basyomi aano mazuba kutegwa bakukulusy muzeezo wa Leza alimwi amuzeezo wakuba anyika akuleta bantu kuli nguwe.



Cakucita

20
tuvwalu
-vwalu

Mwandaane alimwi mube mutubunga twa bantu 3 na 4 mpoona mwiinde muntaamu zyotwamana kwiiya. Eeci ciya kumugwasya kuziyiba zyipecto zyabaabo bali mu kabunga.

Mweena mu kabunga, mube aciindi ca kupaila, kuyeeya akukanana zyipecto zya ku muuya kuli umwi aumwi oomo mu kabunga.



Mupailo

10
tuvwalu
-vwalu

Ibbaibbele litwaambila kuti zyipecto zya ku muuya zylapegwa kwiinda mukubikka maanza atala (amubone 1 Timoti 4:14).

Mutubunga twenu twa bantu 3 na 4 mupaililane, kubikka maanza amuntu upaililwa akulimba kuti Leza abaleleke akubapa zyipecto zya muuya mukumupa bulemu. Mulumbe Leza ku zyipecto muntu zyajisi kale akupaila kuti akonzye kukomena kwiinda mukubelesya zyipecto eenzyi.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki, mubambe mulongo wa zyipecto zya muuya zyakananwa kale kwiinda munjiisyo amukukanana. Muzumanane kupaila akutelaika amulongo ooyu, kulomba Leza kuti atondezye zyipecto kabotu kabotu zyamupede kale antoomwe azimwi ziyayanda kumusanganyizyila.

Mupailile mbomukonzya kukomezya zyipecto eenzyi. Mubuzye Leza

mbomunga, nkomunga alimwi eelyo nayanda kuti muzyibebesye zyipecto.



Kamboni

Iino mvwiki, musale comwe cipego ncomwazyiba kuti mulijisi. Mube aciindi ca kulifoola mu cipego eeco.

Eelyo nomwiiya zyipecto zyomujisi, mubelesye comwe kuleleka uumwi uuli kale mumukwasyi wa Leza. Ooyu inga kali uumwi wa mu Kabunga kenu ka Buumi, uumwi mucikombelo cenu na cimbi.

Mupailile zyoolwe zyakukonzya kutayoowa kubelesya zyipecto zyomwapegwa.

Mulongo wa zyipecto zya muuya kuzwa muzyibalo zytwabala sunu

- | | | |
|--------------------------|----------------------|--------------|
| • Busongo | • Busiciiya | • Butambuzi |
| • Luziyibo | • Kuyiisya | bwa beenzu |
| • Lusyomo | • Kugwasya | • Busyabupa |
| • Kuponezyeg
wa | • Bulelo | mpu |
| • Nguzu zya
maleele | • Kukulwaizyig
wa | • Kwiiminina |
| • Cisyinsyimi | • Kupa | • Mubandi |
| • Kwiindanya
myoza | • Busololi | ubambilid |
| • Kukanana
mumilaka | • Luse | we |
| • Kupandulul
a milaka | • Ivwangeli | |
| | • Bukambausi | |

Inga ndabelesya buti Zyipecto zyangu?

'Amutobele luyandisyo, alimwi amupangike myoyo yanu kuzipego zya-Muuya, pele kwiinda zyoonse kubusinsimi.'

1 Ba-Korinto 14:1



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kwiiya bwa kubelesya zyipego zya muuya zytwakabona mvwiki yakainda. Eelyo notwiiya bwa kubikka zyipego eenzyi mumicito, Leza uyakutubelesya kubamba zyimwi alimwi kwiinda mubuumi bwakwe mucooko cituzingulukide.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonoto, mubone kuti kabunga kalatobelezuya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Amutobele luyandisyo, alimwi amupangike myoyo yanu
kuzipego zya-Muuya, pele kwiinda zyoonse kubusinsimi.*

1 Ba-Korinto 14:1



Caano

Mubale caano citobela ku kabunga:

Hannah wakeelede kuya ku busena bwa ku Migodi mu Zambia antoomwe ankamu yakwe ya cikombelo ca ku UK, kutegwa bakabe aciindi antoomwe abayaki abasikubamba zya kubamba bamba mukuyaka cibbadela okuya. Pele Hannah taakali muyaki; nokuba kuti wakeelede kuunka awalo taakajisi lugwasyo lunji kuli basimunzi balo bakajisi kale mulimo mupati.

Ku mamanino akuswaya kwabo mumunzi, Hannah ankamu yakwe bakalombwa kuti batole lubazu mukusekelela akulumba Leza ku mulimo basimunzi ngobakacitide kale. Bamwi bakapa majwi akukulwaizya kuzwa mu Bbaibbele, bamwi bakaimba nyimbo, bamwi bakajana ciindi ca kupailila bamwi mucooko.

Mu ciindi ca mupailo uumwi mooye wakali kugwasya kulanganya ba Hannah ankamu yabo mumunzi wakaboola cigaminina kuli Hannah kuti alombe mupailo wa kuponezyegwa macise aamwi nga kajisi kuzwa nakazyala bana bakwe. Mpoona mpoona Hannah wakazula bukandu: mbubuti mbwakonzya kupailila mooye ooyu? Ino kuti natakapona mooye – ino eeci nocakaamba nzi kuli Hannah anoomwe a Leza ngwa komba?

Nokuba kuti wakayoowa, Hannah wakamulanganya mooye eelyo tanakayanda kumutanda pele wakamupailila. Wakabikka tansyi akkuko lya mooyeakupaila kuli Leza, kumulomba kuti amuponye, mumbazu oomo mwakali kukonzya kumvwa.

Nokwakainda mazuba masyoonto akupaila mupailo ooyo Hannah ankamu yakwe bakalaya camamanino ku balongwe babo mumunzi. Hannah taakwe nakayeeya kapati amupailo ngwa kapailila mooye kusikila limwi nobaka muccilila alimwi eelyo alumwemwe ku busyu wakamwaambila kuti macise akamana eelyo wakalimvwide buyo kabotu. Wakaponezyegwa a Leza kwiinda mumupailo wa Hannah wa kudonaika – Jesu alumbaizyigwe!



Luzyibo lwa mu Bbaibbele

Mubale Ba-Roma 12:3-8 ku kabunga:

³Ikuti kuluzyalo ndundapegwa, ndaambila boonse buyo bali kulindinywe, kuti muntu ataliyeeyi cakulisumpula kwiinda mbukweelede, pele aliyeeye cakuumuna, mbubonya mbuli mweelwe walusyomo ngwaabilwa muntu umwi aumwi kwa-Leza, ⁴Nkaambo mbuli mbutujisi zizo zinji mumubili omwe, alimwi zizo zyoonse tazijisi mulimo omwe, ⁵mbubonya obo swebo, notuli banji, tuli mubili omwe muli-Kristo, toonse tuli zizonyina umwi aumwi mukwesu. ⁶Tulijisi zyaabilo zyamisyobo misyobo mbuli luzyalo ndutwapegwa. Lino oyo uujisi bulunguluzi alungulule mbuli mweelwe walusyomo lwakwe. ⁷Ayooyo uukutaukila abike moyo kukutaukila kwakwe, alakwe mwiiyi kukwiisya kwakwe, ⁸alakwe sikukombelezya kukukombelezya kwakwe. Oyu uupa ape cabuuya, alakwe musololi abe abusungu, ayooyo uetelela abe alumwemwe.



Cakucita – Mulumbe Mubotu

Mwiki yakainda twakatalika kulanga zyipego zya muuya mu Bbaibbele. Sena inga mwajana ciindi ca kuzyiyeeya zyipego zya muuya? Musole kubamba mulongo wa zyipego zyalo Muuya

Usalala zyoupa bantu bawe. Mubelekele antoomwe mutubunga tusyooonto eelyo ku mamano mubone nakuli zyoumaluba.

(Ciibalusyo: Nkouli mulongo ku mamano acibeela ca mwiki yakainda.)



Ino zyipego zya muuya zyaanzi?

Mbuli cibalo cesu ca mu Bbaibbele ca sunu mbociti, zyipego zya muuya zylapegwa ku muntu aumwi mucipimo ciindene. Cituyeezya kuti toonse tuli zyibeela zya mubili omwe eelyo zyipego zyesu zyiindene zyilibambidwe akupegwa kweendelanya kutegwa zyipe bulumbu ku mubili oonse. Kuti na twabelsya zyipego zyesu munzila zya busyacimvule mwangu, kuti na twazyikaka, kuti na twabikkila maano comwe buyo, nkokuti tatuzukizyi muzeezo wa Leza wa kutupa zyipego. Cipeto cesu ca mumutwe cituyeezya kubelesya zyipego muluyando. Ciimo ca kulitola ansi aluyando nciyandisi eelyo notuyandaula kulela bamwi batuzingulukide, biyo inga twaliletela kunyema andubizyo eelyo kwabula kwiiminina mulumbe mubotu wa Jesu ooyo ngo tubweza. Ncibotu kubula cipego pele katuyanda, kwiinda kuba azyipego zynji mpoona akuba sikulimpula asiacimvule mwangu.

Tuzyibelesya buti zyipego zyesu zya muuya?

Cakutaanguna tuyandika kuzyiba zyipego zyesu, na cipego ncotuyanda kutambula. Mwiki yakainda twakalanganya mbotunga twazyiba zyipego zyesu, anzila zytunga twapailila zyipego. Kufwumbwa buyo twazyizyiba mbozyibede eelyo tulayandika kotalika kuzyibelesya. Eeci inga cayandika busicamba akusola. Nkaaka akambi kaano kuzwa kuli Hannah (ooyo ngo twamvwa kale):

Ndakaiya kukanana mumilaka ku cikombelo eelyo ndakali kukatazyigwa mbocibeleka. Ndakasala kulomba Leza cipego ca kukanana mumilaka kutegwa nkelebelesya mulaka ooyo kumukomba ciindi eelyo majwi aangu nalimvwisya kubulila, alimwi buya ambuli citondezyo ca Muuya Usalala kubeleka muli ndime.

Kwa ciindi cili mbocibede nondakamana kupaila kwiina cakacitika cini-cini. Ndakasala kupaila alimwi eelyo ndakamvwa Leza kati kuli ndime, 'Uli jisi kale cipego – weelede buyo kucibelesya!' Ciindi citaanzi nekakanana mumilaka ndakajisi bukandu; asyoonto buyo ndakalimvwa, mbuli kuti inga ndacikonzya eelyo ndakeenzyeenzya zyintu. Nokuba boobo, bumwi buzuba muciiindi ca kukomba ndakapaila, ndakajula mulomo wangu, akutalika kukanana mbiccaana. Cakazwa majwi ngondatakazyi, alimwi tinda kayiide. Ndakagambwa! Lino ndili jisi mulaka ngwebelesya mumupailo walo ngwekonzya kubelesya kufwumbwa ciindi alimwi amubusena buli boonse ooyo walo utandi ndileti buyo munsu munsu a Leza pele ulandiyeezya kuti nguupa zyipego alimwi ulayanda kutuleleka. Aabona ndakanana mumilaka cakutobelanya mubulamfwu, zyimwi zyiindi lyoonse, pele lyoonse ndiliziyi kuti cipego nkocili: ndisala buyo lya kucibelesya.



30
tuvwalu-
vwalu

Cakucita – Mulumbe Mubotu

Cipeto ca mumutwe cesu iino mvwiki caamba kuti tweeleda kuba aluyandisyo lwa cisyinsyimi. Tuya kucita cakucita cititugwasye kulanganya cipego eeci alimwi akwiiya bwa kutalika kucibelesya.

Cisyinsyimi mubufwaafwi nkumvwa kuli Leza. Eeci cilakonzya kuba kuzwa ku jwi lyakwe mu Bbaibbele; cilakonzya kujatikizya

ciyubunuzyo ca ciindi ciboola, kukulwaizyigwa na kusolwa. Cintu ciyandisi kapati nca kuti cizwa kuli Leza alimwi cili munzila ajwi lyakwe (Ibbaibbele) alimwi aceeco ncotuzyi abube bwakwe.

Muyakuyandika cilembyo apepa kucita cakucita eeci.

Boonse mukabunga beenge kuzinguluka kwanza kwabo akapepa eelyo balembe zyina lyabo na kweenga citondezyo ncobati konzye kuzyiba pepa mpolili ajulu.

Mubikke ootu tupepa abusena mpomuswaanganina, mpoona mulete kabunga antoomwe kapaile. Mulombe Leza kuti azuminzye boonse batambule jwi lya cisyinsyimi kuli umwi na bamwi mukabunga.

Kufwumbwa buyo mwamana kupaila, kabunga kandaane, muswiilize kuli Leza, mpoona muunke mulembe na kweenga kafwanikiso amutwe wayooyo Leza ngwa bikka mumizeezo. Mulembe na mweenge eeco ncaamba. Ceelede buyo kuba amabala 1 – 2, cibalo ca mangwalo na kafwanikiso ka cintu. Musole kucita oobu kwa cisela ca ciindi nco mujisi sunu mubonenesye kuti aumwi ujisi zyintu zisyisyoonto zilembedwe apepa mumaanza.

Mwamana buyo, boonse babweze bulembo bwa maanza aabo eelyo mubale cilembedwe aawo.

Mubuzye bantu baambe cili coonse cikanana cigaminina kuli mbabo na kubakulwaizya kuzwa ku cakucita eeci.



Nkuli nkweelede kubelesya zyipego zyangu?

Inga mwabelesya zyipego zyenu kuli koonse. Kuli bantu baciswa mukati akunze acikombelo alimwi bantu bayanda kumvwa kuli Leza mumasena oonse. Zyooko zyesu ziyandika basololi bana Leza, mpindu zyesu ziyandika babelesi babombe akusyomeka, minzi yesu iyandika bazyali basiluyando. Zyipego zya muuya tazyili buyo zyakubelesya mucikombelo, nokuba boobo nkubelesya busongo mukusala akwakuzyibelesyela. Lyoonse kamuba aciindi ca kupaila kuli Leza mumoyo wenu eelyo nomwamvwa kuti uyanda kumubuzya kuti mubelesye cipego mubuumi bwenu buzuba abuzuba. Mumulombe kuti ambweni abambe na kuzwisya coolwe eelyo muccilile busololi bwakwe.

Zyipego zya muuya zyibelesyo zyibotu zyakutondezya nguzu zya Leza abube bwakwe kuli baabo batananga muzyiba. Inga cayandika busongo kubelesya zyipego zymupedwe, pele mbomuya kubweza ntaamu zyisyoonto muya kubona Leza kabeleka kwiinda muli ndinywe eelyo kasika kuli baabo bamuzungulukide abuumi bwakwe.



Mupailo

15
tuvwalu-
vwalu

Mutubunga twa bantu 3 na 4, mube aciindi ca kulumba Leza kuti wakanana kuli ndinywe kwiinda mucakucita mucibeela cainda.

Mukulwaizye basikabunga kuti bape majwi aali oonse na zyifwanikiso zyobatambula eenzyo zyeendelana aciindi kuli mbabo.

Alimwi mupailile aabo bajana kuyuminwa mu cakucita eeci. Mupaile kuti Leza akonzye kuzumanana kubagwasya kukomena muzyipego zyabo.



Cakucita iino mvwiki

Kucili kunji nkotukonzya kwiiya kujatikizya zyipego zya muuya. Iino mvwiki mube aciindi antela lweni nyolikke na mutubunga tusyoonto musome zyibalo zya zyipego zya muuya. Muzumanane kulomba Leza azubulule zyipego zyumunga mwayanda. Alimwi mupaille antoomwe kuti Leza amupe nsana zyakukonzya kubelesya kufwumbwa zyipego zyumujisi kale.



Kamboni


Mbotwaamba kale, zyipego zyesu inga zyabelesyegwa kuli koonse akupa bukamboni ku nguzu abube bwa Leza. Iino mvwiki mulombe Leza amupe coolwe ca kuba alusyomo akubelesya cipego ncakamupa muleleke uumwi utaninga muzyiba kale.

Mukambauke mafwumina oonse, mube aciindi ca kuswiilizya kuli Leza akulibambila kwiingula kufwumbwa buyo mwapenga coolwe. Antela ulamupa jwi lya bukulwaizi na luziyibo lwa umwi, ambweni ulamulomba kuti mupailile uumwi akumweetela kuponezyegwa na ulamupa coolwe ca kutondezya butambuzi bwa beenzu kuli uumwi.

Na mumvwide bukandu, mutapengi. Mulombe buyo Leza amupe busongo!

Bulembo

Kusyoma a Lusyomo



'Syoma Jehova amoyo wako woonse;
Utalifunkizyi kumaanu aako omwini.
Umuzibye munzila zyako zyoonse,
Nkabela uyooenzya myeendelo yako.'

Tusimpi 3:5-6



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kuzyiba kuti buumi Leza mbwakatupa bujatililide ali ndiswe kubikka lusyomo muli nguwe, kutali mumucito yesu. Mbweenambuli Leza Taata, Mwana a Muuya Usalala mbobatajisi kusyoma alusyomo lwa kuzumbauzya muli umwi aumwi, inga twamusyoma Leza kuti atukomezeye muli nguwe, alimwi akutubelesya kwiinda muzyipego zyesu kuleta lwiindano munyika.



5

tuvwalu-
vwalu

Cipeto

Balisa zyipeto zya mumutwe amikonzyanyo yamu Bbaibbele ku kabunga. Uzyibale alimwi muzyibeela zyiniini-niini, kabunga kakainduluzya. Mbiccaana mbiccaana mubale muzyibeela zylamfwu antoomwe akabunga kakatobelezya kusikila limwi boonse bakonzye kuciindulula cibalo. Mukulwaizye bamwi bantu basole kwiinduluka lwabo beni.

*Syoma Jehova amoyo wako woonse;
Utalifunkizyi kumaanu aako omwini.
Umuzibye munzila zyako zyoonse,
Nkabela uyooenzya myeendelo yako.*

Tusimpi 3:5-6



Caano

Mubale caano citobela ku kabunga cijatikizya bukandu akusyoma ku Mulundu wa Mumpu ku Mkushi, Zambia. Caano cakalembwa amwiiyi wa cikolo okuya nkoona.

Kuli mulundu ku Mkushi – uumwi wa milundu iinda kulampa mu Zambia – eelyo mwaka amwaka kabunga ka basicikolo kuzwa acikolo cili munsu munsu ca Chengelo Christian School balautanta antoowme. Zyina Iya mulundu ooyu ngu ‘Mumpu Welume’, eeci mucilala caamba kuti: ‘Mulundu wa Satani’. Uli jisi kkomba pati lili mucimo ca mulomo ulangide mujulu ku lubazu Iwa kumbo. (Mubatondezwe boonse cifwanikiso ku matalikilo acibeela eeci.) Kuboneka kwa kkomba eeli nkokweeta zyina alimwi atwaambo tunji tujatikizya mulundu. Bantu ba mucooko tibakali kuutanta pe mulundu eelyo bakali kusyoma kuti kuli ‘muzimo’ wa Mumpu ooyo uyandika kutulilwa zyiyege zya munyo, busu atombwe kuti na kabayanda kuvwima na kwendeenda mubusena.

Kutegwa kabunga kesu katante Mulundu wa Mumpu twakeelede kunjila mukkomba, mukati kwiinda ku mulomo wa satani! Busiku kabutaninga sika buzuba bwa kutanta katucili ku cikweya ca mulilo, bana ba mu kabunga kesu bakaswiiliza twaano twa Mulundu wa Mumpu. Meso aabo azjulika eelyo kebaambila kujatikizya muzimo wakali kukkala mu kkomba. Mpotumanina buya twaambo inga kwacaala buyo kumvwa muwo kaufwula kwiinda muziyisamu eelyo kakumweka mulilo mumitabi.

Eeci nciindi ncebabuzya, ‘Nguni ngomusyoma?’ Caide kuba cigambyo mpoona mpoona, canconbeni. Kabunga kazula bukandu bwini bwa mulundu, bwa mudima, kakuli balizyi buya kuti Jesu Kristu wakati ngo mumuni wa nyika. Muli ni mobeelede kubikka lusyomo lwabo? Zyintu zyicitika inga zyapesya kuti aaba bana bayoowe na babikke lusyomo lwabo muli basikale amumizimo, pele kusyoma alusyomo zypati kwiinda zyiindi abukandu. Eelyo mbuli mbotukkede kuzinguluka mulilo wa nkambe, twabikka kusyoma kwesu muli Leza. Twapailila bukwabilizi bwakwe akuzyiba kuti ngu singuzu.

Uumwi mwaka kabunga ka basicikolo kakabweza ciingano cipati kwiinda mukkomba kuya atala Iya Mulundu wa Mumpu. Bakacisimpa atala amulundu kutalanganya zyina lyawo, Mulundu wa Mumpu mulundu wa Leza mbweena buyo mbuli zyintu zyoonse munyika. Mulundu wakwe eelyo tatweelede kuyoowa kuutanta! Akaya kabunga ka bana kakalukondwa lweendo lwa kutanta mabwe asuleme, kukwala kwal` mukkomba akukkomanina bulamfwu, mbweena mboceelede kuba notwasyoma muli nguwe mu lweendo lwa buumi.



Luzyibo lwa mu Bbaibbele

Mubale Mateo 14:22-33 ku kabunga

²²Elyo Jesu wakalailila basikwiiya bakwe kuti banjile mubwaato akumusolweda kuya mutala ciindi ncaakacili kumwaisya makamu. ²³Amane buyo kumwaisya makamu, wakatanta kucilundu kuyookomba. Lino naakaba masiku wakalikede nkukonya alike. ²⁴Nkabela bwaato kabuli akati kalwizi, kabuli kutengauka amayuwe, nkaambo kakuti muuwo wakabakacizya. ²⁵Nkabela nikwakaba kubusiku wakasika nkubakabede, keza bweenda atala amaanzi.

²⁶Lino basikwiiya nibakamubona uleenda atala amaanzi bakakankamana, bakati, Musangu! nkabela bakoongolola cakuyoowa. ²⁷Mpawo Jesu wakabaambila kuti, Amusekeseke! Ndime. Mutayoowi. ²⁸Lino Petro wakamuvwiila, wakati, Mwami, kuti nduwe, ndilailila kuti mboole kulinduwe atala amaanzi. ²⁹Wakati, Boola. Nkabela Petro wakazwa mubwaato, wakeenda atala amaanzi kuti aye kuli-Jesu. ³⁰Pele naakaswiilila muuwo, wakayoowa. Lino wakatalika kubbila, elyo wakoongolola wati, Mwami, ndivuna. ³¹Mpawo Jesu wakatambika ijanza lyakwe, wamujata, wamwaambila wati, Webo nusilusyomo-luniini, ino nkaambonzi wadoneeka? ³²Lino nibakanjila mubwaato muuwo wakaleka. ³³Nkabela abo bakali mubwaato bakamukomba, baamba bati, Ncobeni nduwe Mwana a-Leza.



Mu cibalo eeci tubona Petro, Petro uli citila zyintu, kaingula ku lwiito lwa Jesu. Jesu wakazwide akusanina bantu bali 5,000 eelyo wakatumide basiciiya bakwe mu bwato walo kandaanya mbunga. Mpoona wakaba aciindi awisi Leza mumupailo kumbali amulundu. (Eeci cakacitwa akaambo kakuti mweenima Johane mubbuzyi wakazwide akujaigwa eelyo wakali adilwe.)

Kwakali ku bucedo alimwi bwato bwakali kulamfwu ankomwe eelyo Jesu wakeenda atala ameenda kuya kuli basiciiya. Basiciiya bakanyandwa kumubona kaenda kuya kuli mbabo kazundana amaiwe. Amwenzyeezye lwenu kuba muciiindi eeci: sena andinywe inga mwayoowa?

Jesu wakabayumya yumya kuti batayoowi nkaambo ngonguwe. Mpoona mpoona Petro wakaingula, kazwide lusyomo akusyoma: 'Kuti waamba kuti boola, ndaboola!' sena andiswe tuli jisi ooku

kulimvwa, lusyomo lbee ndwa mwana lujisi Petro mbuli mbwakatanta kumbala lya bwato kuti aswaane a Jesu mumeenda?

Kakuli aayo matalikilo mabotu abinda kuzimaana eelyo Petro nacizyiba citole busena, maiwe amuwo, wamana watalika kunyikila. Tuli buyo mbuli basiciya ba Jesu aaba! **Zyiindi zyangaye zytowakaingula ku lwiito lwa Jesu kayujisi lusyomo lupati akuyandisisya, kulanganya buyo azyiindi zyesu, kulimvwa kuzundwa ku makatazyo, eelyo twatalika kunyikila?**

Petro wakacita eeco toonse ncotunga twacita ciindi mitwe yesu noyatalika kubbila mu meenda asunka maumi eesu: wakalilila Jesu. Jesu wasika kuli nguwe akumunyamuna. Ucimana Jesu wakasola Petro (cisyoonto ca 31) kwiinda mukumubuzya cakapa kuti adonaika, ngweena mubuzyo ngwa tubuzya muzyiindi zyesu. Nkaambo nzi ncotudonaika?

Tandiyeeya kuti muciiindi eciya Petro wakaswekelwa lusyomo. Alakwe Jesu taakwe nakayeeya boobo; wakatalika buyo kudonaika. Muli Marko 9:24 tubala kujatikizya wisi wa mwana wakapengede kwa buumi bwakwe boonse. Wisi wati, 'Ndasyoma; ndigwasye ndizunde kutasyoma kwangu!' inga twazyiba wisi a Petro mbobakalimvwide. Tuli jisi lusyomo muli Leza eelyo tula musyoma, nkabela zytutitikila zytupa kudonaika Jesu kuti inga tatugwasyi.

Nkabela, ambweni eeli nde penzi ndyo tujana mukusyoma: kusyoma tacili buyo mukuti Leza katutitila ncotuyanda, cijatikizya kusyoma Leza kuti acite ncayanda! Kusyoma alusyomo tazyili buyo zyamabambe omwe ngotunga twabamba ku matalikilo alweendo lwa buna Kristu; zya mabange ngotubamba buzuba

abuzuba. Muli Luka 9:23 Jesu waamba kuti, “Ooyo uyanda kuba siciiya wangu alikake akubweza ciingano cakwe buzuba abuzuba anditobele’. Lusyomo ndibambe Iya buzuba abuzuba Iya kuti, ‘Sunu Jesu ndakusyoma kuli zyoonse’.

Akati ka zyiindi zya kusunkwa lusyomo lulati, ‘Mwami ndabikka kusyoma muli nduwe’ eelyo akuciyeeya akucicita. Ansi a Mulundu Mumpu mucaano, tweeledede kuti, ‘Mwami ndabikka lusyomo lwangu muli nduwe!’ Lyoonse ndayandisya kubala Joshuwa 24 muciiindi eeco nkaambo Joshuwa cisyoono ca 15 caamba kuti, ‘Amulisalile kwasunu ooyo ngo muti kombe’. (Inga mwabala caano aakale namulayanda.) Tweeledede kucisala eeco buzuba abuzuba. Lusyomo lwesu lulatalika kukula mbuli mbotubona bwiinguzi bwa lusyomo akusyoma kwesu buzuba abuzuba. Eelyo notwapa kuyandisisya kwesu kuli nguwe tubona kusyomeka kwa Leza ukukomena mu lusyomo kulibambila kusunkwa kuli kumbele. Buumi mbwabikkide muli ndiswe bulatalika kukomena eelyo notwakubikka mumicito.

Akwaalilwa kwesu, mbweena mbuli cakacitikila Petro mucaano, inga kwatuyakila lusyomo lwesu kwa ciindi ciboola. Petro wakayaka lusyomo lwakwe muli Kristu kwiinda mukusyoma alimwi akuzwa mubwato. Bweende bweende Jesu wakaita Petro kuti ‘ndibbwe’ Iya cikombelo (Mateo 16:18). Bbwe ncimwi cintu ciyumu alimwi cikkalikide. Lusyomo lwesu eelyo nolukomena lweeledede kuyuma akukkalikila, mbuli bbwe aawo mpotubede, antoomwe abamwi, mpobakonzya kwiima.

Petro wakali bumwi bube bwa Jesu bwalo butalibonyi kabotu ku banji, kuti eelyo notwazwa mubwato akumusyoma, uyakubako kutegwa akatugwasye akutuzwidilizya. Oobo mbobube bwa Jesu. Kuyandisisya kwakwe nkwa kuti swebo myoyo yesu itapengi,

kutegwa tusyome muli Leza amuli Jesu (Johane 14:1). Jesu uyandisisya kuti swebo tusyome zyoonse muli nguwe. Pesi, ooku kusyoma tacili cintu ncatusungilizya; kweelede kuba kulisalila kwesu nkaambo oobu cilogwe cilede aluyando mbocibeleka. Tulavwiila ku lwiito lwakwe kwiinda mukumusyoma buzuba abuzuba, Jesu ulatwiingula kwiinda mu luyando lutamani akutukulwaizya kutamudonaika. Inga twamusyoma, nkaambo ulasyomeka.




10
tuvwalu-
vwalu


Cakucita

Nzila mbotu ya kutondezya mbuli kusyoma mbokukomena akuyakwa nakweya ka kusyoma.


Mwaambile bantu babe mutubunga twa bantu 6, 7 na 8. Akamwi kabunga kabambe kakweya kwiinda mukwiimikila kwa kujatana mukkuko umwi aumwi.



Omwe muntu aimikile akati akakweya akamwi. Ooyo muntu waimikila akati avwunge maanza acamba cakwe mpoona aimikile nji mbuli pulanga.



Bacaala mukakweya batambike maanza kumbele lyabo akusolozya tende lyomwe kumbele (kabacijatene makkuko antoomwe mukabunga). Muntu uuli akati, kabikkide maulu aakwe mbuli pulanga, ayaame ku maanza abantu bali mukakweya. Bantu bali mukakweya bamutonke ca kabotu kabotu mukakweya. Muzeezo TAULI wakuti muntu uuli akati awe, mumukwabilile lyoonse.



Eeci ciyaka kusyoma mu muntu uuli akati kutegwa akonzye kusyoma bamwi bali mukakweya eelyo abalo bali mukakweya batondezya mbobasyomeka!

- Amumubuzye ooyo uuli akati mbwaalimvwa?
- Sena cali cuba uba kusyoma?
- Ino eeci cakucita inga ceendelana buti akusyoma kwesu muli Leza?



15
tuvwalu-
vwalu

Kubandika

Mutubunga twa bantu 3 na 4 mukanane mibuzyo eeyi azyipeto zya mu Bbaibbele. Wamana mubandi, muzumizeye tubunga tupe bwiinguzi ku mbunga.

- Luka 17:1-10Ino tuyaka buti kusyoma alusyomo lwesu? Ncinzi cipati?
- Marko 9:14-29 Kaambo kazwa kuli usyi mucisyoonto ca 24 kaboneka kuti kalalikazya. Ino inga twasyoma (kusyoma) buti kakuli tuciyandika kuzunda kutasyoma (kuceya lusyomo)? Sena muli jisi mikonzyanyo ya ceeci mubuumi bwenu?
- Zyiindi nzi zytupa kudonaika akwaalilwa kusyoma muli Leza?
- Bwiinguzi bwesu inga bwaba buti?
- Ino kwaalilwa kwesu inga kwayaka buti lusyomo lwesu?
- Caamba nzi kulikaka akubweza ciingano buzuba abuzuba?



10
tuvwalu-
vwalu

Mupailo

Mutubunga twenu tusyoonto, mubelesye twaambo ootu tuli ansi kwaamba masimpe mbuli kusyoma alusyomo lwenu muli Leza. Mube aciindi ca kupaililana, kukulwaizyanya akuyaka kusyomaalusyoma lwabo.

Njeeyi mizeezo ya mbomunga mwapaila:

- Mwami ndasyoma muli nduwe; undigwasye ndikonzye kuzunda kudonaika akubula lusyomo kwangu.
- Mulyaambilile mabazu abudonaisi, bukandu akubula lusyomo.
- Mulombe Leza amugwasye kuzyizunda eenzyi; nguzu akuyumizyigwa kwiinda mu Muuya wakwe Usalala.
- Mupailile zyiindi zyoonse zymubede kuli Leza lino zyalo ziyiyanda lusyomo akusyoma kwiindilila. Mupaile kuti amuyumye yumye.
- Mulombe abamwi bamupailile mumbazu eenzyo.
- Mupaile kuti mukonzye kubelesya kwaalilwa (mwaambe cigaminina namulayanda) kuli mubuumi bwenu kuyake lusyomo.



Cakucita iino mvwiki

Mvwiki amvwiki kuli ncito ya kubelekela ku ng'anda.

Iino mvwiki mubale Ba-Hebrayo 11. Mubweze omwe muntu silusyomo kuzwa ku mulongo. Mulembe na muyeeye mikonzyanyo 5 ya mbobakasyoma muli Leza. Mpoona muswaangane aumwi kuzwa mukabunga mubandike mibuzyo eeyi antoomwe.

- Sena inga mwabelesya uumwi mukonzyanyo ali yeeyi ku buumi bwenu iino mvwiki?
- Inga mwamusyoma buti kapati Leza mubuumi bwenu?
- Inga mwakuzunda buti kubula kusyoma?
- Inga mwakulwaizya buti uumwi kuti asyome Leza iino mvwiki?



Kamboni

Buumi bwa Leza muli ndiswe bupandulula kuti twacinca mukati calo eeco cileta kucinca amumicito yesu. Bantu batuzingulukide baya kukubona ooku kucinca muli ndiswe.

lino mvwiki, muyeeye ciindi eeco calo nomusyoma muntu na cintu cimwi kwiinda Leza. Mucipailile eeco ciindi, mupe kuli Leza. Musale kusyoma Leza kwiinda muntu ooyo na cintu eeco ncomwali kusyoma. Lino mucince nzila ya micito yenu kutegwa mube akuyeeya kusala nkomwabamba kwa kusyoma Leza.

Mukonzyanyo, inga kamuli mwali kusyoma basimukobonyoko na mulongwe kuti amucitile ncito iimwi. Aabona inga kabajisi bubi kuti baibeleke. Mubwini kuti bamwaambila kuti inga tibamugwasya, mula zulilwa mizeezo akwaamba zyimwi zyintu ku mulongwe wenu kusola kumukombelezaya kuti ajane ciindi ca kumucitila mulimo. lino mvwiki, mulongwe wenu tajisi ciindi ca kumugwasya, muyeeye kuti musyoma buyo Leza kuti nguuti mugwasye. Mwaambe mupailo, wakubinda mu moyo wenu, mpoona inga mwamulumba mulongwe wenu nkaambo ulavwula kumugwasya eelyo mumwaambile kuti mulizyi kuti inga tamugwasya iino mvwiki. Mulombe Leza amuzumizye lwenu kubeleka mulimo na atume uumwi amugwasye!

Uumwi mukonzyanyo ngwa kusyoma mali kwiinda Leza. Kutu mwalijana kamusyoma kapati mali kukonzya kumugwasya kwiinda kusyoma Leza, mucipailile eeco eelyo mpoona mupe uumwi mali walo uapengede kumwiinda. Mulombe Leza amupe zymubulide. Mumusyome.

Kwiinda mukubeleka bwandeene, mulibikke mumbaakani oomo momunga mwasyoma Leza. Kumwi mupa Leza coolwe ca

kumutondezwa mbuti mbomusyomoka. Bamwi bantu baya
kucibona eeci kwiinda mubuumi bwenu!

Bulembo

Nkondo ya ku Muuya



'Mubbi uzida buyo kubba akujaya
akunyonyauna, mebo ndazida kuti babe
abuumi, akuti buvule.'

Johane 10:10



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kuzyiba kuti notwatambula buumi bupya kuzwa kuli Leza, ndyoona tulanjila munkondo anguzu zya muuya zyikazyanya a Leza. Leza wakazyizunda kale eenzyi nguzu; pesi, zyilakonzya kupa kuzundana kwalo nkotunga twazunda kwiinda mumupailo, kukomba akwiinda mumicito.



5

tuvwalu-
vwalu

Cipeto

Mwakaiya kale cibeela ca cipeto ca mumutwe ca sunu mucibeela citaanzi mu ***Matalikilo 1: Buumi Bulatalika eelyo*** notwakaiya kuti Jesu wakaboola kuzya kutupa buumi bupya. Cipeto ca sunu ca mumutwe cisanganya ncotwakaiya kale.

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonto, mubone kuti kabunga kalatobelezya. Mwiindulule oobu, mbiccaana mbiccaana mubale

zyibeela zyilamfu kabunga zyokati tobelezye kusikila limwi
boonse bacizyibe lwabo. Mukulwaizye bamwi bantu kusola
kwiindulula muli lwabo.

*Mubbi uzida buyo kubba akujaya akunyonyauna, mebo
ndazida kuti babe abuumi, akuti buvule.*

Johane 10:10



Caano

Mubale caano citobela ku kabunga:

Mbuli mbwakonzya kuyeeya Marina wakamvwa majwi mumutwe wakwe. Aabona ulaamvwa kapati pesi aabona asyoonto buyo. Eeci ulacitambwida busilisi kuzwa kuli badokotela, nokuba kuti camugwasya asyoonto, majwi taakwe nazwa. Majwi alamwaambila zyintu zyimujatikizya, abamwi eelyo aabona alamupa malailile ambwaelede kucita. Aabona alamwaambila kuti alicise, na acise bamwi.

Kutali kaindi nokuba boobo, Marina wakatambula buumi bwa Leza bupya eelyo wakaba mu Kristo eeco caambilizya kuti wakatalika kubala Bbaibbele. Mu Bbaibbele wakajana misyobo yoonse ya kasimpe kuti mwana wa Leza, ambotweelede kucita eelyo notwatambula buumi bupya. Wakatalika kuzyiba kuti aalya majwi ngakali kumvwa takali kumwaambila kujatikizya kasimpe ka Leza na bube bwakwe. Wakasala kulemba zyimwi zyipeto zya u Bbaibbele eelyo ono naamvwa majwi ulaingula kwiinda mukubelesya kasimpe ka Leza, kwiimikila nji ajwi lyakwe azyisyomyo zyakabamba kuli nguwe. Eeci cilamugwasya buzuba abuzuba.

(Kuciswa kwa mumizeezo inga kacikatazya ku balwazi ababazingulukide. Kanji kanji tacipandululiki alimwi inga

titwazumina kuti cigwasya uumwi inga cagwasya abamwi boonse. Kuponezyegwa inga kwaboola kwiinda ku maleele na kulugwasyo lwa basilisi.)



Luzyibo lwa mu Bbaibbele

Mubale Ba-Efeso 6:10-18 ku kabunga:

¹⁰Kumalekelo, nubakwesu, amuyume mu-Mwami amunguzu yakwe impati, ¹¹Amusame zilwanyo zyoonse zya-Leza, kuti mukonzye kwiima mumeeneeno aa-Diabolosi. ¹²Nkaambo inkondo njitulwa tiensi yakulwana abantu balya maila, pe, niakulwana abeendelezi abami abasinguzu bamumudima waansi ano, tulalwana amyuuya yabubi ili mumyeenya yakujulu, ¹³Nkikaako nkindaambila kuti amuzwate zilwanyo zyoonse zya-Leza, kuti mukakonzye kulwisya mubuzuba bubi, elyo yamana buyo inkondo yoonse muzooima nji. ¹⁴Lino mbuboobo mbumweelede kwiima, Amulyaange kuzikungu lutambo lwalusinizyo akulisamika kucamba cikwabilizyo cabululami. ¹⁵Zituta zyanu zibambwe kukusamikwa a-Makani Mabotu aalumuno. ¹⁶Kwiinda zyoonse amubweze intobo yalusyomo, njiyonya njimukonzya kuzimya mimvwi yoonse iipya iifuswa ktmubi. ¹⁷Alimwi amubweze ingoani yalufutuko, apanga lya-Muuya, nkukuti ijwi lya-Leza. ¹⁸Amukombe lyoonse azikombyo ankumbizyo zyoonse zyanu-Muuya, Ee, amupangike myoyo yanu cabusungu kumakani aya, mukombele basalali boonse.



Ibbaibbele lilatondezya antangalala kuti satani, kwiinda mumulwani, mulwani uzundidwe. Wakazundwa kwiinda mulufwu lwa Jesu aciingano akubuka, pesi wakacaalilwa tumwi tunguzu

kusikila Jesu akaboole. Mbuli mbotumuccilila Jesu Kristu, eelyo mbotuswena kumbele abulwani.

Paulu, mulembi wa lugwalo ku Ba-Efeso, walembela bantu bakwe kujatikizya bulwani bubajisi eelyo wabelesya cifwanikiso ncobakonzya kuzyiba – ca sikalumamba wa ci Roma. Wapa basikubala malembe aakwe mizeezo ya kuti bakonzye kuzyiba mbobakonzya kulwana mabambe a satani. Mbweena buyo mbuli sikalumamba mbwatakonzyi kufwutuka kwa ciindi cilamfwu munkondo kuti na waluba kuti uli munkondo, eelyo andiswe tweelede kuli bambila akuzyiba kuti tuyanda kulangana a satani zyiindi zyoonse.



Kubandika: Nguni ngo tulwana?

Mubale Ba-Efeso 6:10-12 ku kabunga:

10
tuvwalu-
vwalu

¹⁰Kumalekelo, nubakwesu, amuyume mu-Mwami amunguzu zyakwe impati, ¹¹Amusame zilwanyo zyoonse zya-Leza, kuti mukonzye kwiima mumeeneeno aa-Diabolosi. ¹²Nkaambo inkondo njitulwa tiensi yakulwana abantu balya maila, pe, niakulwana abeendelezi abami abasinguzu bamumudima waansi ano, tulalwana amyuuya yabubi iili mumyeenya yakujulu.

Ba-Efeso 6:10-12

Mubuzye kabunga kaambe ngokayeeya kuti ngo mulwani wesu. Muyandaula bwiinguzi oobu:

- Milawo
- Bapati pati mubusololi
- Nguzu
- Nguzu zya muuya zya mubyaabi

Mubuzye kabunga na kayeeya kuti zyintu eenzyi zyaamba nzi. Mubandike nkondo eeyi nkoitutola ambobayeeya ncocaamba eeci.



Ntaamu ntaanzi yesu mukuzunda balwani besu ba ku muuya nkuzyiba buteteete bwesu anguzu zya Jesu. Kuti twalisyoma lwesu, inga kwiina acesu pe kunze akuba baina nguzu. Kusyoma muli Jesu ncecipati. Kukomba Jesu akulipa kuli nguwe nce nzila mpati ya nkondo ya muuya nkaambo kwiinda mukukomba tulaliyeezya antoomwe amulwani kuti ino Jesu nguni alimwi ncinzi ncaatucitila.

Eeci cibalo cilainduluka kutuyeezya mbotutakonzyi kulilwanina tobamuka beni. Tuyandika nguzu (cisyoonoto ca 10), zyilwanyo (zyisyoonoto zya 11 a 14 – 17) antoomwe amibandi a Leza ilatugwasya (zyisyoonoto zya 18 – 20). Kuti kwabula eenzyi zyintu inga titwacikonzya kuzundana abalwani besu. Kutusiya tolukke inga twawa akati ankondo. Mubufwaafwi twaceya ku mulimo ooyu. Nokuba boobo, Leza ulabayanda bantu bakwe eelyo taakwe nabasiya balikke kakwiina abukwabilizi.

Mucisyoonoto ca 10, Paulu wabona kuti tunyina nguzu eelyo buumi nobwayuma tuyanda tutakata. Eeyi nkondo ya muuya taili nguba uba pesi mbuli mbotwaamba kale Jesu wakaizunda kale. Ne nguzu zyesu eelyo tuyandika kusyoma muli nguwe anguzu zyakwe.

Cifwanikiso ca sikalumamba citugwasyilizya kuzyiba zyilwanyo zytunga twalwanya. Sikalumamba tasamide mbuli muntu buyo, Pele usamide ntobo alimwi ulabweza zyilwanyo zya kulikwabilizya ku balwani. Cisyoonoto ca 11 citwaambila kuti mbuli bana

Kristu tweeledede kusama mbuli sikalumamba, kusama 'ntobo ya Leza ikkwene' oobo inga tuli libambilide kulwana. Tweeledede kwiimikila a Leza kutali kuzundwa amabambe a satani.

Eelyo notwabona na kuyeeya kuti tuli mucilijazyo, mpoona mpoona tweeleda kulibambila; eeci cibalo citwaambila mbotunga twalikwabilila alimwi citupa mizeezo njotunga twabelesya kulwana milimo ya mubyaabi. Tuli jisi nguzu zyakucita oobo. Aabona eeyo nkondo kailangilwa ncobeni, zyimwi zyiindi eeyo nkondo inga kaili buyo mumyoyo na mumizeezo yesu. Cisyoonoto ca 13 cilatukulwaizya kwiinda mukutuyeezya kuti Leza taakwe nakatusiya tolikke kuti tulwane; pele wakatupa bukwabilizi azyilwanyo zytweeledede kubelesya ktegwa tukonzye kwiimikila nji muli nguwe. Lino tuyanda kuzyilanganya comwe comwe.



15
tuvwalu-
vwalu

Cakucita – Ntobo ya Leza

Eelyo nomukanana zyibeela zya ntobo Leza zyamupede, mukulwaizye bantu bacite cimwi ciya kubaibalusya. Mukonzyanyo, nomukanana lutambo lwa kasimpe, boonse inga baimikila akucengeezya kwaanga lutambo mucibuno cabo. Mukulwaizye boonse babelesye kwenzyeezya kwabo!

Lutambo lwa kasimpe

Ino lutambo lucita nzi? Lujatilila buluke bwenu mujulu. Lubikka kabotu vweleende lyenu. Mucilawo ca sikalumamba wa ci roma, lwakamuzumizya kubweza cilwanyo – cceba. Kusyoma

mukasimpe kakuti Jesu wakafwa aciingano akujokela ku buumi nokwakainda mazuba 3 mpaalede lusyomo lwesu. Satani uyanda kutucenga akasimpe ka Jesu. Kusyoma akujatilila ku kasimpe ka Jesu cipa maumi eesu bube akaambo kakucita zyintu zytucita.

Mutiba wa bululami

Mutiba wa bululami ubelesyegwa ku kwabilila camba cenu, walo alimwi ukwabilila moyo wenu. Bululami caamba cilongwe cenu a Leza alimwi aumwi umwi. Satani uyanda kunyanganya zyilongwe zyesu a Leza alimwi aumwi umwi kutegwa tulimvwe kuba tolikke mulweendo oolu lwa buumi. Inga twakwabilila moyo wesu kwiinda mukukwabilila cilongwe cesu a Leza. Eeci caamba kuti inga twaba aciindi ca kukanana anguwe mumupailo, kubala jwi lyakwe alimwi akukulwaizyanya.

Matende alibambilide kuzwa ku mulumbe mubotu wa luumuno

Matende eesu alatutola ooko nkotuyanda kuya. Leza utwaambila kutola mulumbe mubotu kusimpila nyika. Inga twabona kuti tulilibambilide kwiinda mukusoleka kwaamba caano cesu mbuli mbotumuzi Jesu alimwi akwiinda mukulibambila kwaamba oobo Leza mbwakacinculula maumi eesu. Aabona kamboni wesu inga kali kamboni wakaumu umu eelyo bantu nobalangilizya buumi bwesu. Mulumbe wa luumuno mulumbe wa lukamantano akuba antoomwe. Satani uyanda kuleta lwandaano amanyongwe. Kwiinda mukweenda munsu munsu a Jesu, inga twaleta lukamantano akuba antoomwe kuli koonse nkotwaya kunze buyo amulumbe wakwe mubotu. Inga twatola lubazu mukucita zytondezyo zya luyando zyalo zzyiyosandula mulimo wa satani.

Ntobo ya lusyomo

Kubweza ntobo citwaambila kuti tulalwanwa. Kulwanwa inga kwazwa ku lubazu luli loonse – mujulu, akati, ansi, mumbali –

eelyo inga twabelesya ntobo kuli kwabilila. Basikalumamba ba ci Roma bakaswaanganya ntobo zyabo akupanga bwaanda eelyo bakalikwabilila. Satani inga wacita cili coonse ncakonzya kutegwa tudonaike kasimpe ka Leza, pesi lusyomo lwesu muli Leza inga lwatukwabilila, muzyiindi zyili zyoonse motwalijana. Lusyomo caamba kuti twasala kusyoma Leza.

Cisoti ca lufwutuko

Cisoti, kunze buyo kwa kukwabilila mutwe wenu, cigwasilizya kutondezya nkamu nkomuzulilwa. Ncecitaanzi ncomuzubulula ciindi nomuyubide. Cisoti cesu ca lufwutuko citondezya nyika kuti tuzulilwa ku nkamu ya Leza. Satani uyanda kutuunsya mbuli bana Kristu pesi lufwutuko lwesu lulibambidwe mu ciingano ca Jesu. Nociba buti citupenzya, kwiina nociba comwe cikonzya kutwandaanya ku luyando lowa Leza akutola lufwutuko lwesu.

Cceba lya muuya

2 Timoti 3:16 yaamba kuti, ‘Malembo oonse aliyoyeledwe a Leza alimwi mabotu ku njiisyo, koombolozya, kunyona akuyiisya bululami’. Inga twabelesya jwi lya Leza kulwana mulwani. Eeci ncacali kucitika mu caano cesu ku matalikilo eelyo Marina nakabelesya kasimpe ka jwi lya Leza kulwana majwi nga kali kumvwa. Alimwi buya ninzila iimwi yalo Jesu njakabelesya eelyo nakasunkwa a satani. Inga mwabala kunji kwa caano eeci muli Luka 14:1-12.

Cibalo cilasimpa kwiinda mukutwaambila kuti tweelede kupaila muzyiindi zyoonse. Kuli koonse nkomubede, cili coonse ncomucita na kuyeeya, mupailo ncecilwanyo ciinda nguzu. Inga twaamba kuzunda kwesu na makatazyo eesu kuli Leza walo uumvwa. Jesu ulatupailila ciindi coonse kuli Usyi Leza.



10
tuvwalu-
vwalu

Kubandika

Mutubunga twa 3 na 4 mubandike nzila zytunga twabelesya kuzyiba mulwani wesu mpoona alimwi mubandike nzila zytunga twabelesya ntobo ya Leza kuli kwabilila. Mibuzyo iccilila inga yaba alugwasyo:

- Amuyeeye mukonzyanyo wa kaambo kakubeja nokakaleta makatazyo?
- Amuyeeye ciindi eelyo zyilongwe nozyakanyonyoonwa mpoona kwakaba macise?
- Amuyeeye ciindi nomwalijana mukudonaika kuti na Leza mubotu?
- Ku zyiindi zyoonse eenzyi, muyeeye na kuli ciindi nocakali kuletwa muuya kutegwa kube kupenga akulicisa.
- Ku zyiindi zyoonse eenzyi, ncibeela nzi ca ntobo cakali kukonzya kugwasya?
- Micito nzi njotunga twabweza ya ‘kusama ntobo ya Leza izulide’?



5
tuvwalu-
vwalu

Cakucita

Mulombo uumwi abale Ba-Efeso 6:14-18 ku kabunga. Eelyo nocibalwa, mulombe boonse baimikile eelyo bacite micito yoonse njobabamba itondezya zyibeela zyantobo.



10
tuvwalu-
vwalu

Mupailo

Mubalisye mupailo ooyu, mwaambile kabunga kaindulule kubala mwamana. Inga mwabakulwaizya kutondezya micito kuzwa ku cipeto ca mumutwe mbuli citondezyo ca kusama ntobo.

Taata Uuli ku julu, ndilizyi kuzwa ku mulimo wa Jesu Kristu kuti satani antoomwe abasiciiya mbalwani bazundidwe. Alimwi ndilizyi kuzwa ku jwi lyenu, Ibbaibbele, mulwani

ulazumanana kwendeenda munyika akutulwana. Jesu, ndalomba lugwasyo lwako mukusama ntobo – cisoti ca lufwutuko, mutiba wa bululami, ntobo ya lusyomo, mabbusu amulumbe wa luumuno, lutambo lwa kasimpe, alimwi acceba Iya Muuya kutegwa ndikonzye kuzunda mulwani eelyo aunke.

Ndakulumbaizya, Jesu, kukuzunda kwako, kuzundilwa limwi kwa mulwani, eelyo ndakwiita ooko kuzunda kube kuli ndime mbuli mbwecaala muli nduwe. Amen.

Alimwi mbweena mbuli kusama ntobo ya Leza tweeledede kuzwa ku tukumbatizyo totujisi a satani, mukuzyiba na mukutazyiba. Mikonzyanyo ya zyezyi inga yaba mate mabi, kusinganya, kuya ku mang’anga na kutola lubazu mu misyobo ya bupaizi iitali mibotu. Nciyandisi kulomba Leza kuti amugwasye mwanguluke ncobeni eelyo mweende mulwaanguluko. Eeci inga cajatikizya kweempwa ku bukandu, kuzwa ku tukumbatizyo twa nguzu zyiinda ali zya muntu buyo na ku mizimo itali Muuya Usalala.

Lino tulaba acoolwe ca kuzwa kuli coonse eeco cijatililide ku buumi bwesu. Tuya kucicita eeci mu tubunbga twesu. Na kuli cimwi ncomulimvwa kutakonzya nkwaamba mu kabunga kenu pesi mulasyoma kuti Leza uyanda kumwangulula, inga mwazyamba eezyi zyintu mumoyo wenu (kwiinda kwaambisya) na inga mwaboola mwabandika abasololi ba kabunga camana cibeela.

Bantu kabala mutubunga twabo, mubasolwedele boonse mu mupailo wa kulitantamuna kuli mcoonse cijatililide ku buumi bwesu.

Mwami Jesu, ndatula zyintu eenzyi:

(Mwiite bantu boompole na mukawiiwi mummyoyo yabo cili coonse ncobazyi mu buumi bwabo cita luleme na cibi.)

Ndapa kuli nduwe eenzyi zyintu, Mwami.

Ndalumba kundangulula.

Amen.

Mbuli tubunga notucita ceeci, inga mwabona kuti bamwi bantu bajisi buyumu yumu kuzwa ku mabazu asiyene siyene, mbuli kui tabakonzyi kuzwisya majwi mukanwa. Bamwi inga balibonya kutakkomana. Mulakonzya kubona bamwi bantu kabatondezya bube butaluleme; cili mbuli kuti muuya walitondezya muli mbabo. Cili coonse citi citike, muyeeye kuti Mwami Jesu Kristu ngu endelezya. Mutayoowi na kubijilwa. Mwaambile buyo muuya uumune eelyo uzwe mu muntu muziyina lya Mwami Jesu. Inga titwa cita zyintu eenzyi munguzu zyesu; munguzu buyo zya Jesu. Nowazwa muuya mu muntu na muntu wacimidwe akkalikana, nceciindi cakulomba Muuya Usalala kuti uboole uzule mu muntu ooyo. Eeci nciyandisi alimwi ciya kubona kuti ooyu muntu uya kweenda mucilongwe cakwe a Jesu.



Cakucita iino mvwiki

Iino mvwiki mwindulule micito njomwakapanga ya ntobo mafwumina oonse nomwabuka. Mulombe Jesu amutondezye bulwani buli boonse buzwa ku mulwani alimwi bubelesye ntobo njomusamide. Njeeyi mikonzyanyo misyoonto ya ncocinga caamba eeci:

- Nomwamvwa bubeji, mwaambe kasimpe.
- Nomwadonaika bubotu bwa Leza, mubale cipeto mu Bbaibbele cimuyeezya kasimpe.

- Kuti na cilongwe cenu a Leza na aumwi muntu tacili kabotu, mube aciindi cakulilekelela akucibamba kuti cilulame.
- Nomwalimvwa kukongwa, mupaile.



Kamboni

Bunji bwa zylwanyo Leza zyatupa zya kulikwabilizya ku bulwani. Nkocili comwe ciimpene. Twaambilwa kubonenesya kuti matende eesu alilibambilide ku mulumbe wa luumuno. Eeci cijatikizya kuunka mukwabanya makani mabotu aa Jesu kuli bamwi.

lino mvwiki mubambe ciindi ca kupailila muntu walo utamuzyi Jesu, busena bwalo butajisi mulumbe wa luumuno na ooko kwalo cibi nkocilibonya. Mumupailile ooyo muntu na busena oobu kulomba Leza kuti amucince. Nomwamana kupaila, muunke mukabandike amuntu ooyo na musoleke kuleta luumuno mu busena oobo. Muunke muluumuno eelyo mukape luumuno.

Muyeeye KUSYOMA Leza eelyo nomucicita eeci. Tamukonzyi kulicitila munguzu zyenu. Mweelede kusyoma buyo muli Leza – eeyi ninkondo ya muuya!

Kubala kwa kulisalila

Kuti bantu kabajisi ciindi akukonzya kuba a Bbaibbele (na mulongwe ujisi Bbaibbele) zyeenzi zymwi zypeto zyobanga babala kutegwa zyibagwasye kuzyiba mulimo wa satani awa Leza:

Mulimo wa satani²

- Johane 10:10
Kunyonyoona a lufwu
- Luka 22: 31;
Ciyubunozyo 2:10-31;
Mpezyo
- Mateo 4:1; 1Ba-
Korinto 7:5 Masunko
- Johane 13:2; Luka
22:3 Kwaaba Jesu na
bana Kristu
- Matalikilo 3; Incito
5:3; 2 Ba-Korinto 2:9-
11; Ba- Efeso 6:11
Tooze abubeji bwa
satani
- Mateo 16:22-23
Kukaka akukaka
ciingano, kutobela
nzila ngubauba

Mulimo wa Leza

- Johane 10:10 Buumi
buzulilide
- Intembauzyo 9:9
Kuyumizyigwa mu
mapenzi
- Jakobo 1:13 Leza
tasunko
- Ciibalusyo 7:9 Leza
ulasyomeka
- Johane 14:6 Jesu ngo
masimpe
- Mateo 7:13 Kutobela
nzila imanikide, nzila
njumu, akuzumina
Jesu citole ku buumi

²Cikolo ca Bbaibbele ca Brisbane (2013). *Secrets of Spiritual Warfare: How to destroy the flesh, defeat the world, and cast out demons!* (Maseseke Aa Nkondo yak u Muuya: Bwa kunyonyoona nyama, kuzunda nyika, akutanda zyeelo!) [Akasabwi] Cilajanwa mu: <http://bst.qld.edu.au/wp-content/uploads/2013/08/SpiritualWarfare%20PowerPoingt.pdf> [Cakajanwa mu 6 Guwo 2018]

- Mateo 4:8-10
Kukomba zyimwi
zyintu antoomwe a
satani
- 2 Ba-Korinto 11:14; 2 Ba-Tesalonika 2:9
Kulibonya mbuli
mungeli wa mumuni
(bubeji, bucinculuzi)
- 1 Ba-Tesalonika 2:18
Kunyonyoona mulimo
wa mulumbe
- (Caano ca) Joobo
Kubejekezya
akunyonyoona
- 1 Makani 16:25; Kulonga 20:2-3
Kukomba Leza alikke
- 1 Johane 4:7-21; 1 Ba-Korinto 13:4-8 Leza
ngu luyando
- Ba-Roma 1:16
Mulumbe ni nguzu
zya Leza
- (Caano ca) Joobo
Mulengi usyomeka, a
Mwami wa cileleko

Bulembo

Kupailila Cooko cesu



'Kukusaanguna ndiyandisya kuti kucitilwe bantu boonse zikombyo ankumbilizyo ankombelezyo akulumba.'

1 Timoteo 2:1



Kulibambila

Ncomuyandika mucibeela eeci:

- Cibeela ca pepa cipati, na tubeela tusyoonto tomunga mwaswaanganya antoomwe.
- Cilembyo cisimbisya.

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?
-



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kwiiya bwa kupaila kutali buyo kwesu, pesi kwa cooko cesu, kutegwa ziyanda baabo batuzingulukide zyiletwe kuli Leza eelyo buumi bwakwe bupya buboole.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonto, mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zyilamfu kabunga zyokati tobelezye kusikila limwi

boonse bacizyibe lwabo. Mukulwaizye bamwi bantu kusola kwiindulula muli lwabo.

Kukusaanguna ndiyandisya kuti kucitilwe bantu boonse zikombyo ankumbilizyo ankombelezayo akulumba.

1 Timoteo 2:1



Caano

Mubale caano citobela ku kabunga:

Kwa ciindi Pete amukwasyi wakwe nobakalongela mucooko ca basimukonyina, ulabungika bantu antoomwe kuti bapailile ziyiyanda beenzyinyina abasimukobonyina. Aabona bapailila buyo muntu 1 na 2 na zyiindi zzybazyi. Zyimwi zyiindi balapilila misyobo ya zyintu zyiindene, kulomba Leza kuti azubulule kuli mbabo zybatalangilwi kuzyiba.

Cimwi intu ncobayandisya kucita nkweendeenda mucooko akupaila nobeenda (eeci ciitwa kuti mupailo wakweenda). Aabona baloompolola mukupaila, aabona balapila muka wiiwi. Bunji bwa zyiindi, mbuli mbobazinguluka balaswaana bantu mbobatali kulangilwa kubona kwa ciindi na kubona zyintu zybatali kulangilwa kuzyiba eelyo nobataninga talika kuzyipailila.

Mvwiki zyisyoonto zyainda Pete abeenzyinyina bakazwa ciindi ca masikati. Bakabona bantu bakubusyi banji kabatalika kubungana mubusena, bamwi ama Honda, bamwi amacinga, bunji babo kabajisi azyilwanyo. Cakalibonya buya kuti twakali tubunga twa bantu 2 katubungana eelyo cakaboneka kuti bakali kuyanda kulwana.

Pete abeenzyinyina bakasala kuunga abusena aawo bakubusyi mpobakali kubungana. Bakajana ciindi ca kupaila kuli Leza kuti

abaandaanye alimwi alete luumuno mu cooko. Cakatibe ca mpoonya mpoonya mipailo yabo yakaingulwa: kulimvwa kwa bunji bwabo kwakalibonya kucinca. Alimwi buya bamwi babaabo batakaunka bakatalika kubandika a Pete abeenzyinyina kujatikizya lusyomo lwabo lwakaleta coolwe cakwaabana buumi bupya bwalo mbobakamvwa alimwi a Leza uleta luumuno kutali buyo ku maumi eesu, pele ku cooko cesu coonse.



Luzyibo lwa mu Bbaibbele

Mubale 1 Timoteo 2:1-8 ku kabunga:

¹Kukusaanguna ndiyandisya kuti kucitilwe bantu boonse zikombyo ankumbilizyo ankombelezyo akulumba, ²Amukombele bami abaabo boonse bali mubwami, kuti buumi bwesu bube bwaluumuno akutontola, tukale kabotu akulemeka Leza, ³Eci ncibotu akutambulika kuli-Leza Mufutuli wesu, ⁴uuyandisya kuti bantu boonse bafutulwe akuboola kuluzibo lwakuziba lusinizyo. ⁵Nkaambo kuliide Leza omwe luzutu, alimwi kuli sikuyanzanya omwe uuli akati ka-Leza abantu, ngumuntu Kristo Jesu, ⁶uwakalisanga mwini kuti anunune bantu boonse, Eci ncecintu cilyaamba cini muciiindi caco. ⁷Kumakani aya ngendakabikilwa bukambausi abuapositolo (ncobeni ndasinizya, nsibeji pe) akuba mwiiyi wabamasi mubuzumino bwini.

⁸Eno obo ndayanda kuti baalumi kabanga kabakomba koonse koonse, kabagamine kunyamuna maboko aasalala, kakutakwe bukali akuzwangana.



Mu cibalo ca mu Bbaibbele, siciiya Paulu walembela musololi wa cikombelo mwana mwana Timoteo kumutondezya

akumukulwaizya mumulimo ujisi makatazwo wa cikombelo. Ulabelesya bbala lya 'boonse' kanji kanji, kutwiibalusya kuti twakaitilwa kupailila bantu boonse nkaambo Leza uyanda kuti boonse bafwutuke alimwi akuti Jesu wakafwa aciingano kutegwa eeci cicitike. Boonse wiiminina boonse: bajisi kabotu abatajisi; bayiide abatayiide; bavwubi abacete; babotu ababi; bapenzya abapenzwegwa. Kufwumbwa mbobabede tacikwe makani kuli Leza kayi walo uyanda kuti boonse batambule eeco ncobajisili. Ulabayanda eelyo andiswe tweeleda kubayanda. Ncinzi ciinda kuyandika kunze lya kuboola kuli Leza mumupailo akubalombela?

Alimwi buya akupailila bamwi muzyooko zyesu, Paulu utukulwaizya kupailila bali mubusololi amfwulumende itulela, nokuba kuti tatuzuminizanyi. **Kuti twapailila luumuno abusongo kuli boonse bali mubulelo, kuti bamuzyibe Leza alimwi abacinculule, nkunji buti kucinca nkotukozya kubona?** Kutali buyo mumaumi eesu, na maumi amuzyooko zyesu pele muzyisi zyesu, masi eesu, anyika yoonse mboizulwa.

Jesu wakatuyiisya akupailila balwani besu, ababaabo bamupenzya. Eeci cilasyupa kucita pele cileelela kuyeeya kuti mukukulwaizya kwa Paulu kwa pailila 'boonse' bantu. Leza inga wamugwasya kupailila baabo mbomujana buyumu yumu. Mulakonzya akubelesya zyipo zyenu zya muuya kumugwasya kupaila, mukonzyanyo ngwa kuti ambweni mubulilwa mabala aali kabotu akubelesya inga mwapaila mumilaka na kupa cisysinymi mumangwalo ku bantu azyiindi.

Kuzwa muzyooko zyesu kuya bupaila cakweenda inga caba cibelessyo cikali kupa bumbonikuli baabo batuzingulukide, alimwi abutondezi bwa nguzu zya Leza mubusena oobo. Mvwiki yakainda twakalanganya nkondo ya muuya amulwani wesu

satani. Awalo ulayandisisya kuyunga bantu muzyooko abasimukobonyina boonse. Nokuba boobu, tuyanda Leza kuti ajanwe alimwi aleleke masena aayo ngotwalyata (Joshuwa 1:3, Ciibalusyo 11:24) alimwi antoomwe abantu boonse mbotuswaana munzila.



15

tuvwalu-
vwalu


Cakucita

Mujane cibeela ca pepa cipati, na mubelesye tubeela tunji. Aawa muya kweenga maapu nguba uba.

Mutalisye kubandika ali ncomuzi ciliko mucooko cenu; mutalisye minzi amasena oomu mukkala bantu ba mukabunga mpoona mweenge eeco ncomubona kuba ciyandisi alimwi aceeco citali ciyandisi boobu!

Mwiiyake eeyi maapu pele mutapengi naitalibonyi kabotu nkaambo njiyenu akabunga kuti igwasye kupailila cooko cenu.

Ngooyu mukonzyanyo wa maapu yenu mboiti boneke. Lino yenu yendelane acooko cenu.



Kuti kamukonzya kuyobola maapu njo mweenga antoomwe inga mwaibelesya kupailila cooko cenu muziindi zyimwi.



Mbuli mbotwaiya kale, kuli buyo Leza omwe, eelyoinga twamupaila kwiinda mu mwana wakwe Jesu walo wakatutondezya kale luyando lwakwe kwiinda mukutufwida toonse. Tuli kamantene mbuli babunyina abaina ndumi nokuba kuti tuzwa ku zykombelo zyiindene, aboobo inga twaboola boonse kuli nguwe mumupailo. Mupailo taweelede kuba cintu cibambilidwe; nkuboola buyo kuli Leza, kukanana anguwe akuswiilizya mbwatwiingula.

Jesu wakayiisya basiciya bwa kupaila eelyo cibeela caboobo nceeci 'bulelo bwenu buboole, luyando lwenu lucitwe, anyika

mbweena mbuli ku julu' (Mateo 5:10). Kupailila cooko cenu abantu bazwidilila nkuleta julu mumsi mumsi anyika.

Bwami bwakwe buboole mucooko cenu.



Cakucita

20
tuvwalu-
vwalu

Lino nciindi cibotu ca kusoleka mupailo wa kweenda antoomwe. Mube mutubunga tusyoonto twa bantu 3-4.

Mupaile antoomwe nomutaninga nyamuka, kulomba Leza kuti atondezye zyiindi na bantu balo mbayanda kuti mupailile na kubandika limwi.

Mpoona muunke mukacite oobo – pesi inga mwapaila mbuli mbomulimvwa kwaanguluka, mumutwe wenu na koompolola. Muyeeye kuti na mukanana amuntu ciindi citaanzi musaangune mubuzye na inga bayanda kupaililwa.

Mujoke kwainda tuvwalu vwalu tuli 15 – 20.



Mupailo

10
tuvwalu-
vwalu

Eelyo nyoonse mwajoka mubuzye bantu baambile kabunga cacitika ciindi ca mupailo wa kweenda. Mubelesye maapu, atwaano twenu twa mumupailo wa kweenda, zyimugwasye kupailila antoomwe akupailila bantu baidene, masena azyintu zyili mucooko cenu. Nomupaila, kuti Leza abikke uumwi muntu, cintu na busena mu moyo wenu, musanganye acalo amaapu.

Na kacikonzyeka, mukulwaizye bantu bafotole cifwanikiso ca maapu kubelesya mawaile aabo kutegwa bakabelesye cifwanikiso ca maapu ku cakucita ca mvwiki iino.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki, mutubunga twa bantu² na 3, mujane ciindi cinji ca kuzinguluka mubusena momukkala mupailile bantu azyiindi. Na mwakacikonzya kufotola cifwanikiso ca maapu inga mwacibelesya mbuli ciibalusyo ca zyintu zynomwakapilila antoomwe. Mulembe cili coonse eeco Leza ncatibikke mumoyo wenu eelyo mucisanganye ku maapu mwakuswaangana ciindi ciboola.

Kuti kamutacizyi ca kupailila mupailile buyo zyileleko ku bantu amasena.

Mutapailili masena aali kule, muunke kuli ngayo mpoona mupaile. Inga mwabona muntu na cintu cipya na Leza inga wamupa cifwanikiso, bbala na cipeto camu Bbaibbele.

Zyintu zyoonse zyicinca maumi aa bantu zyiletwa aa Leza, mulembe eenzyi amaapu mbuli bukulwaizi alimwi akutwaano twa kubelesya muciiindi ciboola muzyintu Leza zyacita mucooko cenu.



Kamboni

Kuti muswaanganye uumwi alimwi kamujisi coolwe, mumwaambile ncomucita eelyo mumubuzye ncanga wayandila mupailo. Mulupe kumupailila eelyo mupailo ube muba uba eelyo mulombe eeco ncayanda. Na alibonye kutaliiba kupaililwa, mulipe kumupailila cileleko.

Na ayande kuzyiba kunji eelyo kajisi mibuzyo minji musale kujana ciindi ca kuba antoomwe ooko nkomunga mwakupandulula buumi bwa Leza buli muli ndinywe alimwi ambwakamuleta kuti muzyoobapailile mucilawo cabo.

Bulembo

Kamboni – nkaambo Nzi alimwi mu Buti



'Nkaambo Bwami bwa-Leza tabuli
bwakwaamba buyo pe, mbwanguzu.

1 Ba-Korinto 4:20



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?

Zyomuyandika:

- Mancisi na nkomeki ya meenda



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kuzyiba toonse tuli jisi kaano komwe kalibedeledede nkotunga twaamba kujatikizya buumi bwesu bupya muli Jesu, alimwi amulimo wakwe mucooko cesu. Ndiswe bakamboni ku mulimo wakwe eelyo kwiinda mukwaabanya twaano azyakatucitikila, bantu banji banji bayoobuzyiba oobu buumi lwabo.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Nkaambo Bwami bwa-Leza tabuli bwakwaamba buyo pe,
mbwanguzu.*

1 Ba-Korinto 4:20



Caano

Mubale caano citobela ku kabunga:

Mu Kkumbi pati 2011kwakali bulwazi bubi mu Kambwali,
Kunyikaa Zambia. Bana bakali kufwa cigambya. Bali 17
bakalifwide kale. Kwiina wakazyi cakali kuleta kuciswa. Cakali
kulibonya mbuli bulwazi bukali bwakali kuleta kunokola alimwi
akucisa kapati mwida eelyo cakali kujaya kuli baabo bakacisidwe
kuli ncico.

Bunji bwa bantu ba mubusena bakalikusyoma kuti Mwami wa
busena wakali kuyandaula kuti abe aa nguzu zyinji eelyo
wakalowa bana kutondezya nguzu zyakwe. Nkamu ya bantu
yakazanga akanyuka kuya ku ng'anda ya Mwami kuya kumuuma.

Nkamu alimwi yakazangila ba Kabunga ka Buumi ka Dignity mu
busena. Kabunga ka Buumi kakali kusoma Bbaibbele, kupaila
akubelekela antoomwe ku bubotu bwa cooko kwiinda mukuyaka
lukamantano alimwi akulanganya bapenzi. Mbuli kabunga
mbokakali kukomena, bantu bakatalika kukakazy nkaambo
bakali kubona kuti inga kakaya kuba aa nguzu. Mavwambukila
akamvwika akuti kabunga kakali ka bana Satani eelyo mpoona
mpoona kabunga kakatongookwa ku lufwu lwa bana lugambya.

Aciindi eeco, uumwi uzulilwa muli ba Dignity wakaswaya Kabunga
ka Buumi kuti abakulwaizye. Kaciliko Kabunga ka Buumi
kakabungana kuti bapailile antoomwe eelyo bakatmba abamwi
bantu ba mucooko. Bakaswaana kuti bapaile mafwumo fwumo
acikolo ca mucooko.

Nobakamana kupaila antoomwe kwiina naba omwe mwana wakafwa ku bulwazi!

Bantu ba mubusena bakaindila kunyandwa mbuli mbobakabona mipailo ya Kabunga ka Buumi kaingulwa mu mazuba akaccilila. Boonse bakazyiba kuti bana Kristu bakapailila antoomwe eelyo bakabona kuti bulwazi bwakamana nobakapaila bana Kristu.

Nkamu yakazangilide Mwami a Kabunga ka Buumi yakabona cakacitika eelyo yakaaleka makanze aayo.

Mwami wakaanguluka kubona kuti bana bakaleka kufwa alimwi akubona luumuno kalujoka mucooko. Wakaambila bamwiiminina kuti babandike aba Kabunga ka Buumi mu Kambwali eelyo akutalika tubunga tukonzanya mumasena manji kutegwa bamwi baiye mbuli mbwakabona bukali bwa Leza.

Leza wakakwabilila bantu bakwe ca nguzu eelyo bulemu bwakwe bwakamana lufwu lwa bana lwatakali kuyandika kuzwa ku bulwazi butakwe luse. Akaambo kabubelesi bwa nguzu zya Leza mucooko kwiinda mumipailo, nkamu iizangi antoomwe a Mwami bakatola bumboni bwa Nguzu zya Leza. Bakaambila bantu banji, azyooko zyinji zyizingulukide zyakaabona makani mabotu aa Jesu.



Luzyibo lwa mu Bbaibbele

Mubale Incito 1:18 ku kabunga:

Kwalo muyootambula nguzu, wasika alindinywe Muuya Uusalala, muyooba bakamboni bangu muno mu-Jerusalemu, amu-Judaya moonse, amu-Samariya, mane kusikila kumamanino aanyika.



Kutola bumboni ninzi?

Kuba kamboni caamba kuti wakabona na kucitikirwa cimwi cintu calo eeco ncomunga mwaamba. Kanji kanji twaamba bakamboni kujatikizya kucita mulandu; aabo bakacibona kacitika balaitwa kuya kupandulula mbocakabede munkuta. Kamboni oonse ulijisi mbwacilanga cintu bwiindene, mbweena buyo mbuli umwi aumwi wesu mbwajisi caano ca Leza mbwaabeleka mumaumi eesu. Toonse tuli jisi cakwaamba kujatikizya buumi bupya mbotubona kwiinda muli Leza mbuli mbotwaamba ncotuzyi, Leza uyakubamba zyoolwe kuli bamwi kutegwa abalo baboole bazyibe.

Jesu wakati,

‘Ndinywe mumuni wanyika. Munzi uyakidwe atala acilundu tuukonzayi kisiswa. Alimwi bantu nibamunika ilampi tabalibiki muni lyalusuwo, pe, balalibika acibikilo kuti limunikile boonse bali munjanda, Mbubonya obo mumuni wanu umunike kunembo lyabantu, kuti babone milimo yanu mibotu, balemeke Usowanu uuli kujulu.’

Matayo 5:14-16

Toonse tuli jis mumuni muli ndiswe, nokuba boobo aabona inga twafwa nsoni, kusampuka na kuyoowa kwaamba ncaatucitila. Kakuli tuyeezyegwa kuti tweeleda kuli bambila kupa bwiinguzi kuli baabo babuzya alulangilo ndotujisi ([1 Petro 3:15](#)). Mucibeela eeci tuya kulanga twaambo tumwi twa mbotukonzya kulibambila kwaamba ncaatucitila Leza. Eeci cijisi majwi antoomwe amicito mbuli cipeto cesu ca mu Bbaibbele mbocitutondezya – taali buyo majwi (nokuba kuti majwi eesu mayandisi), cilajatikizya anguzu, ooku nkokutondezya Bwami bwa Leza buboola.

Muzeezo mupati wa buumi bwesu ngwa kuba mbuli Kristu, aboobo inga twalanganya mbuli Jesu mbwakatola bukamboni ku bantu mbuli mukonzyanyo. Jesu wakaboola kuzya kuyandaula akufwutula bakasweekede. Wakalibonya kuli mbabo munzila amuzyiindi zyiindene.

Bukamboni bujatikizya micito amajwi. Eeci Jesu wakacitondezya. Ku matalikilo aa bbuku lya Incito, mulemi Luuka waamba kuti mubbuku litaanzi wakalemba kuti ‘zyoonse Jesu yakatalika kucita akuyiisya’ (Incito 1:1). Tulizyi kuzwa ku buuku lya Jakobo kuuti lusyomo lutakwe ncito lulifwide (Jaboko 2:17). Bbuku lya Ciyubunuzyo alyalo liyiisya bana Kristu kuti bakazunda mubyaabi kwiinda ‘mubulowa bwa mwanaa mbelele alimwi aluyando lwa cakabacitikila’ (Ciyubunuzyo 12:11). Eeci caamba kuti cakatucitikila, caano cesu, cilaanguzu yakucinca maumi eesu. Bunji bwa bana Kristu tabasyomi nguzu zya caano cabo.

Nkaambo nzi ncotutolela bumboni?

Leza ulatutuma ku bantu boonse kutegwa tube bakamboni bakwe. Tatuciti eeci nkaambo kakuti buumi bwesu kujulu mpobulede; pele, twakapegwa mulimo wakwaabanya buumi bwa Jesu aBwami bwakwe ku muntu oonse. Leza mulengi eelyo lyoonse uyandaula zyoolwe zyakulengulula buumi mubantu azyooko, eelyo ubelekela antoomwe andiswe kuti eeci cicitike.

Mutola buti bukamboni

Mwiki yoonse mbuli cibeela ca **Matalikilo** tuli jisi cibeela ca bukamboni. Eeci lyoonse inga cili mbuli mulimo wamicito oobo mbomunga mwamwaya majwi na micito yenu ya cintu cipya ncomwatambula kuli Leza. Muzibeela zynji zyili kunze twasola kutondezya mbomunga mwatola bukamboni ku lusyomo lwenu lupya.

Comwe cintu ciyandisi ncomweelede kucita nkuli fwoola kuli cakamucitikila kutegwa kuti mubaubilwe, akufwambaane, kwaambila bantu lusyomo lwenu mbolubede.

Cakamucitikila ncaano ca mbuli mbomwakaswaana Jesu alimwi ancakamucitila mubuumi bwenu kusikila lino.



15
tuvwalu-
vwalu

Cakucita

lino mvwiki tuya kulifwoola kupa cakatucitikila mubufwaafwi.

Kanji kanji bantu tabayandi kumvwa zyaano zyilamfwu, aboobo tuya kubikkila kapati maano ku majwi mapati pati mucaano cesu kutegwa tubweze mulumbe muyandisi.

Muyeeye mbomunga mwaingula mibuzyo itobela:

- Bwakali buti buumi bwenu kamutaninga swaangana a Jesu?
- Mwakamuswaanganya buti?
- Ncinzi cacinca mukuti Jesu wamuletela buumi bupya?

Mutubunga twa bantu 3 na 4, muntu oonse alifwoole kwiingula mibuzyo eeyi 3 muciiindi eeco citola kancisi kupya na kuzula kwa nkomeki mpati kuti meenda kaatilwa asyoonto asyoonto. Kuti kamutajis kancisi na nkomeki ya meenda, inga mwabelesya cipimyo ca ciindi ca munkoloko eeco citibikkwe atuvwalu vwalu 2 na tusyooonto.



Zyimwi nzila zytunga twabelesya kutola bukamboni nkubelesya zyipego zyesu zya muuya, kwiinda mukutondezya nguzu zya Leza alimwi akwiinda mukukkala bwandeene abaabo batuzingulukide. Maumi eesu alimwi amajwi eesu alakanana kunji kujatikizya bubelesi bwa Jesu muli ndiswe.

Eelyo Jesu naapona muli ndiswe kwiinda mu Muuya Usalala, nkokuti inga watugwasya akutulailila kubelesya jwi lyakwe. Inga twabikkila maano ku jwi lyakwe akusyoma kuti uyakupa nguzu zyeede kutondezya bube bwa majwi eesu.



10

tuvwalu-
vwalu

Kubandika

Mutubunga twa bantu 3 na 4 mubandike mibuzyo itobela:

- Nkaambo nzi ncomunga mwajanina buyumu yumu kupa bumboni ku lusyomo lwenu?
- Inga mwatuzunda buti ootu tumwi twaambo?
- Mbubuti Leza mbwacinca buumi bwenu kuzwa nomwakalipa kuli nguwe?
- Mabazu nzi aa buumi bwenu ngomuyeeza kuti Leza weedelede kwaacinca?



5

tuvwalu-
vwalu

Mupailo

Mwaambile kabunga kaimikile kapange kakweya mpoona akujatana maanza. Eelyo nobaimikila antoomwe, mubaambile bairiduluzye mupailo ooyu mubauba.

Leza ooli muli ndime,
ndigwasye kuba kamboni wako;
cinca buumi bwangu, majwi aangu amicito yangu
kutegwa eelyo bantu bandilanga, bakonzye kubona nduwe.
Amen.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki muzumanane kwaabanya cakamucitikila kuli bamwi ba mukabunga. Muzumanane kusoleka kusikila limwi mucikonzye

kuyeeya kakutakwe buyumu yumu bwa kukonzya kucaamba cakubinda.




Kamboni

Zyoonse zyakucita zyotwacita kale misyobo ya bukamboni! Mwiki yakainda twakacita mupailo wakuyabweenda akuya bukanana ku bantu eelyo katweenda. Muunke aliwmi kamuya bupaila. Mulombe Leza amupe coolwe ca kukonzya kwaambila uumwi cakamucitikila ooyo weelede kuzyiba mbuli Leza mbwali mubotu amwayandisisya maumi eenu. Muyeeye kuti tamuli nyolikke – nguzu zya Leza zya Muuya zyili muli ndinywe. Eelyo nomwaabana abamwi, mubabuzye nakuli cimwi ncobayanda kuti Leza abcitile mpoona mupaile kuti cicitike.

Bulembo

Kamuya Mukaambile Bamwi



'Wakabaambila kuti, Kutebula nceo, pele basimilimo mbace, nkaako amukombelele Mwami wakutebula, kuti atume basimilimo mukutebula kwakwe.'

Luka 10:2



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci ngwa kubona bakonzya kuunka kuya kwaambila bamwi buumi bupya oobo Jesu mbwakomezya muli ndinywe. Nokuba kuti mpafwaafwai na nkule, mubuzuba abuzuba na munzila zyandeene, toonse tuliitidye kuti twaambile bamwi lusyomo ndotujisi.



5

tuvwalu-
vwalu

Cipeto

Mubalisye cipeto camumutwe alimwi amukonzanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonto, mubone kuti kabunga kalatobelezuya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Wakabaambila kuti, Kutebula nceo, pele basimilimo mbace,
nkaako amukombelele Mwami wakutebula, kuti atume
basimilimo mukutebula kwakwe.*

Luka 10:2



Caano

Mubale caano citobela ku kabunga:

Kwakali mwaalumi wa zyina Iya Nat walo, mubuumba,
wakandaana amukaintu wakwe wa myaka minji eelyo nakatalika
kulitondezya kuti ulaa bulwazi Parkinton. Mbubwena buya
wakasiya ancito yakwe ya buloya akuba mu Bbuuda utakwati,
sikweenda nyendo zyilamfwu.

Kwa myaka minji, Nat wakaalilwa kujana kukkutila kuzyiyanza zya
mutempele Iya ba Bbuuda. Wakasala buyo kuti atobele bana
Kristu kwiinda ba Bbuuda. Cakufwambaana wakatalika kumvwa
buumi bwa Leza bupya mumoyo wakwe, luse ku bamakaintu
bakwe mbakaleka lwakakomena, ba muka Sonjay. Wakayeeya
kuti abandike abafundisi ba cikombelo cakwe, bafundisi ba Pitak,
akubalomba kuti bakaswaye akubapailila.

Bafundisi ba Pitak bakaunka aba Nat ku ng'anda ya Sonjay ku
munyinja wa nsumbu mbotu. Lino Sonjay wakalimanide
nkaambo bulwazi bwa Parkinton bwakali kuyaambe. Ba Nat
bazubulula bafundisi eelyo bakaba amubandi mufwaafwi
antoomwe. Eelyo bafundisi nobakaambila ba Sonjay kuti baboola
kubapailila, bakajalula meso aabo kapati akubikkila maano. Ba
Nat aba fundisi bakaimba lwiimbo lwa nguzu zya Jesu mpoona ba
Nat bakaambila ba Sonjay kujatikizya lusyomo lwabo lupya muli
Jesu. Mpoona bafundisi ba Pitak bakaamba kaano kafwaafwi ka
kuzyalwa kwa Jesu, lufwu lwakwe abubuke bwakwe.
Bakalombwa kutambika janza nabakamvwa alimwi bakali
kuyanda kujula moyo wabo kuli Leza. Bakatambika janza lyabo

zyiindi zybile eelyo ba Pitak bakabasolwedela mumupailo wa kulipa kuli Jesu.

Ba Sonjay mpoona bakayumuka mucuuno cabo akweenda pesi kabajisi mapenzi mukubatondezya bubotu bwa lwizyi. Bakali kubatondezya butambuzi bwabo bupati. Lino bafun disi ba Pitak bakazyiba kuti inga baswaya alimwi kutegwa bazumananne kubagwasya kuzyibisisya lusyomo lwa muli Jesu. Butambuzi bwabo bubotu bwakajula mulyango wa Leza kuti abeleke muli mbabo.



Luzyibo lwa mu Bbaibbele

Mubale Luka 10:1-20 ku kabunga:

¹Munsi lyakooko Mwami wakabika bamwi abali makumi aali musanu mwaabili, wakabatuma bobile bobile kuti bamusolwedele kuminzi yoonse akumasena oonse, nkwaali kukanza kwiinka mwini. ²Wakabaambila kuti, Kutebula nceo, pele basimilimo mbace, nkaako amukombebele Mwami wakutebula, kuti atume basimilimo mukutebula kwakwe. ³Kamuya, ndamutuma mbuli bana bambele akati kabaumpe.

⁴Mutabwezi zikwama, neziba nkomo, neziba ndyasyo, mutalyaanzizyi muntu munzila. ⁵Kufumbwa njanda njomuti kanjile, musaangune kuti, Luumuno alube kunjanda ino. ⁶Kuti mwali omo siluumuno, luumuno lwanu lunookede kulinguwe, kuti tamo lulamupilukila. ⁷Mukakale mumonya munjanda omo, mulye munywe nzobamusomba, nkaambo similimo uleelede cilumbyo cakwe. Mutanjilauki mumaanda. ⁸Kufumbwa munzi ngomunjila, bamutambula, mukalye nzobamusomba, ⁹mukaponye balwazi abalimo,

mukabaambawide kuti, Bwami bwa-Leza buli afwaafwi kulindinywe. ¹⁰Mumunzi umwi umwi ngomunjila, batamutambula, amuzwide kunzila zyawo muteeti, ¹¹Lusuko lwamunzi wanu ulwanamatide kumatende esu, twalukunkumwina kulindinywe, nokubaboobo muzibe kuti Bwami bwa-Leza bwamuswenenena. ¹²Ndamwaambila kuti kubuzuba obo mulandu wacisi ca-Sodoma uyooba muniini kwiinda wamunzi oyo. ¹³Maawe kulinduwe, o-Korazini, Maawe kulinduwe, o-Betsaida. Nkaambo kakuti malele mapati aakacitwa mulindinywe, anooli naali kucitidwe mu-Turo amu-Sidoni, minzi eyo neyali kusandukide kalekale, nobali kusamide masila aakulizya, akukala mwitwe. ¹⁴Kwalo kulubeta mulandu wa-Turo a-Sidoni uyooba muniini kwiinda wanu, ¹⁵Ayebo, o-Kapemauma, sena uyoosumpwidwa kujulu? Pe, uyooselusigwa kucikalilo cabafwa, ¹⁶Uumuswiilila waswiilila ndime, uutamuswiilili tandiswiilili ame, uutandiswiilili tamuswiilili uwakandituma.

¹⁷Abali makumi aali musanu mwaabili bakaboola akubotelwa bakati, O mwami, abalo badaimona batumvwa nkaambo kezina lyako. ¹⁸Wakati kulimbabo, Ndakamubona Saatani ulaloka kujulu mbuli lulabo. ¹⁹Amubone, ndamupa bwami bwakulyata nzoka atubanze, abwami atala lyenguzu zyoonse zyasinkondoma, taakwe ciyoomucisa akaniini. ²⁰Nokubaboobo mutabotelwi kuti badaimona bamumvwa, pele amubotelwe kuti mazina aanu alilembedwe kujulu.



Eelyo Jesu nakali munyika wakabelesya ciindi cakwe kuswaya madolopo aminzi minji. Wakali jisi bbonambele pati alimwi amuzeezo mubauba. Bbonambele lyakwe lyakali lya muunda ubizwide, uyelede kutebulwa. Muzeezo wakwe wakali wakutuma

basiciiya bakwe kuya kuswanganya bantu akubaambila
kujatikizya nguwe. Tibakeelede kusinkilwa na kulisyoma lwabo
eelyo wakabaambila kuti tabeelede kubweza cili coonse.
Bakeelede kujana muntu wakalibambilide kubatambula. Kuti na
bajana kukazyanya kunji inga batozya ku dolopo limbi.

Mbuli basyoma muli Jesu tuli jisi coolwe amulimo wakuba
bakamboni bakwe mumilimo ya maumi eesu. Toonse tuli jisi
beenzuma, basimukoboma amukwasyi eelyo boonse balayanda
kubona milimo ya Jesu mumaumi eesu.

Nkozyili alimwi zyiindi eelyo Jesu natwiita kuti tuunke kuya
kwiindilila mumasena oomo walo mwayanda kuunka. Inga
titwacita oobu lwesu tolikke. Ambweni Leza usolwedela
cikombelo cenu, kwiiya lbbaibbele na Kabunga ka Buumi kuti
kaswaye basimukobonyoko na mbunga ya minzi. Kuti kakuli
kuzuminana akati kenu ngu Leza umusolwedela, ino inga
mwacicita buti?

Cakusaanguna mweelede kulanga kuli Jesu akubona kuti kuli
'butebuzi'. Inga calangika mbuli kuti kwiina ulubambilide na
kuyanda mulumbe wa lulangilo pesi nkobali bantu balibambilide
eelyo tamukonzyi kubazyi ccita mane mukabayandaule. Eeci
ncencico ncocaamba kuti 'Kamuya!' (cisyoono ca 3). Caamba
kuunka akuya kusangana abamwi basyoma baya kumusangana.
Mutatyompwi na kutyolauka moyo kuti na bunji bwa basyoma
tabayandi kumusangana mpoona mpoona. Muyandika buyo
kabunga kasyoono eelyo Jesu lwakwe wakati kujana bantu aabo
babelekesya (babelesi) inga casyupa. Alimwi, mutayoowi: Jesu
wakati uyakuba andiswe muzyintu zyoonse.

Mutasinkilwi. Mubikke ciindi cakuunka eelyo mutazumizyi zyicitika kuti zyimunyonganye. Mutabwezi mabbuku manji na zyintu. Mubikkile buyo maano ku busena Leza mbwaamutondezya kuswaya. Muyeeye kubikka kusyoma kwenu muli Leza; uyomubambila nzila.

Mube amuzeezo mubauba. Tamuunki kuya kuswaya pele muunka kuya kuba amubandi uuya kupa kuti mukaambe caano cenu ca buumi bupya muli Jesu ku muntu ooyo ku busena oobo. Mucibalo caamba kujana muntu siluumuno, ooyo walo kali muntu uuya kumutambula antoomwe amulumbe wenu alimwi ambweni akuleta zyoolwe kuli ndinywe zya kumwaya mulumbe mumukwasyi na mucooko cabo. Mubone kuti mwapaila kutegwa Leza amutondezye bantu aaba.

Mubelesye nzila ngu bauba ya kubanjila. Inga mwatalika kwiinda mukubuzya bantu mbomuswaya na kuli zyintu zyobayanda kuti mupailile. Ku masena oomo bana Kristu mobatana sikide mubuzye na bakamvwa kujatikizya Jesu.

Muciindi eeco muli patide. Jesu ulati inga mweelela kulimvwa mbuli mbelele iili akati ka baumpe aboobo mutagambwi namulimvwe mbubo! Nokuba boobo, Leza ulu jisi nzila ya kujalula milyango eelyo kuti mwaswaana muntu uuya kwiingula bweelede nkokuti mwaswaana muntu siluumuno walo Leza ngwa muletela. Bwiinguzi bwakwe buya Kubota eelyo muya kwaanguluka kwaabana zynji anguwe. Mulatuyeeye bubelesi bwa tukweya totatwe mukwaabanya ntotwakaiya mucibeela citaanzi ca ***Matalikilo 1: Buumi Bwatalika?*** Inga mwabubelesya oobo bubelesi kukanana mulumbe wenu (tuya kuciswaya eeci aakale mucibeela). Na inga mwabelesya bubelesi mbotwakaiya mvwiki yakainda.

Mutaide kweenda kakwiina kuyeeya mbuli Leza mbwalombozya kuti mweende. Kuti na bamutamba ku buuya muzumi ndyoona. Leza ujalula moyo wabo. Eeco ncomwaabanya kale nciyandisi eelyo muyandika bwiinguzi. Ooku inga kwaba kuleta abamwi bantu mukabunga kabo ka mukwasyi na balongwen kuti babale zyimwi njiisyo zya Jesu mpoona bayeeye eeco ncocijisi ku buumi bwabo ambobanga bacaabanya kuli bamwi. Alimwi kamulibambilide kubapailila eelyo Leza ulaleta kuponezyegwa ku maumi aabo. Kamulibambila kuli coonse eelyo mutabikki masimpilo kuli ncakonzya kucita Leza.

Mwakajula kabunga ka munzi na ka basimukobonyina; oobu mbwakacibona Jesu eelyo nakatuma bali 72. Eelyo bakapiluka ca kunyandwa alimwi ca kukondwa nkaambo Leza wakabajulila milyango. Muyakutalika kubona kuti ooyu muzeezo ulabeleka. Nkaambo nzi ncoutakonzyeli? Ngo wakali muzeezo uutasyupi wakabelesya Jesu. Businkilizyi buyo buliko ndiswe tobamuka beni, kuti na twasyoma kuti inga ticabeleka na twalitenga kusola. Aboobo, mutayoowi, alimwi mukulwaizyigwe – Jesu wamulomba kuti muunke, uya kuunka andinywe, alimwi uli jisi butebuzi bumulindila!



15
tuvwalu-
vwalu

Kubandika

Mwaambile bantu babandike mibuzyo eeyi mutubunga twa 3 na 4. Mubale mubuzyo 1, mupe ciindi cisyoono ca kubandika mpoona bantu bape bwiinguzi bwabo. Bumwi bwiinguzi bukatazya bulipedwe kumbele aa mubuzyo oonse. Inga mwakosoola mubuzyo aumwi kwiinda mukubelesya bwiinguzi oobu kamutaninga ya kuli uumbi mubuzyo.

- Nkukuli Leza nkwanga wamutuma kuunka?

Bwiinguzi: cilalangilwa kuti Leza inga wamutuma kuunka ku busena na ku kabunga ka bantu ooko nkobatamuzyi.

- Muyeeya kuti inga mwamuzyiba buti muntu na busena?

Bwiinguzi: Muntu siluumuno muntu ooyo utamukazyi na muntu ooyo utayandi kukazyanyina lusyomo kwa ciindi cilamfwu. Ulalangilwa kubotelwa eelyo mwani kupa caano ca buumi bwenu bupya muli Jesu. Inga katali bambilide mpoona mpoona nomwayaana ciindi citaanzi.

- Inga mwaaba buti makani mabotu aa Jesu? Sena mulizyi mbomunga mwaaba mubufwaafwi munzila iikonzya kupa kuti muzeezo wa kutambula Jesu uyandike?

Bwiinguzi: Cilagwasya lyoonse kukonzya kwaaba makani mabotu aa Jesu kabotu muciiindi cisyoono mbuli tuvwalu vwalu 5 (antela kucesa) nkaambo bantu inga batyompwa na kusweeka muzeezo wa ncomwaamba. Twaambo tuyandisi mucibalo ntootu: tulaandanyizigwa kuli kwiinda mubuzangi bwesu (cinyonyoono); mukusoleka kuponya butyokausi bwesu na kutabeleka (mupe mikonzyanyo mifwaafwi); Leza wakatuma Jesu walo wakabweza bulubizyi bwesu eelyo akutujulila nzila mpya; tweelede kujoka eelyo akucitambula eeci kuti na katuyanda kukukulusyigwa kuli Leza.

- Inga mwabaambila nzi aabo bantu bakati balilibambilide kutambula Kristu?

Bwiinguzi: Mweelede kupaila antoomwe ambabo eelyo mubasolwedele kuzyiba lulekelelo lwa Leza. Mweelede kubagwasya kuzyiba kuti mbalengwe bapya muli Kristu (2 Ba-


Korinto 5:7). Mweelede kukkali ambabo eelyo mukkomanine kulipa kwabo na mupange muzeezo wa kujokela lino lino eelyo na cilakonzyeka mucuindi citaindilili ku buzuba 1.



Cakucita

15
tuvwalu-
vwalu

Sena mulaciyeeya cifwanikiso ncotwakeenga cijisi tukweya 3 mucibeela³ citaanzi mu *Matalikilo 1: Buumi Bwatalika?* **Tuyanda** kucibelesya alimwi sunu.



Kubelesya cifwanikiso eeci cubauba, mutondezye mbomunga mwaabanya mulumbe mu tuvwalu vwalu tuli 5.

³Tukweya 3 twazyifwanijiso tuzwa ku Family Church ku West Palm Beach, Florida. Ndibbuku likonzya kubelesya ciindi cili coonse alimwi inga lyalembululwa asamba uleye.

Mutalisye cikweya citondezya bube bwa Leza. Mpoona mubelesye cikweya citondezya butyokausi bwesu. Njiili nzila yabeleka kwiinda zyoonse?



10

tuvwalu-
vwalu

Mupailo

Mubale mupailo utobela ku kabunga. Muubale muzyiga zyiga eelyo mulombe boonse bairiduluzye cibeela acibeela ncomwainda kuti kabayanda kwiingula cibeela ca sunu kwiinda mukulomba Jesu kuti abatume.

Mwami Jesu,
Ndalumba kundiibalusya kuti maila abizwa.
Mundigwasye ndikonzye kwaabona ndaunka.
Mutume babelesi mbetuunke limwi, bandigwasye akundikulwaizya, eelyo mutugwayse tuunke abusicamba akubikkila maano. Mututondezya kwa kugama alimwi mutujulile milyango. Mutugwasye tukonzye kuzumanana notuyandaula kwaambila bamwi kuti inga twacikonzya.
Amen.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki mubikke kkolo ya kumuyeezya buzuba abuzuba mu luwaile lwenu kuti lyoonse mafwumina a 10.02. Eelyo noyazima, mupaile kwiinda mu cipeto cesu ca mumutwe, Luka 10:2. (Kuti kamutakwe luwaile na nkoloko muyeeye cimwi cintu ncomucita buzuba abuzuba mpoona eelyo mwacita buzuba abuzuba iino mvwiki, mwiime mpoona mupaile mipailo eeyi.)

- Mulipailile kuti mulisangene mukutebula ooko Jesu nkwanana.
- Mufwoole cifwanikiso catukweya 3 alimwi.

- Mumulombe Leza amutondezye nkwayanda kumutuma, alimwi akumuswaanganya aa bantu mbomweelede kuunka limwi.



Kamboni

Twakatalika kale kukanana abantu mucooko cesu. Twabona sunu kuti Jesu wakatutuma kale kuti tuzumanane. Muunke ku munzi uuli muni muni eelyo mukaabanye ncomucita. Kuti kakuli ngomuziyi okuya, mubambe makanze akauswaangana eelyo mumwaambile kujatikizya Kabunga kenu ka Buumi. Inga mwabagwasya abalo katalika komwe kabo mucooko cabo. Kuti kamutazyi uuli oonse, muunke buyo mukapaile ca kuyabweenda mucooko. Mbuli mbomupaila mulombe Leza amutondezye bantu mbabikkide mucooko bayoogwasya bamwi kuzyiba Jesu.

Bululami



'Pele imbeta kaziya bupoomoka mbuli maanzi,
abululami mbuli mulonga uutayuminini.'

Amosi 5:24



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kulanganya mubuzyo, ‘Ino Bululami ninzi?’ Mbweena mbuli mbotuzyi kuti Leza ngu luyando, Ibbaiibbele litwaambila kuti Leza uliluleme, eelyo uyandaula kuleta bululami munyika.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonoto, mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Pele imbeta kaziya bupoomoka mbuli maanzi, abululami
mbuli mulonga uutayuminini.*

Amosi 5:24



Caano

Caano citobela cizwisyigwa ku muteende utegwa *Times of Zambia* caletwa ku kabunga. Mupandulule kuti ncaano ca mwana musimbi, simuzyala alike, wakatumwa ku Lusaka, dolopo pati lya mu Zambia. Kataninga unka ku Lusaka taakwe nakasakeni kuzwa ku munzi wakwe.

Eelyo Tomaida Tembo nakatambula lwiito lwa lweendo lwa kuya ku Lusaka, wakalisakene kwa maile aasika ku 500 okuya ku Kathumba ku Katete mu munzi kujwe acisi ca Zambia. Mwana wa myaka 11 taakazyi cakucita.

Kuli nguwe Lusaka bwakali busena mbwaakali kumvwa buyo eelyo inga antela kabutali bwa ncobeni eelyo kweendelanya abaabo bakasikide kale ku dolopo, bwakali busena bwa 'bafwumpi' (babbi) alimwi 'amahuule' (basibwaamu) aabo bakali kuzinguluka akucita zyintu zyinji mumasena aa 'mumuni'.

Busena bwakali kumvwugwa buyo kuli Tomaida lino bwalangilwa kuba bwa ncobeni.

Kutegwa lweendo lwakwe lubaube, mweeninyina wale ale wakamutumina mali akubelesya alimwi aamwi manji akuti banyina bacaale kababelesya aunka. Kwainda myaka yosanwe kuzwa Tomaida nakasiya munzi wa banyina kuya mulweendo lwakacinca buumi bwakwe kukabe kutamani.

Kaingaila mu mazila aa mu Lusaka, Tomaida ngooyo ulindila
simakwebo wakwe uccilila mumugwagwa wa Addis Ababa.⁴

Mupandulule kuti Tomaida wakatumba buya ku Lusaka
abamukwasyi, wakasambalwa kuti abambile mukwasyi mali
kwiinda mukubelekela aamwi amweeninyina mu Lusaka. Nokuba
boobo, eelyo nakasika mu Lusaka, mweeninyina wakamusinikizya
mubuumi bwa nkwela ya buzike abuhuule.

Tomaida tazyi na kuli nociba comwe citicine; wajaatwa mubuzike,
wasambalwa amukwasyi wakwe.

Eeci caano inga cagambya kuti nocatali ca masimpe. Alimwi buya
cilagamya loko kuti ncamasimpe. Tomaida muntu wa ncobeni
eelyo eeci ncaano cakwe ca masimpe: bwana abuumi buboola
bwakwe bwabwezegwa kuli nguwe kwiinda mukumusambala
kacili buyo amyaka iili 11. Mubulembi wakapegwa
amfwulumende yaku America, cintu eeco – citali ceenzu mu
Zambia – catondezyegwa antangalala:

Zambia ilazwa, ili munzila, alimwi ncisi eeco bamakaintu
abana nkobalangilwa kutolwa mubuzike akaambo ka
muzeezo wa kubelesyegwa amu nkwela ya kutundululwa.
Bana bapenzegwa, kanji kanji mucisi mweena kuya
kubeleka akutundululwa munkwela, kulicengeezya kuba
banakazi, bali acijatilo ca nzoka, abamucaala. Kwiinda
mukupegwa zyipego, basazyinyina na balongwe
mbobavwula kubelesyegwa mukutola bana ku dolopo ku
masena abuvwuule. Aabona bana balatolwa ku buzike
kwiinda mukulombelela lugwasyo ku bantu mbobatazyi bali
mbuli banamutekenya bamandiima. Bunji bwa ban aba mu

⁴(2003) 'Tomaida Tembo's Story' (Caano ca Tomaida Tembo) *Times of Zambia*, Guwo 11th

Zambia bali mukutundululwa, kapati aabo bali mubulimi,
mulimo waa ng'anda, awa kuzela nswi, abalo mbamwi muli
baabo batolwa mubuzike. Basikutola bantu mubuzike
bavwula kwiinda mu ad hoc, maiwe akubelesya
basazyinyina, banamutekenya bamandiima, basimakwebo,
basotoka minyinda mumpindu, abasololi mubukombi.⁵



Luzyibo Iwa mu Bbaibbele

Mubale Izaya 42:1-9 ku kabunga:

*¹Ngooyu mulanda wangu nguntabilila, musale wangu moyo
wangu nguukondelwa. Ndabika Muuya wangu alinguwe,
kuti aletele bamasi lubeta. ²Takooyoongolola nikuba kulizya
ijwi lyakwe. Ijwi lyakwe talikooyoomvwigwa mumugwagwa
pe. ³Itete lifuyukide takooolityola, akamuni kasuka
takooyookazimya. Uyooleta lubeta
cakusyomeka. ⁴Takooyooceelwa mumuni nikuba kutyolwa,
mane akabike lubeta mukati kanyika, Azyalo nyika
zyakunkomwe yalwizi ziyoolindila mulao wakwe.
⁵Mbuboobu mbwaamba Leza, Jehova, iwakalenga ijulu
akuliyanzaala, uubambasika nyika azintu zizwa mulinjiyo,
uuabila bantu bali alinjiyo kuyooya, abaabo beendeenda
mumo ulabapa muuya. ⁶Mebo nde-Jehova ndakwiita
mubululami. Njookujata kujanza, njookubamba, njookubika
kuti ube cizuminano cabantu amumuni
wabamasi, ⁷ubononosye meso aaboofu, uvune baange
muntolongo, ugwisye abo bakede mumudima munjanda
yabuzike. ⁸Ndime Jehova. Ndezina lyangu. Bulemu bwangu*

⁵U.S. Department of State U.S (2009). *Trafficking in Persons Report 2009, Country Narratives -- Countries Q Through Z* [Akasabwi] Cilajanwa mu: <https://www.state.gov/j/tip/rls/tiprpt/2009/123139.htm>
<http://bst.qld.edu.au/wp-content/uploads/2013/08/SpiritualWarfarePowerPoint.pdf> [Zyakajanwa mu 19 Guwo 2018]

nsikooyoobupa umbi, akulemekwa kwangu nsikooyookupa zikozyano zifulidwe. ⁹Amubone! Makani aaciindi amana kale. Ndamulwiida makani mapya. Naatana kuboneka, ndamwaambila ngao.



Sena mwakaba kale mucilawo momwakaliibide eelyo zyintu zyoonse zyakali kabotu mubuumi bwenu? Zyoonse zyakali muluumuno eelyo timwakalibilikide? Ooko kulimvwa nkomwakajisi, nkolili bbala lyako lya ci Hebrayo; litwa kuti ‘Shalomu’. Shalomu takuli buyo kuti luumuno mbuli mbotwaamba mu Chikuwa. Ndigano lya kuti zyoonse zyintu zyili buyo kabotu munyika. Aboobo, ooko kulimvwa nkomwakajisi eelyo zyintu nozyakali kabotu ngo Shalomu. Penzi ndya kuti tatukkali munyika izwide ‘Shalomu’. Bantu balanjila mumakatazyo mabi alimwi akutalanyizyigwa kabotu. Mapenzi, bantu batola bamwi mubuzike akulwani zyoonse zyili tuzingulukide koonse koonse. Taakwe nobuba bomwe buzuba bwalo zyintu zyoonse nozyili muluumuno na mu shalomu. Omwe kumwi ku lubazu ambweni ulatundulula na ulatundululwa.

Nkolili alimwi bbala lya ci Hebrayo lipandulula cintu eeco eeyi nyika ncoiyanda. Bbala ndeeli, ‘tsedeqah’. Tulyaamba kuti ‘kululama’ na ‘bululami’. Mu Bbaibbele, aali oonse mpomwabona bbala lya bululami na kululama inga kanji kanji muzeezo ooyu wa ci Hebrayo ngolyaamba. Leza uyanda shalomu ku nyika yesu: luumuno, kweendelana, luyando akululama. Eeci cipandulula kuti bululami akululama kwa Leza zyeedelede kucitika muzyilawo zyoonse.

Ono ino eeci ceelede kucita nzi kuli ndiswe?

Mbuli bantu bayanda kutobela Jesu, twaitwa kuti tube bantu baluleme akusalala alimwi akujatilila ku mizeezo eeyo mubuumi bwesu, mpindu zyoonse alimwi azyilawo zyoonse zytunga twaswaanganya. Tacili cibotu kuliita kuti tuli baccilili ba Jesu pesi katutabikkili maano ku zyintu zyitali kabotu munyika. Zyobilo taakwe nozyinga zyeendela aamwi.

Jesu uleta bululami

Cibalo cesu iino ca mu Bbaibbele cizwa mubbuku lya Izaya: wakali musyinsyimi wakapona myaka iili 700 Jesu katana boola. Nokuba boobo, mucibalo eeci ubandika ali Jesu, kusyinsyima kuti ino Jesu nguni. Utwaambila kuti Jesu musale wa Leza, uyooleta ‘bululami ku zyisi’. Leza uyanda kuti muntu oonse amvwe bululami akululama kwakwe calo eeco cili ncencakabikkila Muuya kuli Jesu akumutuma kuli ndiswe. Sunu kululama kuletwa aa Muuya wa Leza ubeleka munyika, kwiinda mumaumi aabaabo baujisi Muuya muli mbabo.

Eeci inga titwacikaka.

Bululamibuvwuna baina nguzu akukulwaizya bali ansi

Nkocili cifwanikiso mucisyoonto ca 2-4 citondezya baabo baina nguzu abali ansi. Cifwanikiso nca nkandela na mulilo ulangilwa kuzima. Mulaubambilila, akubikkilila akuzyiba. Muciindi, mulilo wajokela muciiimo. Eeci tacili buyo cifwanikiso cibotu kwiiya, cili jisi alimwi ambotunga twalanganya baina nguzu, batundululwa, bacete abali ansi.

Aabo bapenga, na bakabamba kusala kubi, na bakapenzyegwa abantu tabeelede kusulaikwa andiswe, bayandika lugwasyo lwesu. Twiitwa kuti tuli baccili ba Jesu kutegwa tuboole kuli baabo bayanda kululama kwesu abululami eelyo tubayasye

bajokele ku buumi. Cisyoonoto ca 4 caamba kuti Leza mukusyomeka, cakutaleka, uyanda kuleta kululama munyika yesu.

Muyeeye caano cesu. Eeci caamba kuti Tomaida nakagwasyigwa kuzwa mucilawo cibi oomo mwakalijana.

Bululami buyanda kuti zyilawo zycincululwe

Kutalulama ndeelyo cintu citali kabotu na citasalali nocacitikila uumwi. Eeci inga kacili cintu cisyoonoto mbuli bukejekezya uumwi. Inga kacinizyide mbuli kubbigwa kwa umwi, kunyangwa nguzu zyabo akusambalwa mubuzike. Zyoonse zybilo tazyiluleme.

Inga twazyilanga zyilawo eenzyi akusala kuti inga titwacikonzya na tatweelede kucita cili coonse. Eeci inga kacili cubauba pesi alimwi kacitaluleme eelyo inga kacikazyanya a shalomu ya Leza munyika eeyi. Cisyoonoto ca 5-7 citwaambila kuti ngu Leza uutupa Muuya wakwe kuti tupone. Eeci cijisi mulimo uli bedelede. Ngwa kuleta bululami ku bantu. Tweelede kwangulula baange, kujula meso aboofu alimwi akuleta kuponezyegwa alimwi alulangilo ku zyilawo zyitaluleme.

Ooyu ngoumwi mulimo wa Muuya mumaumi eesu. Inga titwaukazyi.

Bululami buyanda Leza

Bululami bwini bwaamba kuti tweelede kubelekela antoomwe amulengi wesu kuleta bululami mumaumi eesu, zyooko zyesu, milimo yesu naaba cilawo cili coonse. Bululami akululama zyeendela aamwi; inga tookonzya kuba acomwe kotajisi cimwi. Mucisyoonoto ca 8 cibalo caamba Leza kuti tayandi kupa bulemu bwakwe ku cibumbwa cili coonse. Tukkala munyika oomo bantu

mobatobela misyobo yoonse ya zyibumbwa. Kutalikila ku tuleza twa kufwala amabwe, kusikila ku mali, ku bantu, mbanji ba leza batali bancobeni bakuccilila. Kanji kanji ooku nkoona kuccililila tuleza ootu nkokuleta katalulama. Bulyato bupa kulemeka mali kwiinda bantu.

Kuti katulombozya kuzumizya bantu kumvwa bululami akululama, mpoona buumi bwesu bweelede kuzyigwa abululami akululama kwa mulengi, Leza lwakwe. Kuti ooku kakutako, bululami bwesu kanji kanji buna kukonzya buyo kucinca kuzwa kukutalulama komwe kuya kuli kumbi. Tuyanda Leza kuti alete bululami munyika eeyi.

Ooku nkulabila kwa buumi butamani. Aabo batobela Leza mukasimpe, bululami akululama ziyakubamba nyika iboola mumazuba aabo, buzuba abuzuba mubusena boonse. Ooyu ngo shalomu.



15
tuvwalu-
vwalu

Kubandika

Kuli mibuzyo minji ya kubandika iino mvwiki. Mibuzyo mitaanzi inga yakananwa mukabunga antoomwe mpoona ya mamanino inga yakananwa mutubunga tusyoonto.

Mibuzyo ya kabunga koonse antoomwe:

- Sena mwakapenzegwa kale mukutalulama? Ncinzi cakacitika alimwi mwakalimvwa buti? Sena kuli wakamugwasyiliza?
- Nkaambo nzi ncomuyeeya kuti bululami akululama kwa Leza zyeendela aamwi? Nkaambo nzi ncomutakonzyi kuti mulamuyanda leza paka ccita mwayanda mukwabo na mucizyi na simukobonyoko?

Mibuzyo ya tubunga tusyoonto (bantu baingule mibuzyo eeyi mutubunga twa bantu 3 na 4):

- Mbantu nzi aabo ‘bazike’ na ‘bali ansi’, bapenzyegwa mukutalulama mumaumi eesu amotukkala?
- Inga twabacitila nzi?
- Ino shalomu / zyoonse kuba muluumuno caamba nzi mu munzi wenu?

Amibuzyo eeyi yoonse, mubone kuti boonse bateelela alimwi bamvwa muzeezo abwiinguzi bwaumwi.



10

tuvwalu-
vwalu

Cakucita

Kanji kanji, kotalulama kotalikila mukukazyanya amanyongwe ngotuba aawo mumaumi eesu.

Mubelesi tuvwalu vwalu tuli 5 kuyeeya ooyo ngomuli aawe mumanyongwe, ngomutayandi, na ngomwakapenzya munzila iitaluleme. Inga kakuli ooyo ngomwakacenga na kuta cita kabotu. Inga kakuli cimwi cintu eeco ncomwakatola lubazu mukuleta ntenda mubuumi bwa umwi kaindi.

Mutubunga twa bantu 3 na 4, mube basongo eelyo mulyaambilile kuli umwi aumwi zyiindi zyili zyoonse nomwakajanika mumanyongwe. Mwaambilane ncomwakali kukonzya kucita acaali na muntenda.

Cabili, mubandike mbomukonzya kubambulula ciindi. Na kamukonzya kucita ooku, mulembe eeci ansi mukapepa: muyakuciyanda aakale.



Mupailo

Mutubunga twabo, mukulwaizye boonse baliyeeye azyiindi zyobakanana.

- Sena twakaleta penzyo ku bantu? Na mboobo, tulombe kulekelelwa akucinca nzila zyesu.
- Mulombe Leza atugwasye kubona ciindi abantu basangene eelyo ababone.
- Mubuzye Leza mbotunga twacinculula zyiindi zyoonse. Kuti bantu kabakonzya, mubaambile balembe eeco Leza ncaamba.

Mujale kwiinda mukupailila kuti bululami buboole eelyo mulombe boonse baambe cipeto ca mumutwe antoomwe.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki mutole ku ng'anda tupepa ntomwakalemba muzyiindi ca zyakucita amupailo. Nciyandisi kucita eeco Leza ncatutondezya. Tatweelede kucisiya kacitabelekedwe.

Muzumanane kupailila ciindi akulomba Leza kuti alumbaizyigwe muzyiindi zyoonse, nokuba kuti kacili ciyumu kucita.



Kamboni

Iino mvwiki mulibambile kuunka abalongwe 1 na 2 eelyo mukabamulule ciindi. Eeco cili coonse ncxomwalemba akapepa kenu, mubone loko kuti cacitwa. Mulete kucinca kwa Leza ku ciindi.

Na coolwe ciboneke, mupandulule ncomubambulwida ciindi eelyo azyintu zynomwaiya mukabunga iino mvwiki.

Bulembo

Kuleta Bululami



'Nkabela Mwami uzoobavwiila kuti, Ncobeni ndamwaambila kuti, mbuli mbumwakacitila obo umwi naba muniini akati kabakwesu aba, mwakacitila ndime mbubonya.'

Matayo 25:40



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela iino mvwiki ngwa kubona zyiindi zyitaluleme muzyooko zyesu akwiya mbotunga twatalika kuzyilanganya. Leza utwiita kuti tuyande zyooko zyesu, akutondezya buumi bwesu bupya muli nguwe kwiinda mukuleta bululami ku batakwe nguzu, bacete abapenzyegwa.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoono, mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zyilamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

Nkabela Mwami uzoobavwiila kuti, Ncobeni ndamwaambila kuti, mbuli mbumwakacitila obo umwi naba muniini akati kabakwesu aba, mwakacitila ndime mbubonya.

Matayo 25:40



Mucibeela cakainda twakaiya ‘shalomu’ (luumuno lupegwa aa Leza ooko kwalo zyoonse nkozyili kabotu kuli boonse). Twakazumina kuti zyintu tazyili mbozyeelede kuba muzyooko zyesu akunyika mboibede. Twakaiya a bululami akululama eelyo ambuli mbozyijisi lubazu mubube bwa Leza alimwi ancotuziyandila muzyooko zyesu.



Kubandika

Mubuzye bantu baambe cintu comwe ncobayeeya kuzwa ku cibeela ca mvwiki yakainda.



Mvwiki yoonse yakainda twakali kuyeeya zyiindi ziyatikizya maumi eesu alimwi azyooko motukkala oomo motutaboni luumuno lwa Leza luzwide (shalomu) eelyo Leza watutondezya kuti bululami bulayandika.

Kutalulama inga kwaletwa atuntu tusyoonto tuli mbuli kubeja na inga kwaba akaambo ka zyintu zyilibonya kukomena, mbuli uumwi wazanganyizyigwa. Akaambo kali koonse, kuli kutalulama eelyo bantu balapenga.

Cibeela cesu iino mvwiki inga catugwasya kuyeeya mbotukonzya kulilemeka muzyiindi zytuzingulukide oomo bantu mobapenga akaambo kakutalulama.



Caano

Mupandulule kuti iino mwiki tujisi twaano 4 twa masimpe kuzwa ku Tubunga twa Buumi mu Zambia aku Namibia. Mubale twaano ootu ku kabunga:

Kaano 1: Kabunga ka Buumi kaali kuswaangana kwa ciindi. Bakali kwaabana mizeezo ya mbobakonzya kutondezya luyando lwa Jesu ku cooko cabo. Mbuli mbobakaabana mizeezo, bantu bakayeeya manyoneno aamwi amugwagwa wa musyokwe ooko ntenda nkozyakali kucitika cakuzumanana eelyo bantu bakali kulicisa. Bakayeeya kuti ambweni kabunga ka buumi inga kacita comwe kujatikizya eeci eelyo kabunga ka bantu 12 kakabambulula mugwagwa akubikka nzila ku lubazu lomwe. Kuzwa leelyo takucikwe ntenda!

Kaano 2: Kabunga ka Buumi kaali kupailila cooko cako eeco calo cakazyibidwe kuti mbusena bwa milandu kwa myaka minji. Kwa mwaka oonse Kabunga ka Buumi kakali kupailila cigaminina aabo bakazyibidwe kuleta manyongwe eelyo bumwi buzuba bakabatamba kukabunga kabo. Basimanyongwe bakaboolo eelyo nokwakainda ciindi bakapanga cilongwe aba Kabunga ka Buumi akuswaanga a Jesu. Bakapa buumi bwabo kuli Jesu alimwi bakacinca nzila zya buumi bwabo. Akaambo kaako, milandu yakaceya eelyo mpuwo ya munzi yakacincila liwmi!

Kaano 3: Mooye uupona abulwazi bwa sikalileke wakasinikizyigwa kuti aponene ku munyinda wa cooko nkaambo bantu bakali kuyeeya kuti wakali mubi akali wakali muntu utali wakuleta afwaafwi. Wakati, 'Ndakali kuti na kejisi bulwazi bwa sikalileke, inga tindaba mwana aa Leza.' Bantu tibakali kuyanda kuba acintu cili coonse anguwe. Kabunga ka Buumi mucooko cakwe kakasala kucita bwandeene eelyo kakamutamba ku

miswaangano yako. Wakatalika kuboola eelyo wakalimvwa kutambulwa akuyandwa eelyo wakakonzya kubandika nkondo yakwe abulwazi. Wakaba muna Kristu akupa buumi bwakwe kuli Jesu. Lino ulati, 'Ndimvwa kukkomana kwalo nkondatakajisi mubuumi bwangu.' Lino ulasika akuli bamwi bapenzyegwa abulwazi bwa sikalileke eelyo wakabamba kabunga kakugwasyilizya. Banji balagwasyigwa akuboola kuzya kuzyiba Jesu.

Kaano 4: Bamwi balombwana bakali kunywa kapati akuleta manyongwe ku mikwasyi yabo. Kabunga ka Buumi ka mucooko cabo kakabatambula eelyo mbobakatalika kwiiya Bbaibbele bakazyiba luumuno akutambula Jesu mbuli mufwutuli wacigaminina. Bakaleka kukolwa eelyo eeci caleta luumuno ku maanda amikwasyi yabo. Bazulilwa mu Kabunga ka buumi nkoona bali kubikka mali masyoonto muciiindi aciindi kusikila limwi avwula akukonzya kuula ngulube antoomwe. Mpoona ngulube yakazyala twana eelyo twakapegwa kuli aabo bakajisi buyumu yumu bwa kubbadelela bana mali ku cikolo ayimwi zisyoonto. Mubuya ciindi ngulube zyiya kukonzya kuleta mpindu ku mikwasyi.



Luzyibo lwa mu Bbaibbele

Mubale Jakobo 1:19-27 ku kabunga:

¹⁹Muleezi kale makani aya, nobakwesu bayandwa. Pele muntu woonse abe amutwe muuba, amuke kwaamba, amuke kunyema, ²⁰nkaambo bukali bwamuntu tabucityi ziluleme zya-Leza. ²¹Nkaambo, kaako, amusowe busofwaazi boonse abubi bufwasukide mumyoyo yanu, mwaatambule cakulibombya makani ngemuzikilidwe mukati, aali anguzu zyakufutusya myuuya yanu.

²²*Pele amube basikucita makani, mutabi basikuswiilila buyo balyeena.* ²³*Ikuti na muntu ngusikuswiilila buyo, pele tali sikucita makani, ulikozyene amuntu uulilanga mucimboni kubusyu mbwaakalengwa abo,* ²⁴*nkaambo amana kulilanga, ulainka, elyo ulafwambaana kuluba mbwabede.* ²⁵*Anukuti uusondela mumulao mulondosi wabulubusi, akukakatila kulinguwo, mbwaatali sikuswiilila amatwi buyo uuluba pele sikumana mulimo, ngonguwe uti longezegwe mukucita kwakwe.*

²⁶*Na nkwalu uuliyeeya kuti musyomi, nekubaboobo taangi lulimi lwakwe pele walyeena mumoyo wakwe mwini, busyomi bwayooyo mbwabuyo.* ²⁷*Busyomi busalala butakwe kampenda mumeso aa-Leza Taateesu mbombuboobo, bwakuti muntu aswaye bamusyaala abamukabafu mumapenzi aabo, akuliyobola cakutaba akabala nikaba komwe kaansi.*



5

tuvwalu-
vwalu

Kubandika

Mutubunga twa bantu 3 na 4, mwaambile boonse baingule mibuzyo itobela ya cibalo cesu ca mu Bbaibbele:

- Ncinzi ncotwiiya kujatikizya Leza?
- Ncinzi ncotwiiya alwesu?
- Ino cibalo eeci citutuma kucita nzi?

Mulete kabunga koonse antoomwe eelyo mubuzye akamwi kabunga kaingule mubuzyo.



Cakucita

Mubuzye kabunga na kuli umwi wakalilangide mucimbonimboni na acifwajikiso lino lino.

Musale omwe wakacita oobom eelyo mumubuzye aambe mbwabede. Mubuzye boonse mukabunga na wapa bupanduluzi bubotu. Mwiindulule eeci cakucita aumwi sikulyaaba.



Cibalo ncotwamana kubala akukanana antoomwe citupa mukonzyanyo wa umwi mbwaboneka mucimbonimboni eelyo mpoona waluba mbwaboneka. Eeco inga calibonya mbuli kuti ncabuyanga kuli ndiswe! Pesi kanji knaji oobu mbotubede notwabala Bbaibbele; tulalilanga, mpoona mpoona twaluba na twazangila ncolyaamba, aceeco ncolyatwaambila kucita. Cibalo cabikka antangalala kuti Leza uyanda buumi bupya mbwaatupa kuti busanagane mumicino.

Cibalo citalika kwiinda mukwaamba kuti tweelede kuleka zyoonse zyibi zyili mumaumi eesu eelyo akutambula eeco ncabikka muli ndiswe ca bulemu (cisyoono ca 19-21). Muyeeye kuti tali micito yesu ikonzya kutufwutula. Leza wakasyanga buumi bupya muli ndiswe kwiinda muli Jesu. Nokuba boobo, mukuti twacitambula eeci cipego kuzwa kuli Leza, tulangile 'kuzwisya' cibi coonse mu buumi bwesu.

Cibalo cazumanana kutulailila mbuli Leza mbwaamba mujwi lyakwe (cisyoono ca 22-25). Cilakkomanisya, kuli zyisyomyo zybile mu cisyoono ca 25. Kusaanguna, twaambilwa kuti jwi lya Leza lipa lwaanguluko. Cabili, twaambilwa kuti oonse uumvwa jwi akucita kweendelana ambwaamvwa uyakulelekwa muli ncacita. Cilalibonya antangalala kuti Leza uyanda kuti twiiye jwi lyakwe eelyo akulibikka mumicino.

Mukumanizya twabala kuti bukombi bwa kasimpe bulangika mbuli cimwi cintu: kucenjela muli ncotwaamba, kubikkila maano bamucaala abamuka bafwu alimwi akwiindana acooko cituzingulukide (cisyoono ca 26-27). Leza utulomba kupona buumi bwiindene ku banji batuzingulukide. Utulomba kuti twimikilile aabo batacikonzyi kuliimikilila, tubelekele kuleta bululami.

Tuya kubelesya twaano totwabala kuti tutugwasye kuyeeya kujatikizya eeci ncocaamba kuli ndiswe akuzyooko zyesu.



20
tuvwalu-
vwalu

Cakucita

Mwabanye kabunga mutubunga tuli 4 tusyoono. Mupe akamwi kabunga kaano 1 nkotwabala kujatikizya Tubunga twa Buumi. Akamwi kabunga kapegwe kaano kaimpene.

Tubunga inga twayandika kutubala twaano alimwi. Beelede kubamba kasobano kafwaafwi (kavwalu 1 na 2 mubulamfwu) mukwaamba kaano. Mupe boonse tuvwalu vwalu 5 twakulibambila kasobano.

Komwe komwe, mubuzye akamwi kabunga kasobane kasobano kabo kuli boonse. Twaano toonse twamana kusobanwa, mwiingule mibuzyo eeyi:

- Mukaano, nguni wakali kupenzyegwa akaambo kakutalulama mucooko?
- Ino tulimvwa bubit alimwi tuyeeya buti kujatikizya leza mbwalimvwa kukutalulama?
- Ino Kabunga ka Buumi nintaamu nzi njokakabweza?
- Ino bwiinguzi bwakali buti?



20

tuvwalu-
vwalu

Akamwi kabunga kamanizya kusobana kaano kako eelyo amibuzyo yabandikwa, mukosoole twaambo tupati pati mukwiinduluzya.

Kubandika — Ncinzi cicitika mucooko cesu?

Mubuzye muntu oonse na kuli katalulama ampenzyo mucooko cenu.

Mikonzyanyo iimwi njeeyi:

- Umwi utundulula bapengede
- Kuli muntu ucenga bantu kujatikizya mali
- Bana balatundululwa
- Muntu tazuzikizyi mulimo wakwe mucooko kabotu kabotu
- Mupati pati simakukulo alimwi uupenzya
- Umwi ulapenyegwa mung'anda
- Muntu mupati wazangilwa abamukwasyi wakwe

Mukanane mubuzyo ooyu caantagalala. Muyakuyandika kugwasyilizya bantu kukanana. Muyakuyandika kubikkilila eelyo akukulwaizya bantu kusyomeka akuba basongo.

Kuti kaambo comwe kaletwa antagalala, mukakanane mbuli kabunga koonse.

Kuti na twaambo twiindene twaletwa, inga mwandaana mutubunga tusyoonto akutukanana.

Mwiingule mibuzyo itobela antoomwe:

- Tulimvwa buti ku kaambo aaka alimwi tuyeeya kuti Leza ulimvwa buti ankako?
 - Ncinzi cikonzya kucitika natitwacita cili coonse?
 - Ncinzi ncotunga twacita kuli nkako toonse?
- Mukonzyanyo, sena inga cagwasya kwambaula kuli umwi

akumusola? Sena tuleelede kwiminina uumwi
upenzyegwa kutegwa alekwe? Sena nkwali omwe
mubulelo ukonzya kugwasya?

Mubambe muzeezo wa kaambo akulipa kuucita antoomwe.
Nciyandisi kuti ooyu mucito taubikki uumwi wenu mubuyamba
na omwe muntenda. Mukonzyanyo, mutabi nomuunka kuya
kotalika similandu wa mu cooko; inga cabota kuti mwabelesya
basimulawo.

Muzeezo mupati uyandika kuyeeya ngwa kuleta bululami bwa
Leza akucinca maumi aa bantu.



15

tuvwalu-
vwalu

Mupailo

Sunu tuya kupailila twaambo ooto twakananwa amizeezo
njotwabamba. Inga twapailia kuti Leza atusolwedele, kuti atupe
nguzu eelyo akuti alete bululami ku twaambo twakananwa.

Kuti kakuli mwabamba muzeezo omwe mbuli kabunga, nkokuti
mupaile munzila eeyi:

- Mwiime mukakweya mpoona mucebukile ku muntu uuli
ku lulyo lwenu.
- Mumupailile ooyo muntu eelyo nayandaula kuleta
bululami bwa Leza mucooko cenu.

Kuti kakuli mwabamaba mizeezo minji mbuli tubunga tusoonto,
nkokuti mupaile munzila eeyi:

- Akamwi kabunga kaimikile, ciindi comwe akamwi
kabunga, eelyo mwaambe mubufwaafwi mizeezo yako.
Boonse baimikile mumbali lyabo eelyo babapailile mbuli
mbobacita mizeezo yabo. Mucite eeci ku kabunga
koonse.



Cakucita iino mvwiki

Ku mazuba 2 na 3 aboola, muswaangane abantu bali mukabunga kenu ca mamano eelyo mupailile twaambo ootu alimwi kuti Leza abikke mu myoyo yenu. Mube aciindi antoomwe cakubona kuti muzeezo wenu watalika kuba antaamu zyakucitwa. Ambweni mweelede kubandika aumwi na kubikka zyintu mukulibambila.



Kamboni

Bukamboni bwa mvwiki iino mbwakubikka maziizo yesu mumicito. Mubalanganye alimwi mucenjele mukuzyiba ziyianda bantu ambobalimvwa eelyo mubabikkile maano antoomwe alwenu. Muyeeye kuti nciyandisi kuti eeci ticamubikka mubuyamba na uumwi muntenda. Ncinzi ncomuyeeya kuti iino mvwiki inga aba matalikilo. Muyakuyandika kuzumanana kulanganya aabo Leza mbaabikka mumoyo wenu.

Zyakubelesya Azyimwi

Cibelesyo cibotu cikonzya kumugwasya kuleta bululami mucooko cenu antoomwe *nku Yanda Munzi wenu*. Nciyo cakubala citola mvwiki 10 calo ncomunga mwacita mbuli kabunga alimwi cijanwa kuli ba Dignity na ba Dignity Impact Team (www.dignityonline.org.uk/love-your-village).



Love Your Village

How to connect with your village through Dignity

© Dignity and Love Your Village



Bulembo

Kugwasyilizya Bamwi Kukomena



'Lino tatalengaani mukucita kabotu, nkaambo
kuciindi ceelede tulatebula, twatafunuka.'

Ba-Galatiya 6:9



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita 'Cakucita iino mvwiki' a 'Bumboni' kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kwiiya kugwasya bamwi kukomena, muli lwabo alimwi amucooko. Mbuli Leza mbwabeleka kukomenzya buumi bupya muli ndiswe, alimwi ulatubelesya kukomenzya buumi bwakwe bwakwe bupya muli bamwi.



5

tuvwalu-
vwalu

Cipeto

Balisya zyipeto zya mumutwe amikonzyanyo yamu Bbaibbele ku kabunga. Uzyibale alimwi muzyibeela zyiniini-niini, kabunga kakainduluzya. Mbiccaana mbiccaana mubale muzyibeela zyilamfwu antoomwe akabunga kakatobelezya kusikila limwi boonse bakonzye kuciindulula cibalo. Mukulwaizye bamwi bantu basole kwiinduluka lwabo beni.

*Lino tatalengaani mukucita kabotu, nkaambo kuciindi
ceeledede tulatebula, twatafunuka.*

Ba-Galatiya 6:9



Caano

Mubale caano citobela ku kabunga:

Umwi mulimi wakapa mwana aakwe musankwa cibeela ca nyika ambuto. Musankwa wakakondwa kapati! Wakati kuli nguwe mwini, 'Mbuto yangu nimbotu kapati eelyo tandiyandi kwiisinyikilwa aboobo ndajana kabbokesi ndiiyobole.'

Musankwa wakajana kabbokesi akubikka mbuto muli nkako eelyo wakabikka munkyika. Buzuba abuzuba wakali kulanga mbuto yakwe pele tiyakali kukomena. Aboobo wakaya kuli usyi kuya kumutondezya mbuto. Usyi wakamweta-mweata akuti, 'Mbuto yako iyandika mumuni kuti ikomene. Kuti koibikkide mukabbokesi, taikonzyi kubona zuba eelyo taikakomeni.' Aboobo musankwa wakazwisya mbuto yakwe mukabbokesi akwiibikka abulongo muzuba eelyo wakali kulangilizya kuti na ilakomena.

Nkabela bayuni bapati bakaboola atunyama tусуооnto twakaboola akusola kwiibba mbuto. Musankwa wakoopolola akutambika maanza aakwe kutegwa babbi batije. Usyi wakacibona eeci akuti, 'Mbuto yako yeelede kusyangwa mubulongo kutegwa ikomene. Bulongo buya kwiilisa eelyo tuyuniu tatukakonzyi kwiibba. 'Aboobo musankwa wakasyanga mbuto yakwe mubulongo, kazyitantamukene. Usyi wakali kumulangilizya wakati kuli nguwe ca bubombe, 'Syanga mbuto muni muni aimwi kutegwa zyakukomena kazyikwabana ciidi muwo waboola.' Aboobo musankwa wakasyanga mbuto yakwe muni muni aimwi akulindila kuti ikomene. Nkabela tiya kakomena!

Wakausa eelyo wakaya kuli usyi kuya kubuzya mbuto ncoyatakali kukomenena. Usyi wakaingula, 'Weelede kupa mbuto yako meenda buzuba abuzuba.' Aboobo musankwa wakapa mbuto

yakwe meenda buzuba abuzuba. Nkabela nokwakainda mazuba masyoonto buyo, kwiina cakacitika! Musankwa wakausa ncobeni. Nkaambo nzi mbuto yakwe tiyakali kukomena? Usyi wakamubuzya cakali kumuusizya. 'Mbuto yangu taikwe kuya kukomena,' wakalila musankwa. 'Ah, pesi weelede kubikkilila,' wakaingula usyi, citole ciindi kuti mbuto ikomene.'

Nokwakainda ciindi mbuto yakatalika kukomena. Musankwa wakakondwa. Nkabela tuuka twakaboola akutalika kulya matuvwu eelyo musankwa wakoompolola. Usyi wakaboola akumwaambila kuti, 'Weelede kubikkila maano ku mbuto yako alimwi weelede kuzwisya tuuka ku matuvwu biyo alaligwa.' Aboobo musankwa wakagusya tuuka ku matuvwu eelyo tusingo twakazumanana kukomena. Twakakomena ca nguzu akulampa mumumuni eelyo musankwa wakatupa meenda buzuba abuzuba. Guwo nolyakaboola tusingo twakakwabulana akulikwabilila.

Mpoona bumwi buzuba micelo yakalibonya. Usyi musankwa wakati kuli nguwe, Langa mu muceleo, mwana angu. Nzyeezyi azyimwi mbuto. Inga wazyisyanga ciindi ciboola eelyo uyakuba azyisyango zyinji.' Musankwa wakakondwa kapati! Wakati kuli usyi, 'Inzya ndacita oobo. Alimwi ono ndiliziyi kuti mbuto yangu iyandika mumuni kumunika alinjiyo alimwi abulongo kupa busani. Zyeede kuswenana kutegwa kazyikwabulana kwaboola guwoalimwi ndeelede kukwabilila matuvwu kuzwa ku tuuka tuboola kwaalya. Alimwi ndeelede kubikkilila ku mbuto yangu nkaambo itola ciindi kukomena. Lino mndiliziyi bwakukomezya mbuto akwiibamba kuba anguzu akulampa alimwi lyoonse ndiya kuba ambuto iinji ciindi coonse.' 'Mwana angu, wakaamba usyi siluse, 'Lino uli musongo alimwi mbuto yako iya kukomena ca nguzu akulampa.'

Eeci caano citondezya mbuli mbuto mboiyanda zymwi zyintu kutegwa ikomene kabotu. Mbuli bana Kristu tulakomena kabotu eelyo notwaba abulongwe a Jesu. Tulasyuuka mumumuni wa kasimpe ka Leza, akupegwa busani kuzwa kuli Leza alimwi akubikkilana maano.



Luzyibo lwa mu Bbaibbele

Mubale Incito 2:42-47 ku kabunga:

⁴²Balo bakacilisungweede mukwiisya kwabaapostolo, amukuswaana muuya, amukukomona mukamu, amukukomba.

⁴³Bantu boonse bakasikilwa kuyoowa. Malele azitondezyo zinjizini zyakacitwa baapostolo. ⁴⁴Boonse basyomi bakali antoomwe, basanganya zyoonse nzobali kujisi, ⁴⁵bauzya lubono lwabo ezintu zyabo, baabana boonse mbuli kubula kwaumwi umwi. ⁴⁶Mazuba oonse bakali kusungweede amoyo omwe muntempele, akukomona mukamu mumaanda aabo, balya zilyo zyabo akubotelwa amyoyo iituba, ⁴⁷balalumba Leza akukonda bantu boonse, Mazuba amazuba Mwami wakabayungilila abo abali kufutulwa.’



Cakucita

10
tuvwalu-
vwalu

Mubambe zyakucita zytitondezye zyakucita eenzyi zyili 5 ansi aawa. Mukonzyanyo, kukomba inga kakuli kwa kwiimikila akutambika maanza mujulu. Mpoona mwamana mwaabikka antoomwe kutondezya mbuli bwakacita basyomi bataanzi mu Bbaibbele mucibalo cili mu Incito.

- Kubala Bbaibbele antoomwe

- Kwabanya maumi eesu
- Kupa akubelekela bamwi
- Mupailo
- Kukomba

Lino mubale alimwi cibalo eelyo mubalombe boonse bacite zyakucita zyoabamba mucibalo.



Twakacilanganya kale eeci cibalo mucibeela 1 ca Buumi Bulalenga. Citupa cifwanikiso ca cooko. Muciindi eeco eeci cibalo nocakali kulembwa, Jesu wakalitoledwe kale mukati kajulu eelyo basiciiya ba Jesu bakali zuzyidwe kale a Muuya Usalala munzila ya nguzu. Umwi siciiya wa Jesu, Petro, wakakanana ku mbunga ya bantu eelyo bali 3000 bakabbizyigwa akaambo kakumvwa mulumbe ooyu. Mucibalo eeci mu Incito tubona mbuli bana Kristu bataanzi **mbobakakomena antoomwe** muluyando lwabo kuli Jesu akuli umwi aumwi.

Basyomi bakabona kuti ani bakali swaangene umwi aumwi alimwi a Leza mu muuya, aboobo bakabonenesya kuti bakali kuswaangana buzuba abuzuba kutegwa baimbe akukomba Leza, kuteelezya njiisyo zya Leza, kupaila, kubelekela bamwi, kulya antoomwe akwaaba maumi aabo kuli umwi aumwi. Bakazyiba kuti kuswaangana kwabo kwakali kwiinda muli Jesu Kristu. Bakali kupa buumi bwakalede acilongwe cabo a Jesu, kuba antoomwe mukuleta nzila zya Leza zya kujulu ansi. Boonse bakazyalwa mumukwasyi wa Leza. Bakazwide lukondo akupa bamwi. Maleele akacitika! Buzuba abuzuba bantu bakali kusala kutobela Jesu akusangana mukabunga ka lukondo.

Kuyiisya

Mucisyoonto ca 42 twabala kuti bana Kristu bapya bakaswiilizya kabotu kabotu ku njiisyo zya baabo bakali a Jesu. Eelyo notwaswaangana antoomwe mbuli basyomi tuswiilizya ku njiisyo zya jesu aba Apostolo kwiinda mukubala Bbaibbele antoomwe alimwi akulomba Muuya Usalala kuti ukanane ku myoyo yesu akumizeezo yesu kwiinda mu mangwalo. Mpoona tulakomena mukumvwa. Leza ulajalula meso amyoyo yesu kwiinda kusaanguna mpoona tulatalika kumvwida jwi lyakwe.

Kuswaangana akulya

Mbuli basyomi bataanzi, tuya kujula maanda eesu kutegwa tukaswaangane antoomwe akukomba Leza, kulya antoomwe akukomona cinkwa antoomwe (cisyoonto ca 42) mbuli Jesu mbwakatulailila kucita muciiindi ca cilalilo ca mamanino eelyo kataninga anzikwa aciingano (Luka 22:19-20). Zyilyo zya basyomi bapya kwakali kusekelela, kuzwide lukondo kwiinda mulimo (cisyoonto ca 46). Lukondo lulatuyumya akutugwasya kutobela Jesu muzyibeela zyoonse zya maumi eesu.

Eelyo notwaswaangana abamwi akuibalusyanya eeco Leza ncacita mumaumi eesu, tulakulwaizyigwa eelyo lusyomo lwesu lulakomena. Tulaiya kuyanda bakwesu abacizyi muli Kristu. Aabona eeli inga lyaba penzi nkaambo bamwi bantu inga batucima na kutunyemya mbweena buyo mbuli mukwasyi wa bantu! Pesi Leza utwiita kuti tube aluse abasikubikkilila nkaambo uli andiswe. Eelyo notwiiya oobu tulakomena akuba mbuli Jesu.

Mupailo

Basyomim alimwi bakalipa ku mupailo (cisyoontom ca 42). Jesu wakapaila eelyo andiswe tulapaila. Tulakanana kuli Leza, uuli ngu Taata wesu mubotu, kumulumbaizya, kumulumba akumulomba

kuti atugwasye. Mbuli mbotupaila, cilongwe cesu anguwe
cilakomena eelyo notupaila antoomwe mbuli basyomi,
tulakomena antoomwe akutangala eelyo twabona bwiinguzi ku
mipailo yesu. Mipailo ya basyomi antoomwe ilaa nguzu
mukutucinca azyiindi zytubona.

Kukomba

Bana Kristu bakakomba antoomwe buzuba abuzuba.
Bakaswaangana mubusena bwa kukombela alimwi amumaanda
aabo. Notukomba, tulamvwa bube bunji bubotu bwa Jesu ooyo
uli andiswe lyoonse. Leza ulakuyanda kukomba kwesu alimwi
ulizyi nkubotu kuli ndiswe! Eelyo notwamvwa bube bwakwe,
tulayumizyigwa, lusyomo lwesu lulayungizyigwa alimwi tulazyiba
kuti tulayandwa. Tulazundwa abulemu bwa Jesu (cisyoono ca
43) eelyo muli kaako kaambo tubona zytondezyo kuzwa kuli Leza
zya maleele acitika (cisyoono ca 43).

Bwaabi akulela

Basyomi bakazyidwe kuba baabi (cisyoono ca 45-46). Aamwi
malembe a Bbaibbele aamba kuti basyomi bakajisi myoyo isalala.
Moyo usalala ngooyo wa kasimpe alimwi ujukide. Tulilibambilide
kuba basyomeka antoomwe abakwesu abacizyi besu muli Kristu
akuba amoyo uyandisisya. Basyomi bataanzi bakabanya maumi
aabo, zyilyo, maanda ampasya. Bakagwasya bapengede.
Bakagwasya basyomi mbobatakaninga bwene. Nokuba kuti tujisi
kunji na kusyoono, inga twaabila bamwi. Alimwi tulakonzya kupa
ciindi cesu acalo, kubikkilila kwesu, luyando lwesu. Tulapa bamwi
nkaambo awalo ulatupa. Notulela, mbuli Jesu mbwakacita, inga
twaluba mapenzi eesu eelyo twaleleka bamwi, Leza ulatuleleka
munzila zyinji. Mukujosya, tutambula lugwasyo akukulwaizyigwa
kuzwa ku bakwesu abacizyi eelyo alimwi tulalelekwa.

Eeci cibalo mu Incito citutondezya umwi aumwi inga wakomena munzila mbotu. Mpoona andiswe tuya kukomena mbuli bantu eelyo zyooko zyesu zyiya kukomena bantu banji bakutusangana. Luyando nkekaambo kapati. Jesu wakati, ‘Kwiinda muli ceeci boonse baya kuzyiba kuti muli basiciiya bangu, kuti kamuyandana’ (Johane 13:35).

Busiciiya a Buyobozi

Ciyandika kulilemeka kuti ube alubazu mucooko mbuli eeci. Aabona inga katutayandi kuswaangana antoomwe, cianza eeco cipeto cesu ca mumutwe ncocitukasya. Muzyimwi zyiindi inga ‘twakatala mukucita zyibotu’ mbuli mbocaambwa mu Ba-Galatiya 6:9. Muzyiindi zyimwi mbuli zyeenzi notulimvwa kukatala akutyompwa, inga twasunkwa kulitantamuna ku cooko cesu alimwi buya akudonaika buumi bwesu bupya. Oomu muzyiindi notuyanda kapati basyomima kuti batugwasye, batupe lugwasyo, kukulwaizyigwa eelyo aabona kutunyona ciindi notulubilide. Nciyandisi kuti eezyi zyoonse zyacitwa muluyando kutali kuzwa ku moyo uutali kabotu. Mbubwena Jesu mbwakaba aciindi akabunga ka bantu kasyoonto nkakali kuyandisisya, kubayiisya akubanyona, aboobo andiswe ceelela kucita mbubo. Nciyandisi kuba alubazu mukabunga, mbuli kaaka kabunga, oomo motunga twaiya antoomwe, kukomba antoomwe, kukomena muluyando akucita zyibotu antoomwe, kugwsyanya akunyonana muzyiindi zyilemu. Mbuli musankwa mucibalo cesu mbwakali kuyandika kupa bulongo, meenda azuba kukukomena kwa mbuto zyakwe, andiswe tweeledede kugwasyanaya mukukomena muli Jesu. Kwiinda mukulingula bube abukomezi bwesu abamwi, inga twapa lugwasyo akugwasya mpotukonzya.



15

tuvwalu-
vwalu

Kubandika

Mutubunga twa bantu 3 na 4 mubandike mibuzyo itobela. Kufwumbwa buyo bantu bamana kubandika mibuzyo eeyi, mubajosye boonse mukabunga akubaambila kupa bumwi bwiinguzi bwabo.

- Ncinzi Muuya Usalala wa Leza ncoukanana kuli kuli ndinywe mucoibalo eeci ca mu Bbaibbele?
- Munzila nzi cooko cenu ca basyomi mocili mbuli ca bana Kristu bataanzi? Mbubuti mbomunga mwayandana kapati?
- Zyintu nzi zyimulesya kukomena mulusyomo lwenu? Inga mwagwasanyana buti kuzunda zyintu eezyi?



15

tuvwalu-
vwalu

Mupailo

Mubalisye mupailo utobela:

‘Leza Singuzu, Taata wesu wa kujulu, ulaa luse alimwi ulaa kubikkilila kuli ndiswenkaambo uli usyi mubotu eelyo tuli bana bakom bayandisi. Twalumba kuti Muuya Usalala ulabeleka mukutukomezya mubu Kristu. Twalumba kutupa basazyima abacizyi muli Kristu batugwasya akutukulwaizya kukomena. Akaka mutugwasye tukomene antoomwe: kuswaangana antoomwe, kubala mangwalo, kulela akuba baabi eelyo akukomba akupaila antoomwe. Mutugwasye tutondezyanye luyando amicito mibotu. Twapaila ooku muzyina lya Jesu’, twalumba.’

Lino mukulwaizye kabunga kapaile antoomwe kupailila zyintu eezyo zynomwakanana sunu. Mubakulwaizye bapailile cigaminina twaambo ooto twaambwa.



Cakucita iino mvwiki

Mvwiki amvwiki kuli ncito ya kubelekela ku ng'anda. Iino mvwiki, mulibambile kuswaanganya muntu 1 na 2 kuzwa mukabunga eelyo muyeeye mibuzyo eeyi antoomwe:

- Muzyibeela nzi zya buumi bwangu mweelede kukomena kwiinda?
- Ncinzi ncenga ndaciti kutegwa eeci cicitike?
- Inga twagwasya buti uumwi kukomena muzyibeela eezyi iino mvwiki?

Mwabane bwiinguzi bwenu umwi aumwi, muzyipailile eelyo mulyaabe ku mucito. Mutobeleze kwiinda mukubuzanya umwi aumwi nakuli zyintu zynomwacita na kulipa kuzyicita.



Kamboni

Mwibaluke bamwi bantu mbomwakakanana kale aamwi na kwiinzya mbuli cibeela ca zyakucita zywali kucita. Muzyipailile eelyo nomupaila mulombe Leza amutondeze ooyo weelede kukulwaizyigwa kuzwa ku mvwiki iino. Muunke mukamuswaane ooyo, mukabe aciindi anguwe, mukaswiilile kuli nguwe – muya kumugwasya kukomena.

Bulembo

Cibeela ca Bufwaafwi



'Busyomi busalala butakwe kampenda mumeso aa-Leza Taateesu mbombuboobu, bwakuti muntu aswaye bamusyaala abamukabafu mumapenzi aabo, akuliyobola cakutaba akabala nikaba komwe kaansi.'

Lwa-Jakobo 1:27



Kulibambila

Sena:

- Mwaambila uumwi mukabunga kuti abale caano?
- Mwaambila uumwi mukabunga kuti abale kampango ka mu Bbaibbele?



5

tuvwalu-
vwalu

Kutambula & Bwiinguzi

- Mubalumbe boonse kuti baboola ku kabunga.
- Mutalisye mupailo utasyupi, mufwaafwi.
- Mubuzye na kabunga kakacita ‘Cakucita iino mvwiki’ a ‘Bumboni’ kuzwa mumvwiki yakainda.
- Mwiite bantu baambe cili coonse ncobakaiya na kucitakilwa kwiinda mukucita zya kucita eenzyi.



Muzeezo

Muzeezo wa cibeela eeci iino mvwiki ngwa kuliyezya tobamukabeni twaambo tupati-pati totwalanganya mu **Matalikilo 3: Buumi Bulalenga**.Tuya kulanga akumbele kubona ciboola mu **Matalikilo 4: Buumi Bulakomena**.



5

tuvwalu-
vwalu

Cipeto

Mubalisye cipeto camumutwe alimwi amukonzyanyo wamu Bbaibbele ku kabunga. Mwamana alimwi mucibale pesi mubale mutubeela-beela tusyoonoto, mubone kuti kabunga kalatobelezya. Mwiindulule oobu, mbiccaana mbiccaana mubale zyibeela zylamfu kabunga zyokati tobelezye kusikila limwi boonse bacizyibe lwabo. Mukulwaizye bamwi bantu kusola kwiindulula muli lwabo.

*Busyomi busalala butakwe kampenda mumeso aa-Leza
Taateesu mbombuboobu, bwakuti muntu aswaye
bamusyaala abamukabafu mumapenzi aabo, akuliyobola
cakutaba akabala nikaba komwe kaansi.*

Lwa-Jakobo 1:27



Caano

Kuli kaano ka kaindi kaitwa kuti ‘Musankwa wakalila umpe.’

Kwa myaka minji yakainda mu munzi musyoonto muzyuulu kwakali mwana musankwa. Wakali mweembezi, wakali kweembela mbelele zya bausyi. Basimunzi bakajisi bubi kuya ku milimo yabo eelyo nakaboola ca lubilo mumunzi kaompolola ku, “Umpe! Umpe!”

Basimunzi bakasiya zyobakali kucita mpoona mpoona akulundukila kuya mummyuunda mwakali kucelela mbelele, kutegwa bakatande umpe alimwi akuvwuna mbelele. Nkabela eelyo nobakasika kuya bakajana kwiina acitondezyo ca umpe, alimwi mbelele ziyakali kucela cakukondwa.

Musankwa wakamvwa kabotu kubona kuti koompolola kwakwe kusyoonto kwakakonzya kupa basimunzi kuleka zyobakali kucita.

Nokwakainda buyo mazuba masyoonto musankwa alimwi wakajokela mummyuunda. Wakalimvwa kulendelelwa asyoonto alimwi wakali kuyanda cimwi cikonzya kumukkomaniya eelyo wakakusola alimwi kucenga kwakwe. Wakalundukila mumunzi walila, “Umpe! Umpe!”

Lino eeci ciindi basimunzi basyoonto buyo mbobakalundukila kuya kumugwasya soola umpe ku lutanga lwa mbelele.

Mbobakabonena buyo kuti alimwi bacengwa, basimunzi bakamucimwa musankwa. Mazuba masyoonto akainda alimwi; lino eeci ciindi, musankwa kalangilila mbelele wakabona umpe kabendeleda lutanga. Kazyingidwe kapati wakalundukila mumunzi, woompolola akulila, “Umpe! Umpe!”

Basimunzi boonse bakamulanga buyo cakutasyoma.

“Sena uyeeya kuti inga twakusyoma ecino ciindi – peepe! Tatulangilwi kucengwa alimwi.”

Musankwa wakakombelezya akulomba pesi taakwe aomwe wakamusyoma, aboobo wakalundukila ku lutanga lwakwe pesi kwakaba kumuka. Zyoonse mbelele zyakalumwa aumpe: lutanga tilwakaciliko.

Akaambo kakuti musankwa wakabeja kwazyiindi zynji kujatikizya kuunina bantu, tibakakonzya kumusyoma eelyo nakaamba masimpe.



Luzyibo lwa mu Bbaibbele

Mubale Jakobo 2:14-18 ku kabunga:

¹⁴Ino kulagwasya buti, nobakwesu, na muntu waamba kuti, Mebo ndijisi lusyomo, pele tajisi milimo? Sa lusyomo olo luyoomufutula? ¹⁵Na musyominyina mwaalumi naba mwanakazi wabula zyakusama azilyo zyakulya, ¹⁶lino umwi akati kanu abaambila kuti, Kamuya aluumuno, mujane zyakulivumba azilyo zyakumukutya, nekubaboobo tabapi zintu nzyuuyanda mubili, ino kulagwasyanzi? ¹⁷Mbubonya obo lusyomo lutajisi milimo mbululi lulike, lulifwide buyo.

¹⁸Ncobeni muntu inga ulaamba kuti, Yebo ulijisi lusyomo, ambebo ndijisi milimo, Unditondezye lusyomo lwako lwaanzeene amilimo yako, mebo kumilimo yangu nkweni kutondezye lusyomo mbolubede.



Lusyomo lwesu talweede kuba buyo lwa majwi, pele amicito. Cibalo cesu ca sunu citwibalusya kuti majwi eesu amicito zyeede kwendelana, ibiyo, mbuli musankwa mucaano, people inga tibabusyoma buumi bwesu muli Jesu. Kuti twaamba cimwi cintu pesi kakwiina kucicita, nkokuti eeco cilatondezya mbuli kusyoma kwesu mbokwendelana ancotwaamba, alimwi ambuli mbotulibambilide kuti Leza atucince, akutubelesya kucinca zyooko zyesu.



15 mins

Cakucita: Tusimpe 2 Abubeji 1

Mubazyi kapati buti aabo mbomuli limwi mukabunga? Musobane eeci cisobano kutegwa muzyibe!

Mwaambile boonse bayeeye zyintu 2 ziyajatikizya zya masimpe alimwi babambe cintu 1 citali ca masimpe (eenzyi inga kazyisinizyide na zya kusobana buyo).

Mwaabanye kabunga mutubunga tusyoonto twa bantu 3-4. Kabapana ciindi, aumwi muntu ambile mbobali limwi mukabunga zyintu 3 zymujatikizya. Bamwi bantu bali mukabunga basoleke kuzumbula zyintu zya kasimpe acitali ca kasimpe.



Mubbuku eeli lyoonse, **Buumi Bulalenga**, twali kulanganya nzila eezyo zyalo lusyomo lwesu molunga lwakonzya kucinculula maumi eesu muzyooko zyesu. Nmucipeto cesu ca mumutwe Jakobo utwaambila kuti 'bukombi bwa kasimpe' mboobo bucita cimwi cintu; mukaambo kakwe cigwasyilizya aabo baina

kucetaala alimwi akubula muzyooko. Lusyomo lwesu tacili cintu ca maseseke eeco ncotunga twayobola mukusisikizya tobamukabeni. Tacili cintu ca luziyibo cikonzya kukkala mu mizeezo yesu. Ncintu cicitwa calo cikonzya kututola ku mukonzanyo wa Jesu ngwa katondezya, kututondezya kusika kuli bamwi aabo bali mucooko bayandisisya buumi bupya Jesu mbwapa. Munzila eeyo Jesu inga tacinculula buyo ndiswe, pele abaabo batuzungulukide.

Kucebuka ku Matalikilo 3: Buumi Bulalenga

Mubbuku eeli lya tatu muzyibeela zya Matalikilotwalanganya kasimpe kakuti Leza ulajanwa mucooko, eeli akuti ulatwiita kuti tube lubazu mucooko eeci. Eelyonotwazumina buumi oobu bupya tusangana mukwasyi wakwe; tuli lubazu lwa ncata mubili wakwe ooyu mukwasyi amubili zyifwanikiso zya cikombelo. Eeci caamba kuti nokuba kuti tulandeene, tuyanda umwi aumwi kutegwa tusyuke akukomena. Aumwi wesu ulipedwe zyipego, alimwi ulijisi coolwe ca kutambula zyipego zya muuya kutegwa akomezye mubili eelyo agwasyilizye zyooko zyesu alimwi akuti tukonzye kuba antoomwe. Eeci ciyanda kuti tube alusyomo, oolo lwalo luli mbotulubelesya, lulakomena mbotulubelesyela.

Twakaba aciindi cakulanganya Nkondo ya Muuya alimwi ambotunga twali kwabilila eelyo akulwana makanze aa mulwani, saatani. Mbuli cibeela ca ciciyo eeci twakaba aciindi cakupaililana kutegwa tutande cili coonse ca muuya citali ca Leza, kusyoma kuti atwaangulule. Alimwi twakaiya abwakupailila zyooko zyesu, kuli baabo mbotuswaanganya notuli anze. Twakalifoola kwaabanya twaano twesu kutegwa tukonzye kuba bakamboni kuli Leza akati ka balongwe, mukwasyi alimwi buya akunze.

Kulondelela ku mamano aa bbuku twakalanganya bululami bwa Leza, kulanganya mbuli mbotukonzya kulwana bube bwesu butali bwa bululami antoomwe azyibi zytuzungulukide, muzyooko zyesu akule. Mukumanizya, twakalanganya mbotunga twatola lubazu mukugwasya bamwi kuti bakomezwe buumi bwabo bupya, mbokunga aswebo twakakubona kale kukomena.



20 mins

Kubandika

Lino tulacebuka muni akulanganya ayibeela zyili 12 mu **Matalikilo 3: Buumi Bulalenga** akuba aciindi ca kukanana mutubunga tusyoonto tupati-pati tomwaiya.

Mutubunga twa bantu 3 na 4, mupe kumwi kumvwa kwenu kwa bukamboni kuli baabo bali mucooko cunu kusanganya akumvwa ooko kwakasyupide kwiinda.

Mukumanizya, musunke omwe muzyipeto zya mumutwe zyili 13 (kusanganya aca sunu) eelyo aliwmi kuti kamukonzya kugwasya uuli oonse muyeeye mangwalo ngotwalanganya.

Kuti kakuli ciindi, mulange zyipeto zyomujana kuti zyilagwasya kapati na zyakana kuli ndinywe munzila ya cigaminina ku mvwiki zyili 12 zyainda.



Kulangila Matalikilo 4: Buumi Bulakomena

Mu **Matalikilo 4**, mubbuku lya mamano mumabbuku abuumi tuyakulanga mbuli **Buumi Mbobukomena**. Tuyakulanga mubulamfwu mbuli buumi bwesu mbobucinca eelyo notwakomena mulusyomo. Mbweena mbuli mubuumi mwana ulakomena akuba mupati, aboobo mubuumi bwesu bwa muuya tulakomena akukula. Tulaiya zytondezyo zya kukomena ooku zyalo ziyiji akuyandisisya kucinca, eeco lbabbele ncoliita kuti,

‘kufwa omwini.’ Tuya kwiiya mbotunga twamvwa kuli Leza eelyo akumulemeka, kuswiilizya mbuli Leza mbwakeenzya bantu bakwe kaindi, ambwazumanana kubeenzya sunu.

Tuyakulanga mubulamfwu mbuli mbotunga twaabanya eeco Leza ncatupede – buumi bwesu, ciindi amali – kuzyiba kuti coonse ncotujisi cakapegwa kuli ndiswe a Leza, eelyo tucibelesya kabotu notwacipa kuli Leza. Eeci cicina mbotubona nyika, mbotumvwa masena eesu, makanze eesu akumbele. Mukumanizya tuyakulanga mbotukonzya kujatilila ku lusyomo lwesu akumanizya lweendo lwa lusyomo kabotu, eelyo ku mamano paka tukaunke kuya kukkala a Jesu kukabe kutamani.



15

tuvwalu-
vwalu

Mupailo

Mutubunga tusyoonto mube aciindi ca kwaabana twaambo twakupailila ooto twazwa mucibeela eeci. Ambweni inga mwapa twaambo tweeleda kuba mukulumbaizya kwa zyintu ziomwalibonena kacita Leza eelyo nomwalikubelesya cibelesyo. Inga mwapa tumwi twaambo twakupailila ku zyibeela ziomumvwa kuti ziyandika mulimo, na kupola, eelyo kamutaninga tabukila ku bbuku litobela.

Mwamana buyo kupa twaambo twakulumbaizya akupailila, mube aciindi mukabunga kenu cakupaililana.

Mukumanizya, mbuli kabunga koonse, mupaile mupailo utobela antoomwe:

*Mwami Jesu,
Ndalumba kuti wandipa buumi bupya, eelyo kwiinda muli
ndime uyanda kulenga buumi bupya mumukwasyi wangu
acooko cangu. Ndapaila kuti undigwasye kuzumanana*

*kubikka lusyomo lwangu mumicito, kutegwa ubeleke
kwiinda muli ndime, kusika kuli bamwi aabo
bamuyandisisya.
Amen.*



Cakucita iino mvwiki

Mvwiki amvwiki kuli ncito ya kubelekela ku ng'anda. This week spend some time meditating on our memory verse. Ambweni muswaangane amuntu 1 na 2 bamukabunga eelyo mukanane antoomwe:

- Ino 'bukombi bwiini ninzi?'
- Ino caamba kuli kasya kubisyigwa anyika?
- Sena kuli bamucaala na bamuka bafwu na bantu bapenzi mucooko cenu mbomuyanda kulanganya?



Kamboni

Twasika kubantu banji ciindi notwali kubala bbuku eeli antoomwe. Milimo yesu iya kuba amulimo ku maumi aa bantu, kuleta kucinca. Eeci Leza ncatulomba kucita. Iino mvwiki tuyakusika kuli uumwi mupenzi mucooko cesu.

Muyeeye uumwi upengede, ooyu inga kali mucaala, muka mufwu, mupenzi na muntu unyina ancajisi mucooko cenu. Muyeeye mbomunga mwamuleleka iino mvwiki mpoona muunke mukacibelekele. Eeci inga kakuli kwaaba cakulya, kupa zysisani, kugwasyilizya mulimo umusyupa na kugwasyilizya kujana cintu cikonzya kuna kumugwasyilizya.

Kuti kaconzyeka, mumwaambile eeco camukulwaizya kumugwasya, kupandulula mbuli lusyomo lwenu amicito yenu mbozyiswaangene.

Zya Mumutwe

‘Swiilila, O Israyeli, Jehova ngu-Leza wesu, Jehova ngumwi.’

Deuteronomo 6:4

‘Nobakazubusya maato kunkomwe, bakasiya zyoonse, bamuccilila.’

Luka 5:11

‘Umwi aumwi ulapegwa bulaizi bwa-Muuya kukugwasya banamaleya.’

1 Ba-Korinto 12:7

‘Amutobele luyandisyo, alimwi amupangike myoyo yanu kuzipego zya-Muuya, pele kwiinda zyoonse kubusinsimi.’

1 Ba-Korinto 14:1

‘Syoma Jehova amoyo wako woonse;

Utalifunkizyi kumaanu aako omwini.

Umuzibye munzila zyako zyoonse,

Nkabela uyooenzya myeendelo yako.’

Tusimpi 3:5-6

‘Mubbi uzida buyo kubba akujaya akunyonyauna, mebo ndazida kuti babe abuumi, akuti buvule.’

Johane 10:10

‘Kukusaanguna ndiyandisya kuti kucitilwe bantu boonse zikombyo ankumbilizyo ankombelezyo akulumba.’

1 Timoteo 2:1

‘Nkaambo Bwami bwa-Leza tabuli bwakwaamba buyo pe, mbwanguzu.’

1 Ba-Korinto 4:20

‘Wakabaambila kuti, Kutebula nceo, pele basimilimo mbace, nkaako amukombelele Mwami wakutebula, kuti atume basimilimo mukutebula kwakwe.’

Luka 10:2

‘Pele imbeta kaziya bupoomoka mbuli maanzi, abululami mbuli mulonga uutayuminini’

Amosi 5:24

‘Nkabela Mwami uzoobavwiila kuti, Ncobeni ndamwaambila kuti, mbuli mbumwakacitila obo umwi naba muniini akati kabakwesu aba, mwakacitila ndime mbubonya.’

Matayo 25:40

‘Lino tatalengaani mukucita kabotu, nkaambo kuciindi ceelede tulatebula, twatafunuka.’

Ba-Galatiya 6:9

‘Busyomi busalala butakwe kampenda mumeso aa-Leza Taateesu mbombuboobu, bwakuti muntu aswaye bamusyaala abamukabafu mumapenzi aabo, akuliyobola cakutaba akabala nikaba komwe kaansi.’

Lwa-Jakobo 1:27

Mulongo wa Zifwanikiso

Cifwanikiso

Peeji Iya kumbele

Cibeela 1 mutwe wa
peeji

Cibeela 2 mutwe wa
peeji

Cibeela 3 mutwe wa
peeji

Cibeela 4 mutwe wa
peeji

Cibeela 5 mutwe wa
peeji

Cibeela 6 mutwe wa
peeji

Sikalumamba wa ci
roma

Cibeela 7 mutwe wa
peeji

Cibeela 8 mutwe wa
peeji

Cibeela 9 mutwe wa
peeji

Cibeela 10 mutwe
wa peeji

Cibeela 11 mutwe
wa peeji

Cibeela 12 mutwe
wa peeji

Cibeela 13 mutwe
wa peeji

Zyijakizya Cifwanikiso

Cifwanikiso aba Bill Williams buzuba Unsplash

Cifwanikiso aba Danielle Barnes buzuba Unsplash

Cifwanikiso aba Mega Caesaria buzuba Unsplash

Cifwanikiso aba Ullash Borah buzuba Unsplash

Cifwanikiso aba Clem Onojeghuo buzuba Unsplash

Cifwanikiso aba Richard Thompson, cazumizyigwa
kubeselegwa

Cifwanikiso aba Savas Kazantzides buzuba
Unsplash

Cifwanikiso aba macrysstina buzuba Pixabay

Cifwanikiso aba Nathan Dumlaio buzuba Unsplash

Cifwanikiso aba Samuel Zeller buzuba Unsplash

Cifwanikiso aba Capturing the Human Heart
buzuba Unsplash

Cifwanikiso aba Karthikeyan K buzuba Unsplash

Cifwanikiso aba Atlas Green buzuba Unsplash

Cifwanikiso aba Francesco Gallarotti buzuba
Unsplash

Cifwanikiso aba Avel Chuklanov buzuba Unsplash

MATALIKILO 3:

Buumi Bulalenga

Matalikilo nciyo cigwasya bantu kuzyiba akukomena mu bulongwe bwabo a Leza alimwi cilabakutwaizya kubamba cooko cabo. Cakalembelwa kupa zyibesyo zisumpukide zyikonzya kubelesyegwa mumasena aindene indene amutubunga twazyianza munyika. Matalikilo ajisi mabbuku one, alimwi kalijisi zyiyo zyambunga zyakukwabana zyili kkumi azyotatwe.

Matalikilo akalembwa abalembi beenzu basikulyaaba kuzwa munyika alimwi akubikkwa antoomwe akulembululwa aba Dignity.

Matalikilo 3: Buumi Bulalenga cibikkila maano kubona basiciya mbobakonzya kucinca zyintu ziyazungulukide. Muna Kristu uuzwide ulalengulula buumi mbwapedwe mucooko alimwi abwabamwi.

**Amutukwabe ali hello@dignityonline.org.uk na
+44 (0)7340 573 937. Ku mitwe ya makani eesu
amyuulo amuswaye kasabwi kesu:
www.dignityonline.org.uk/publications.**

Tonga 1st Edition

Pepa lyaatala: The Message Trust

Bubambe bwa pepa lyaatala: Bill Williams/Unsplash



www.dignityonline.org.uk